



207
99

ॐ ओ३म् ॐ

पुस्तक-संख्या

२० ब/११

पंजिका-संख्या

१४५६८


पुस्तक पर सर्व प्रकार की निशानियां
लगाना वर्जित है। कोई महाशय १५ दिन से
अधिक देर तक पुस्तक अपने पास नहीं रख
सकते। अधिक देर तक रखने के लिये पुनः
आज्ञा प्राप्त करनी चाहिये।

सत्यक प्रमाणिकरय १९८४-१९८४

Gurukul Library
Kangri



श्री श्री विवेकानन्द ।



Gurukul Library
Kangri

कर्म-योग ।

दशमोऽध्यायः

विष्णुसंहिता

२० न
११

* ओ३स् *
 पुस्तक की संख्या.....208
 पुस्तकालय-पडिजका-संख्या.....497
 पुस्तक पर सर्व प्रकार की निशानियां लगाना वर्जित है ।
 कोई महाशय १५ दिन से अधिक देर तक पुस्तक अपने
 पास नहीं रख सकता । अधिक देर तक रखने के लिये
 शुनः आज्ञा प्राप्त करनी चाहिये ।

কন্য-যোগ ।

স্বামী বিবেকানন্দ ।

Gurukula Library
Kangri



20 ४

99 / 4970

চতুর্থ সংস্করণ ।

আশ্বিন, ১৩১৮ ।

All Rights Reserved.

[মূল্য ৫০ আনা ।

কলিকাতা,

১২, ১৩, নং গোপালচন্দ্র নিয়োগীর লেন,
উদ্বোধন-কার্য্যালয় হইতে
ব্রহ্মচারী কপিল কর্তৃক
প্রকাশিত ।

Copy-righted by Swami Brahmananda,
President, Ramkrishna Math, Belur, Howrah.

কলিকাতা,

৯১১২ মেছুয়াবাজার ষ্ট্রীট,
“নববিভাকর যন্ত্রে”
শ্রীগোপালচন্দ্র নিয়োগী দ্বারা মুদ্রিত ।

অনুবাদকের নিবেদন ।

(তৃতীয় সংস্করণ)

প্রায় ২ বৎসর পূর্বে যখন স্বামী বিবেকানন্দের কর্ম-যোগ নামক গ্রন্থের প্রথম অনুবাদ করি, তখন ধারণা ছিল যে, আমেরিকান সংস্করণ খানিই উৎকৃষ্টতর; সুতরাং তদবলম্বনেই অনুবাদ করিয়াছিলাম। দ্বিতীয় সংস্করণে আত্মোপাস্ত সংশোধনের ইচ্ছা থাকিলেও অগ্ৰাণু কার্যাবশতঃ সময়াভাবে উহাতে হস্তক্ষেপ করিবার অবকাশ পাই নাই। অনেক দিন ধারিয়া তজ্জন্ত উহা অমুদ্রিত অবস্থায় ছিল। পরিশেষে পাঠকবর্গের আগ্রহাতিশয্যে উহা প্রায় সম্পূর্ণ অপরিবর্তিত ভাবেই পুনর্মুদ্রিত করা হয়। সম্প্রতি একটু অবকাশ পাইয়া মাদ্রাজ সংস্করণের সহিত মিলাইয়া দেখিলাম—মাদ্রাজ সংস্করণে আমেরিকান সংস্করণ অপেক্ষা এত অধিক নূতন বিষয় আছে যে, বলা যায় না। তন্মধ্যে দ্বিতীয় অধ্যায়ের মহানীক্ষাণ তন্ত্র হইতে বিস্তৃত উদ্ধৃতাংশ ও উহার উপর স্বামীজির মন্তব্যসমূহ এবং পঞ্চম অধ্যায়ের প্রারম্ভে ‘প্রতীক’ সম্বন্ধে সুদীর্ঘ আলোচনা বিশেষ উল্লেখযোগ্য। এতদ্ব্যতীত এই দুই সংস্করণের অনেক স্থলে এত পাঠান্তর যে, অনুবাদকে বিশেষ সমস্য়ায় পড়িতে হয়। অগত্যা আমরা মাদ্রাজী সংস্করণে প্রাপ্ত প্রায় সমুদয় অতিরিক্ত অংশগুলির অনুবাদ বর্তমান সংস্করণে সন্নিবেশিত করিলাম এবং পাঠান্তর স্থলে উভয় সংস্করণের তুলনা করিয়া যেটা স্পষ্টতর বোধ হইল সেইটাই অনুবাদ করিয়া দিলাম। এতদ্ব্যতীত পূর্বানুবাদের ভ্রম বা ভাষার ত্রুটিসমূহ সাধ্যমত আত্মোপাস্ত সংশোধন করিবার চেষ্টা পাইয়াছি। সুতরাং কর্ম-যোগের এই ৩য় সংস্করণকে প্রথম দুই সংস্করণ হইতে সম্পূর্ণ পৃথক্ গ্রন্থ বলা যাইতে পারে।

ইতি।

কার্তিক ১৩১৬।

বিনীতানুবাদকস্ত।

সূচীপত্র ।

বিষয় ।	পৃষ্ঠা ।
কস্ম—চরিত্রের উপর ইহার প্রভাব	১
স্ব স্ব কার্যক্ষেত্রে কেহই ছোট নহে	১৬
কস্ম-রহস্য	৪৭
কর্তব্য কি ?	৬৬
পরোপকারে কাহার উপকার	৮৪
অনাসক্তিই পূর্ণ আত্মত্যাগ	১০৩
মুক্তি	১২৫
কস্ম-যোগের আদর্শ	১৪৮

Gurukula Library
Kangri



কর্ম-যোগ ।

প্রথম অধ্যায় ।

কর্ম—চরিত্রের উপর ইহার প্রভাব ।

কর্ম শব্দটি সংস্কৃত ‘কৃ’ ধাতু হইতে সিদ্ধ ; ‘কৃ’ ধাতুর অর্থ ‘করা’ ; যাহা কিছু করা হয়, তাহাই কর্ম । এই শব্দটির আবার পারিভাষিক অর্থ ‘কর্মফল’ । দার্শনিক ভাবে ব্যবহৃত হইলে কখন কখন উহার অর্থ হয়—সেই সকল ফল, পূর্ব কর্ম যাহাদের কারণ । কিন্তু কর্মযোগে আমাদের ‘কর্ম’ শব্দটি কেবল ‘কার্য’ এই অর্থে ব্যবহার করিতে হইবে । সমুদয় মানবজাতির চরম লক্ষ্য—জ্ঞানলাভ । প্রাচ্যদর্শন আমাদের নিকটে এই এক মাত্র লক্ষ্য ব্যতীত অন্য কোনরূপ লক্ষ্যের কথা বলেন নাই । সুখ মানুষের চরম লক্ষ্য নহে—জ্ঞান । সুখ, আনন্দ, এ সকলের ত শেষ হইয়া যায় । সুখই চরম লক্ষ্য মনে করা মানুষের ভ্রম । জগতে আমরা যত দুঃখ দেখিতে পাই, তাহার কারণ, মানুষ অজ্ঞের মত মনে করে, সুখই আমাদের চরম লক্ষ্য । কালে মানুষ বুঝিতে পারে, সে সুখের দিকে নয়, জ্ঞানের দিকে ক্রমাগত চলিয়াছে—সুখ দুঃখ উভয়েই তাহার মহা শিক্ষক—সে শুভ হইতে যেমন, অশুভ হইতেও তদ্রূপ, শিক্ষা পায় । সুখ দুঃখ যেমন তাহার আত্মার উপর দিয়া চলিয়া যায়, অমনি তাহারা উহার

উপর नानाविध चित्र राखिया যায়, আর এই চিত্রসমষ্টি বা সংস্কার-সমষ্টির ফলকেই আমরা মানব-‘চরিত্র’ বলি । কোন ব্যক্তির চরিত্র লইয়া আলোচনা করিয়া দেখ, বুঝিবে—উহা প্রকৃত পক্ষে তাহার মনের প্রবৃত্তি, মনের প্রবণতাসমূহের সমষ্টি-মাত্র । তুমি দেখিবে—তাহার চরিত্রগঠনে সুখ দুঃখ উভয়ে সমান উপাদান ; তাহার চরিত্রকে এক বিশেষরূপ ছাঁচে ঢালিবার পক্ষে ভাল মন্দ উভয়েরই সমান অংশ আছে ; কোন কোন স্থলে বরং দুঃখ সুখ হইতে অধিক শিক্ষা দিয়াছে, দেখা যায় । জগতের সমুদয় মহা-পুরুষগণের চরিত্র আলোচনা করিলে দেখা যায়, অধিকাংশ স্থলে দুঃখ সুখ অপেক্ষা তাঁহাদিগকে অধিক শিক্ষা দিয়াছে ।—দারিদ্র্য ধন হইতে অধিক শিক্ষা দিয়াছে, প্রশংসা হইতে নিন্দারূপ আঘাতই তাঁহাদের অভ্যন্তরীণ জ্ঞানাগ্নির প্রস্ফুরণে অধিক পরিমাণে সাহায্য করিয়াছে ।

এই জ্ঞান আবার মানুষের অন্তর্নিহিত । কোন জ্ঞানই বাহির হইতে আইসে না, সবই ভিতরে । আমরা যে বলি, মানুষ ‘জানে’, ঠিক মনোবিজ্ঞানের ভাষায় বলিতে গেলে বলিতে হইবে—আবিষ্কার করে (Discovers) । মানুষ যাহা ‘শিক্ষা’ করে, প্রকৃতপক্ষে সে উহা আবিষ্কার করে । Discover শব্দের অর্থ—অনন্ত জ্ঞানের খনিস্বরূপ নিজ আত্মা হইতে আবরণ সরাইয়া লওয়া । আমরা বলি, নিউটন মাধ্যাকর্ষণ আবিষ্কার করিয়াছিলেন । উহা কি এক কোণে বসিয়া তাঁহার জন্ম অপেক্ষা করিতেছিল ? না, উহা তাঁহার নিজ মনেই অবস্থিত

ছিল। সময় আসিল, অমনি তিনি উহা দেখিতে পাইলেন। জগৎ যত প্রকার জ্ঞানলাভ করিয়াছে, সমুদয়ই মন হইতে। জগতের অনন্ত পুস্তকাগার তোমার মনে। বহির্জগৎ কেবল তোমার নিজ মনকে অধ্যয়ন করিবার উত্তেজক কারণ—উপযোগী অবস্থা-স্বরূপ, কিন্তু সকল সময়েই তোমার নিজ মনই তোমার অধ্যয়নের বিষয়। আপেলের পতন নিউটনের পক্ষে উদ্দীপক কারণ-স্বরূপ হইল, তখন তিনি নিজ মন অধ্যয়ন করিতে লাগিলেন। তিনি তাঁহার মনের ভিতরকার পূর্ব হইতে অবস্থিত ভাবপরম্পরারূপ শৃঙ্খলগুলি পুনরায় আর এক ভাবে সাজাইতে লাগিলেন; এবং উহাদের ভিতর আর একটা শৃঙ্খল আবিষ্কার করিলেন। উহাকেই আমরা মাধ্যাকর্ষণের নিয়ম বলি। উহা আপেল অথবা পৃথিবীর কেন্দ্রে অবস্থিত কোন পদার্থে ছিল না। অতএব ব্যবহারিক বা পারমার্থিক সমুদয় জ্ঞানই মানুষের মনে। অনেক স্থলেই উহারা আবিষ্কৃত (অনাবৃত) থাকে না, বরং আবৃত থাকে। যখন এই আবরণ অল্প অল্প করিয়া সরাইয়া লওয়া হয়, তখন আমরা বলি ‘আমরা শিক্ষা করিতেছি,’ আর এই আবিষ্করণ-প্রক্রিয়া যতই চলিতে থাকে, ততই জ্ঞানের উন্নতি হইতে থাকে। যে পুরুষের এই আবরণ ক্রমশঃ উঠিয়া যাইতেছে, তিনি অপেক্ষাকৃত জ্ঞানী; যে ব্যক্তির আবরণ খুব বেশী, সে অজ্ঞান; আর যে মানুষ হইতে উহা একেবারে চলিয়া গিয়াছে, তিনি সর্বজ্ঞ পুরুষ। প্রাচীন কালে অনেক সর্বজ্ঞ পুরুষ ছিলেন, আমার বিশ্বাস—এ কালেও অনেক হইবেন, আর আগামী যুগসমূহে অসংখ্য সর্বজ্ঞ

পুরুষ জন্মাইবেন । যেমন একখণ্ড চকমকিতে অগ্নি অন্তর্নিহিত থাকে, তদ্রূপ জ্ঞান মনের মধ্যেই রহিয়াছে, উদ্দীপক কারণটা ঘর্ষণ-স্বরূপে সেই অগ্নিকে প্রকাশ করিয়া দেয় । আমাদের সকল ভাব ও কার্যসম্বন্ধেও তদ্রূপ ; যদি আমরা ধীরভাবে নিজেদের অন্তঃকরণকে অধ্যয়ন করি, তবে দেখিব, আমাদের হাসি কান্না, সুখ দুঃখ, বর অভিসম্পাত, নিন্দা সূখ্যাতি সমুদয় গুলিই আমাদের মনের উপর বহির্জগতের অনেক ঘাতপ্রতিঘাত হইতে উৎপন্ন । উহাদের ফলেই আমাদের বর্তমান চরিত্র গঠিত ; এই সমুদয় ঘাত-গুলিকে একত্রে ‘কৰ্ম’ বলে । আত্মার অভ্যন্তরস্থ অগ্নিকে বাহির করিবার জন্ত, উহার নিজ শক্তি ও জ্ঞান প্রকাশের জন্য যে কোন মানসিক বা ভৌতিক ঘাত প্রদত্ত হয়, তাহাই কৰ্ম ; কৰ্ম অবশ্য এখানে উহার সার্বভৌমিক অর্থে ব্যবহৃত । অতএব আমরা সর্বদাই কৰ্ম করিতেছি । আমি কথা কহিতেছি ; ইহা কৰ্ম । তোমরা শুনিতেছ ; ইহাও কৰ্ম । শ্বাসপ্রশ্বাস ফেলিতেছি ; ইহা কৰ্ম । বেড়াইতেছি—কৰ্ম । কথা কহিতেছি—কৰ্ম ; শারীরিক বা মানসিক যাহা কিছু আমরা করি, তাহাই কৰ্ম । উহারা আমাদের উপর উহাদের ছাপ রাখিয়া যাইতেছে ।

কতকগুলি কার্য আছে, সেগুলি যেন অনেকগুলি ক্ষুদ্র ক্ষুদ্র কৰ্মের সমষ্টিস্বরূপ । যদি আমরা শৈলখণ্ডপূর্ণ সমুদ্রতটে দণ্ডায়মান হইয়া উহার উপর উর্মিমালার প্রতিঘাত শুনিতে থাকি, তখন উহাকে কি ভয়ানক শব্দ বলিয়া বোধ হয় ! কিন্তু আমরা জানি, একটা তরঙ্গ প্রকৃত পক্ষে অতি ক্ষুদ্র ক্ষুদ্র লক্ষ লক্ষ তরঙ্গ

সংগঠিত । উহাদের প্রত্যেকটি হইতেই শব্দ হইতেছে, কিন্তু আমরা তাহা শুনিতে পাই না ; যখনই উহারা একত্র হইয়া প্রবলাকার ধারণ করে, তখনই আমরা প্রবল শব্দ শুনিতে পাই । এইরূপে হৃদয়ের প্রত্যেক কম্পনেই কার্য্য হইতেছে । কতকগুলি কার্য্য আমরা বুঝিতে পারি, তাহারা আমাদের ইন্দ্রিয়গ্রাহ্য হইয়া থাকে । তথাপি তাহারা ক্ষুদ্র ক্ষুদ্র কৰ্ম্মসমষ্টিস্বরূপ । যদি তুমি কোন ব্যক্তির চরিত্র যথার্থ বিচার করিতে চাও, তবে তাহার বড় বড় কার্য্যের দিকে লক্ষ্য করিও না । অবস্থা-বিশেষে নিতান্ত নির্বোধও বারতুল্য কার্য্য করিয়া থাকে । লোককে তাহার অতি সামান্য কার্য্য করিবার সময় লক্ষ্য কর, উহাতেই মহৎ লোকের প্রকৃত চরিত্র জানিতে পারিবে । বড় বড় ঘটনায় সামান্য লোককে পর্য্যন্ত মহৎ করিয়া তুলে । কিন্তু সকল অবস্থাতেই বাহার চারিত্রের মহত্ত্ব লক্ষিত হয়, তিনিই প্রকৃত মহৎ লোক ।

মানুষকে যত প্রকার শক্তি লইয়া নাড়াচাড়া করিতে হয়, যে কৰ্ম্মের দ্বারা মানুষের চরিত্র গঠিত হয়, তাহাই তন্মধ্যে সর্ব্বোপেক্ষা প্রবলতম শক্তি । মানুষ যেন একটা কেন্দ্র, জগতের সমুদয় শক্তি তিনি নিজের দিকে আকর্ষণ করিয়া লইতেছেন, ঐ কেন্দ্রতেই উহাদিগকে গালাইয়া মিশাইতেছেন, তার পর খুব প্রবল একটা তরঙ্গাকারে উহাদিগকে বাহিরে প্রক্ষেপ করিতেছেন । সেই কেন্দ্রই প্রকৃত মানুষ, যিনি সর্ব্বশক্তিমান্ সর্ব্বজ্ঞ, আর তিনি তাঁহার নিজের দিকে সমুদয় জগৎকে আকর্ষণ করিতে-

ছেন। ভাল মন্দ, সুখ দুঃখ সবই তাঁহার দিকে চলিয়াছে, গিয়া যেন তাঁহার চতুর্দিকে জড়াইতেছে। তিনি তাহাদের মধ্য হইতে চরিত্রনামক মহাশক্তি গঠন করিয়া লইয়া উহাকে বহির্দেশে প্রক্ষেপ করিতেছেন। যেমন তাঁহার ভিতরে গ্রহণ করিবার শক্তি আছে, তদ্রূপ বাহিরে প্রক্ষেপ করিবারও শক্তি আছে।

এক্ষণে ভাবিয়া দেখুন, আমরা জগতে যত প্রকার কার্য্য দেখিতে পাই, মনুষ্য-সমাজে যত প্রকার গতি হইতেছে, আমাদের চতুর্দিকে যে সকল কার্য্য হইতেছে, উহারা কেবলমাত্র চিন্তার প্রকাশমাত্র, মানুষের ইচ্ছার প্রকাশমাত্র। যন্ত্রসমূহ, নগর, জাহাজ, যুদ্ধজাহাজ সবই মানুষের ইচ্ছার বিকাশমাত্র। এই ইচ্ছা আবার চরিত্র হইতে গঠিত, চরিত্র আবার কস্মগঠিত। যেমন কস্ম, ইচ্ছার প্রকাশও তদনুরূপ। জগতে যত প্রবল-ইচ্ছাশক্তিসম্পন্ন মহাপুরুষ জন্মিয়াছেন, তাঁহাদের সকলেই কঠোর কস্মী ছিলেন। তাঁহাদের এত শক্তি ছিল যে, তাঁহারা জগৎকে উলটিয়া পালটিয়া দিতে পারিতেন। ঐ শক্তি তাঁহারা যুগে যুগে নিরবচ্ছিন্ন কস্ম দ্বারা লাভ করিয়াছিলেন। বুদ্ধ বা যীশুর ন্যায় প্রবল ইচ্ছাশক্তি একজন্মে লাভ করা যায় না, কারণ, আমরা জানি, তাঁহাদের পিতা কাহারো ছিলেন। তাঁহাদের পিতারা যে জগতের হিতের জন্য কখন কিছু বলিয়াছিলেন, তাহা জানা নাই। ষোশেফের ন্যায় লক্ষ লক্ষ সূত্রধর জীবলীলা সম্বরণ করিয়াছে; লক্ষ লক্ষ এখনও জীবিত রহিয়াছে। বুদ্ধের পিতার ন্যায় লক্ষ লক্ষ ক্ষুদ্র রাজা জগতে ছিলেন। যদি ইহা কেবলমাত্র পুরুষানু-

ক্রমিক সঞ্চারের (hereditary transmission) উদাহরণ হয়, তবে এই ক্ষুদ্র সামান্য রাজা, যাঁহাকে হয়ত তাঁহার ভৃত্যেরা পর্য্যন্ত মানিত না, কিরূপে এমন এক সন্তানের জনক হইলেন, যাঁহাকে জগতের অন্ধৈক লোক উপাসনা করিতেছে? সূত্রধর ও তাঁহার এই সন্তানের (যাঁহাকে লক্ষ লক্ষ লোকে ঈশ্বর বলিয়া উপাসনা করিতেছে) মধ্যে এই যে অনতিক্রমণীয় প্রভেদ, তাহাই বা কিরূপে ব্যাখ্যা করিবে? পূর্বোক্ত মত দ্বারা উহার ব্যাখ্যা হয় না। বুদ্ধ জগতে যে মহাশক্তি সঞ্চার করিয়াছিলেন, যাহা যীশুর ভিতর হইতে প্রকাশিত হইয়াছিল, তাহা কোথা হইতে আসিল? এই শক্তিসমষ্টি কোথা হইতে আসিল? অবশ্য উহা যুগযুগান্তর হইতে ঐ স্থানেই ছিল। ক্রমশঃ প্রবল হইতে প্রবলতর হইতেছিল। অবশেষে সমাজে উহা বুদ্ধ বা যীশু নামে প্রবল শক্তির আকারে প্রকাশ পাইল। এখনও ঐ শক্তি-তরঙ্গ প্রবাহিত হইয়া চলিয়াছে।

আর এই সমুদয়ই কৰ্ম দ্বারা নিয়মিত। উপার্জন না করিলে কেহ কিছু পাইতে পারে না। ইহাই সনাতন নিয়ম। আমরা মনে করিতে পারি, আমরা ফাঁকি দিয়া কিছু লাভ করিব, কিন্তু আখেরে আমাদিগকে পূর্বোক্ত নিয়মে দৃঢ়বিশ্বাসী হইতে হয়। কোন লোক সমুদয় জীবন ধনী হইবার চেষ্টা করিল। সে সহস্র সহস্র ব্যক্তিকে প্রতারণা করিল, কিন্তু সে অবশেষে দেখিতে পায় যে, সে সেই সমস্ত ধনভোগের প্রকৃত উপযুক্ত নহে। তখন তাহার জীবন তাহার পক্ষে কষ্টকর ও ঘৃণ্য হইয়া দাঁড়ায়। আমরা

আমাদের শারীরিক ভোগের জন্য অসংখ্য ধন সংগ্রহ করিয়া
 বাইতে পারি, কিন্তু প্রকৃত পক্ষে আমরা যাহা নিজ কর্মের দ্বারা
 উপার্জন করি, তাহাতেই আমাদের অধিকার। একজন নির্বোধ
 জগতের সকল পুস্তক ক্রয় করিতে পারে, কিন্তু সেগুলি তাহার
 পুস্তকাগারে কেবল পড়িয়া থাকিবে মাত্র। সে যেগুলি পড়িবার
 উপযুক্ত, সেগুলিই পড়িতে পারিবে, আর এই অধিকার কর্ম
 হইতে সমুৎপন্ন। আমাদের কর্মই আমরা কিসের অধিকারী,
 কোন্ বস্তুই বা আমরা নিজের ভিতরে গ্রহণ করিতে পারি, তাহার
 নির্ণায়ক। আমাদের বর্তমান অবস্থার জন্য আমরাই দায়ী, আর
 আমরা যাহা হইতে ইচ্ছা করি, তাহা হইবার শক্তিও আমাদের
 আছে। আমাদের বর্তমান অবস্থা যদি আমাদের পূর্ব কর্মের
 দ্বারা নিয়মিত হয়, তবে ইহা নিশ্চয় সিদ্ধান্ত হইবে যে, আমরা
 ভবিষ্যতে যাহা হইতে ইচ্ছা করি, আমাদের বর্তমান কর্ম দ্বারা
 তাহা হইতে পারি। অতএব আমাদের কিরূপে কর্ম করিতে
 হইবে, জানা উচিত। তোমরা হয়ত বলিবে, “কর্ম কি করিয়া
 করিতে হয়, তাহা আবার শিখিবার প্রয়োজন কি? সকলেই ত
 এই জগতে কার্য্য করিতেছে।” কিন্তু কথা এই, শক্তির অনর্থক
 ক্ষয় বলিয়া একটা জিনিষ রহিয়াছে। গীতায় এই কর্মযোগসম্বন্ধে
 কথিত আছে, ‘কর্মযোগের অর্থ কর্মের কৌশল—বৈজ্ঞানিক
 ভাবে কর্মানুষ্ঠান।’ কর্ম কি করিয়া করিতে হয় জানিতে
 হইবে, তবেই তাহা হইতে শ্রেষ্ঠতম ফললাভ হইবে।
 তোমাদের স্মরণ রাখা উচিত, এই সমুদয় কর্মের উদ্দেশ্য—মনের

ভিতর পূর্ব হইতে যে শক্তি রহিয়াছে, তাহাকে প্রকাশ করা—
আত্মার জাগরণ । প্রত্যেক মনুষ্যের ভিতরে এই শক্তি রহিয়াছে
এবং জ্ঞানও রহিয়াছে । এই সকল বিভিন্ন কর্ম যেন উহাকে
প্রকাশ করিবার জন্য—ঐ দৈত্যকে জাগরিত করিবার জন্য—
যাতস্বরূপ ।

মানুষ নানা অভিসন্ধিতে কার্য্য করিয়া থাকে । কোন অভি-
সন্ধি ব্যতীত কার্য্য হইতেই পারে না । কোন কোন লোক যশ
চাহে ; তাহারা যশের জন্য কার্য্য করে । অপর কেহ কেহ অর্থ
চাহে ; তাহারা অর্থের জন্য কার্য্য করে । অপর কেহ কেহ প্রভুত্ব
চাহে ; তাহারা প্রভুত্বলাভের জন্য কার্য্য করে । অপরে স্বর্গে
যাইতে চাহে ; তাহারা স্বর্গে যাইবার জন্য কার্য্য করে । অপরে
আবার মৃত্যুর পর আপনার নাম রাখিয়া যাইতে চাহে ; চীনদেশে
এইরূপ হইয়া থাকে—সেখানে না মরিলে কোন উপাধি দেওয়া
হয় না ; বিচার করিয়া দেখিলে এই প্রথা আমাদের অপেক্ষা ভাল
বলিতে হইবে । কোন লোক খুব ভাল কায় করিলে, তাহার মৃত
পিতা বা পিতামহকে কোন মাননীয় উপাধি প্রদান করা হয় ।
কতকগুলি মুসলমান সম্প্রদায় সমস্ত জীবন, কেবল মৃত্যুর পর
একটি প্রকাণ্ড সমাধি-মন্দিরে সমাহিত হইবার জন্য, কার্য্য করিয়া
থাকে । আমি এমন কয়েকটি সম্প্রদায়ের কথা জানি, যাহাদের
ভিতরে শিশু জন্মিবামাত্র তাহার জন্য সমাধি-মন্দির নির্মিত
হইতে থাকে । ইহাই তাহাদের বিবেচনায় মানুষের সর্ব্বোচ্চ
কর্ম্ম ; ঐ সমাধি-মন্দির যত বৃহৎ ও সুন্দর হয়, সেই ব্যক্তি ততই

সুখী বলিয়া বিবেচিত হয় । কেহ কেহ আবার প্রায়শ্চিত্তস্বরূপে কন্ম করিয়া থাকেন ; যত প্রকার অসৎ কার্য্য সব করিয়া শেষে একটা মন্দির প্রতিষ্ঠা করিলেন ; অথবা পুরোহিতগণকে কিনিয়া লইবার জন্য ও তাঁহাদের নিকট হইতে স্বর্গে যাইবার ছাড় পাইবার জন্য, কিছু তাঁহাদিগকে দিলেন । তাঁহারা মনে করেন, ইহাতেই তাঁহাদের রাস্তা পরিষ্কার হইল, ইহাতেই তাঁহারা নির্বিঘ্নে চলিয়া যাইবেন । মানুষের কার্য্য-প্রবৃত্তির নিয়ামক এই সকল এবং এতদ্রূপ অনেক অভিসন্ধি আছে ।

এক্ষণে কার্য্যের জন্যই যে কার্য্য, তাহার আলোচনা করা যাউক । সকল দেশেই এমন কতকগুলি ব্যক্তি আছেন, যাহারা জগতের প্রকৃত সুসন্তান ; ইহারা কার্য্যের জন্যই কার্য্য করেন । ইহারা নাম-বশের কান্দালী নন, অথবা স্বর্গে যাইতেও চাহেন না । তাঁহারা কার্য্য করেন, কেবল উহাতে লোকের প্রকৃত উপকার হয় বলিয়া । আবার অপর কতকগুলি লোক আছেন, তাঁহারা আরও উচ্চতর অভিসন্ধি লইয়া দরিদ্রদিগের উপকার ও মনুষ্যজাতিকে সাহায্য করিতে অগ্রসর হন । তাঁহারা ঐ কার্য্য ভাল বলিয়া ও ঐ সৎ-কার্য্যকে ভালবাসেন বলিয়াই উহা করিয়া থাকেন । এক্ষণে পূর্ব্বোক্ত কার্য্য-প্রবৃত্তির নিয়ামক অভিসন্ধিগুলি সম্বন্ধে বিচার করা যাউক । প্রথমে নাম বশ সম্বন্ধে আলোচনা করা যাউক । এই নামবশের চেষ্টায় সচরাচর তৎক্ষণাৎ ফল পাওয়া যায় না । ইহারা সচরাচর আমাদিগের নিকট উপস্থিত হয়, যখন আমরা বৃদ্ধ হই, যখন আমাদের জীবন প্রায় শেষ হইয়া আসিয়াছে । কিন্তু

যদি কোন ব্যক্তি কোন স্বার্থপূর্ণ-উদ্দেশ্য-বিরহিত হইয়া কার্য্য করে, তাহার কি হয় ? সে কি কিছু লাভ করে না ? হাঁ, সেই সর্ব্বাপেক্ষা অধিক লাভবান হয়। নিঃস্বার্থপরতাতেই অধিক লাভ আছে, কেবল লোকের উহা অভ্যাস করিবার জন্য সহিষ্ণুতা নাই। সাংসারিক হিসাবেও ইহা খুব লাভজনক। প্রেম, সত্য, নিঃস্বার্থ-পরতা—এগুলি নীতি-সম্বন্ধীয় আলাঙ্কারিক বর্ণনা নহে, উহার আমাদের সর্ব্বোচ্চ আদর্শ, কারণ, উহার শক্তির মহান-বিকাশ-স্বরূপ। প্রথমতঃ, যে ব্যক্তি পাঁচ দিন অথবা পাঁচ মিনিট কোন-রূপ স্বার্থাভিসন্ধি-শূন্য হইয়া, ভবিষ্যতের কোন উদ্দেশ্য না রাখিয়া বা স্বর্গলাভাকাঙ্ক্ষা হৃদয়ে পোষণ না করিয়া বা কোনরূপ শাস্তির ভয়ে ভীত না হইয়া অথবা ঐরূপ কোন বিষয় চিন্তা না করিয়া কার্য্য করিতে পারেন, তিনি মহাপুরুষ হইয়া যান। ইহা কার্য্যে পরিণত করা অতি কঠিন। আমাদের অন্তরের অন্তঃস্থলে আমরা উহার মূল্য এবং উহা কি মহান শুভ প্রসব করে, তাহা জানি। উহা শক্তির মহোচ্চ বিকাশ-স্বরূপ—উহাতে প্রবল সংযমের প্রয়োজন। সমুদয় বহিস্মুখী কার্য্য অপেক্ষা এই সংযম অধিক-তর শক্তির প্রকাশ। চতুরশ্ববাহিত শকট কোন প্রকার প্রতি-রোধ-শূন্য হইয়া পাহাড়ে গড়াইয়া নীচে চলিয়া যাইতে পারে, অথবা শকটবান্ অশ্বগণকে সংযম করিতে পারেন। ইহাদের মধ্যে কোনটী অধিকতর শক্তির বিকাশ ? অশ্বগণকে ছাড়িয়া দেওয়া বা উহাদিগকে সংযম করা ? একটী বল্ বায়ুর মধ্য দিয়া উড়িয়া গিয়া অনেক দূরে যাইয়া পড়িতে পারে ; অপরটী দেয়ালে লাগিয়া গিয়া

বেশী দূর বাইতে পারিল না, কিন্তু তাহাতে প্রবল তেজ উৎপন্ন হইল । এইরূপে, মনের এই সমুদয় বহিস্মুখী গতি স্বার্থাভিসন্ধির দিকে ধাবিত হওয়াতে উহারা আর তোমার নিকট ফিরিয়া আসিয়া তোমার শক্তিবিকাশে সাহায্য করে না, কিন্তু উহাদিগকে সংযত করিলে তোমার শক্তি বর্দ্ধিত হইবে । সংযম হইতে মহান্ ইচ্ছা-শক্তি উৎপন্ন হইবে ; উহা এমন এক চরিত্র সৃষ্টি করিবে, যাহা ইঞ্জিতে জগৎকে পরিচালন করিতে পারে । অজ্ঞ লোকে এই রহস্য জানে না, তাহারা জগতের উপর প্রভুত্ব করিতে চায় । নির্বেবাধ লোকে জানে না যে, সে যদি কিছু দিন অপেক্ষা করে, সে সমুদয় জগৎ শাসন করিতে পারে । কিছু দিন অপেক্ষা কর, এই অজ্ঞানস্থলভ জগৎশাসনের ভাবকে সংযম কর, ঐ ভাব সম্পূর্ণ চলিয়া গেলেই তুমি জগৎ শাসন করিতে পারিবে । মানুষে সামান্য দুইচার টাকা লাভের আশায় ধাবিত হয় এবং উহা লাভের জগ্গ নিজ প্রতিবাসীকেও ঠকাইতে দ্বিধা বোধ করে না, কিন্তু যদি সে ঐ লোভটুকু সংযম করিতে পারে, কিছুদিনের মধ্যে তাহার চরিত্র এরূপ গঠিত হইবে যে, যদি সে লক্ষ টাকা চায়, তাহাও অনায়াসে লাভ করিতে পারিবে । কিন্তু আমরা কি নির্বেবাধ ! আমাদের মধ্যে অনেকেই, যেমন অনেক পশু কয়েক পদ অগ্রে কি আছে, তাহার কিছুই জানিতে পারে না, তদ্রূপ অল্প কয়েক বৎসর পরেই কি ঘটিবে, তাহার কিছুই অনুমান করিতে পারে না । আমরা যেন একটি ক্ষুদ্র বৃন্তের মধ্যে আবদ্ধ—আর উহাই আমাদের সমুদয় জগৎ । আমরা উহার অতীত আর কিছুই দেখিতে

পাই না এবং তজ্জন্মই অসাধু ও দুর্বৃত্ত হইয়া পড়ি। ইহা আমাদের দুর্বলতা—শক্তিহীনতা।

কিন্তু অতি সামান্য কৰ্ম্মকেও ঘৃণা করা উচিত নহে। যে স্বার্থপর অভিসন্ধি ব্যতীত অন্য কোন উচ্চতর অভিসন্ধিতে কার্য্য করিতে অক্ষম, সে স্বার্থপর অভিসন্ধিতেই—নাম যশের জন্মই—কার্য্য করুক। কিন্তু মানুষের সর্বদাই উচ্চ হইতে উচ্চতর অভিসন্ধিযুক্ত হইতে এবং ঐ অভিসন্ধিগুলি কি, তাহা বুঝিতে চেষ্টা করা উচিত। “কন্ম্বেই আমাদের অধিকার, ফলে নহে”—ফল যাহা হইবার হউক—উহার সহিত কোন সম্পর্ক রাখিও না। ফলের জন্ম কে আকাঙ্ক্ষা করে? কোন লোককে সাহায্য করিবার সময় সেই ব্যক্তির ভাব তোমার প্রতি কিরূপ হইবে, সে বিষয়ে মনে কোনরূপ চিন্তাকে স্থান দিও না। উহা বুঝিবার জন্ম চেষ্টা করিও না। তুমি যদি কোন মহৎ বা শুভ কার্য্য করিতে চাও, তবে ফলাফলের দিকে লক্ষ্য করিও না।

আবার এইরূপ কার্য্য সম্বন্ধে আর একটা কঠিন সমস্যা আসিয়া পড়ে। তীব্র কৰ্ম্মশীলতার প্রয়োজন; আমাদের সর্বদাই কৰ্ম্ম করিতে হইবে; আমরা এক মিনিটও কৰ্ম্ম না করিয়া থাকিতে পারি না। তবে মানুষের বিশ্রাম কোথায়? একদিকে কৰ্ম্ম—মহা জীবন-সংগ্রাম—সামাজিক জীবনের আবর্তে তীব্র ঘূর্ণন। আবার আর একটা চিত্র—সবই শান্তিময়—সবই যেন নিরুত্তি-উন্মুখ—চতুর্দিকে সব স্থির ধীর—কোনরূপ শব্দ-কোলাহল নাই বলিলেই হয়—কেবল প্রকৃতির শান্তিময় ছবি চতুর্দিকে। এই

দুইটীৰ কোনটাই সম্পূৰ্ণ চিত্ৰ নহে । কোন লোক এইৰূপ শান্তি-পূৰ্ণ স্থানে বাস কৰিলেন ; যখনই তিনি জগতৰ মহাবৰ্ত্তে পড়িবেন, তখনই তিনি একেবাৰে উহাতে ধ্বংস হইয়া যাইবেন ; যেমন গভীৰ-সমুদ্ৰ-তলবাসী মৎস্য সমুদ্ৰেৰ উপৰিদেশে আসিবা-মাত্ৰ খণ্ডবিখণ্ড হইয়া যায় ; কাৰণ জলৰ প্ৰবল চাপেই উহা জীৱিত অবস্থায় থাকিতে সমৰ্থ হইয়া থাকে । যে ব্যক্তি কেবল সাংসাৰিক ও সামাজিক জীৱনৰ কোলাহলেই অভ্যস্ত, সে কি কোন নিভৃত স্থানে বাস কৰিতে পাৰে ? একৰূপ চেফ্টায় তাহাকে শেষে বাতুলালয়ে যাইতে হয় । আদৰ্শ পুৰুষ তিনিই, যিনি গভীৰতম নিস্তৰ্কতাৰ মध्ये তীৱ কৰ্ম্মী এবং প্ৰবল কৰ্ম্মশীলতাৰ মध्ये মৰুভূমিৰ নিস্তৰ্কতা অনুভৱ কৰেন । তিনি সংযম-রহস্য বুঝিয়াছেন—আত্মসংযম কৰিয়াছেন । বাণিজ্যবহুল মহানগৰীতে ভ্ৰমণ কৰিলেও নিঃশব্দ গুহায় অবস্থিতৰ স্থায় তাঁহাৰ মন শান্ত থাকে, অথচ তাঁহাৰ মন তীৱভাবে কৰ্ম্ম কৰিতেছে । কৰ্ম্মযোগীৰ ইহাই আদৰ্শ । এই অবস্থা লাভ কৰিতে পাৰিলেই, তুমি কৰ্ম্মেৰ প্ৰকৃত রহস্যবিৎ হইলে ।

কিন্তু আমাদিগকে গোড়া হইতেই আৰম্ভ কৰিতে হইবে । আমাদেৰ সন্মুখে যেকৰূপ কৰ্ম্ম আসিবে, তাহাই কৰিতে হইবে এবং প্ৰত্যহ আমাদিগকে ক্ৰমশঃ একটু একটু কৰিয়া নিঃস্বার্থপৰতা শিক্ষা কৰিতে হইবে । আমাদিগকে কৰ্ম্ম কৰিতে হইবে এবং ঐ কৰ্ম্মেৰ পশ্চাতে কি অভিসন্ধি আছে, তাহা দেখিতে হইবে । তাহা হইলে প্ৰায় অধিকাংশ স্থলেই দেখিতে পাইব, প্ৰথম প্ৰথম আমা-

দের অভিসন্ধি স্বার্থপূর্ণই থাকে, কিন্তু অধ্যবসায়প্রভাবে ক্রমশঃ এই স্বার্থপরতা কমিয়া যাইবে। অবশেষে এমন সময় আসিবে, যখন আমরা মধ্যে মধ্যে নিঃস্বার্থ কৰ্ম্ম করিতে সমর্থ হইব। তখন আমাদের আশা হইবে যে, জীবনের পথে ক্রমশঃ অগ্রসর হইতে হইতে, কোন না কোন সময়ে এমন এক দিন আসিবে, যখন আমরা সম্পূর্ণ নিঃস্বার্থ হইতে পারিব। আর যে মুহূর্ত্তে আমরা ইহাতে সক্ষম হইব, সেই মুহূর্ত্তে আমাদের শক্তি এক-কেন্দ্রীভূত হইবে এবং আমাদের অভ্যন্তরস্থ জ্ঞান প্রকাশিত হইবে।

দ্বিতীয় অধ্যায় ।

স্ব স্ব কার্যক্ষেত্রে কেহই ছোট নহে ।

প্রকৃতি, সাংখ্য-মতে ত্রিগুণময়ী—সংস্কৃতভাষায় ঐ গুণত্রয়ের নাম সত্ত্ব, রজঃ, তমঃ । বাহু জগতে প্রকাশিত ঐ তিনটিকে আমরা যথাক্রমে আকর্ষণ, বিকর্ষণ ও ঐ উভয়ের সংযম, এই আখ্যায় অভিহিত করিতে পারি । সত্ত্ব—সংযমাত্মক, রজঃ—বিকর্ষণ এবং তমঃ—আকর্ষণ । তমঃ—অন্ধকার বা কর্মশূন্যতারূপে ব্যাখ্যাত । রজঃ—কর্মশীলতা ; প্রত্যেক পরমাণুই যেন আকর্ষক কেন্দ্র হইতে চলিয়া যাইবার চেষ্টা করিতেছে ; আর সত্ত্ব—ঐ দুইটির সাম্যাবস্থা—উভয়েরই সংযম ।

প্রত্যেক ব্যক্তিই এই উপাদানত্রয়নির্মিত । আমাদের সকলের ভিতরেই দেখিতে পাই, কখন তমঃ প্রবল হইল ; আমরা আলস্য-পরায়ণ হইলাম, আমরা যেন আর কোন দিকে নড়িতে পারি না ; নিষ্কর্মা হইয়া কতকগুলি ভাব-সমষ্টির দাস হইয়া পড়ি । আবার কখন কখন কর্মশীলতা প্রবল হইল ; অন্য সময়ে আবার উভয়টাই সংযত হইল—মনে শান্ত ভাব আসিল—ইহাই সত্ত্ব । আবার ভিন্ন ভিন্ন ব্যক্তিতে সচরাচর এই উপাদানত্রয়ের কোন কোনটির প্রাধান্য থাকে । একজন হয়ত কর্মশূন্যতা, আলস্য ও জড়ালক্ষণাবিশিষ্ট । অপরের প্রধান লক্ষণ—কর্মশীলতা ; শক্তি, মহাশক্তির বিকাশ আবার অপর পুরুষে আমরা শান্ত মৃদু মধুর

ভাব দেখিতে পাই ; উহা ঐ পূর্বোক্ত গুণ-দ্বয়ের অর্থাৎ কর্ম-শীলতা ও কর্মশূন্যতার সংযম বা সামঞ্জস্যস্বরূপ । এইরূপ সমুদয় স্বর্গজগতে—পশু, উদ্ভিদ, মানুষ সকলেই আমরা এই সকল বিভিন্ন উপাদানগুলির প্রতিক্রিয়া দেখিতে পাই ।

এই ত্রিবিধ উপাদান লইয়া কর্মযোগের বিশেষ কার্য্য । উহাদের স্বরূপ ও উহাদিগকে ব্যবহারের কৌশল শিক্ষা দিয়া কর্মযোগ আমাদেরকে ভালরূপে কর্ম করিবার শিক্ষা দেয় । মানবসমাজ একটা ক্রমনিবদ্ধ সংহতি-স্বরূপ । উহার অন্তর্গত ব্যক্তিগণ সকলেই যেন এক এক শ্রেণীবদ্ধ ও বিভিন্ন সোপানে অবস্থিত । আমরা সদাচার ও কর্তব্য কাহাকে বলে, সকলেই জানি, কিন্তু আবার দেখিতে পাই, বিভিন্ন দেশে এই সদাচারের ধারণা অত্যন্ত বিভিন্ন । একদেশে যাহা সদাচার বলিয়া বিবেচিত হয়, অপর দেশে হয়ত তাহা সম্পূর্ণ অসদাচার বলিয়া পরিগণিত । দৃষ্টান্তস্বরূপ দেখ—কোন কোন দেশে জাতি ভাই ভগিনীতে পরস্পর বিবাহ করিতে পারে, অপর দেশে আবার উহা অতিশয় সদাচারবিরুদ্ধ বলিয়া বিবেচিত হয় । কোন দেশে পুরুষে নিজ শালিকাকে বিবাহ করিতে পারে, অপর দেশে উহা সদাচারবিরুদ্ধ । কোন দেশে লোকে একবার মাত্র বিবাহ করিতে পারে, অপর দেশে অনেক বার । এইরূপে আমরা সদাচারের অগাধ বিভাগেও দেখিতে পাই যে, উহার আদর্শ বিভিন্ন দেশে অতিশয় বিভিন্ন । তথাপি আমাদের মনে ধারণা—সদাচারের একটা সার্ববৈশ্বিক আদর্শ আছে । কর্তব্য সম্বন্ধেও

এইরূপ। কর্তব্যের ধারণা বিভিন্ন জাতির মধ্যে অত্যন্ত ভিন্ন। কোন দেশে যদি কোন ব্যক্তি কার্য্যবিশেষ না করে, লোকে বলিবে, সে অগ্ৰায় করিয়াছে ; আবার অপর দেশে আবার ঠিক সেই কার্য্যগুলি করিলেই লোকে বলিবে, সে ঠিক করে নাই। তথাপি আমরা জানি কর্তব্যের অবশ্য একটা সার্বজনীন দিক আছে। এইরূপে, সমাজবিশেষ কার্য্যবিশেষকে তাহার কর্তব্য-মধ্যে পরিগণিত করে, অপর সমাজ আবার ঠিক ইহার বিপরীত মত পোষণ করে এবং উহাকে ভীতির চক্ষে দেখিয়া থাকে। এক্ষণে আমাদের দুইটি পথ খোলা। হয় অস্ত্র লোকের ধারায় বিশ্বাস কর, যাহারা মনে করে, সত্যলভের উপায় একমাত্র আর সব উপায় ভ্রমাত্মক, অথবা জ্ঞানীর পথ ধর, যিনি স্বীকার করেন—মানসিক গঠন অথবা আমরা সকলে যে সকল বিভিন্ন অবস্থায় অবস্থিত তাহার তারতম্য অনুসারে কর্তব্য ও সদাচার ভিন্ন ভিন্ন হইতে পারে। সুতরাং প্রধান জ্ঞাতব্য বিষয় এই যে, কর্তব্য ও সদাচারের বিভিন্ন ক্রম আছে ; এক অবস্থার পক্ষে যাহা কর্তব্য, অপর অবস্থায়, অন্যরূপ দেশকালপাত্র তাহা নহে।

নিম্নলিখিত উদাহরণটি দ্বারা এই তত্ত্ব উত্তমরূপে ব্যাখ্যাত হইতে পারে। সকল মহাপুরুষেরই উপদেশ—অশুভের প্রতীকার চেষ্টা করিও না, অশুভের অপ্রতীকারই সর্বোচ্চ আদর্শ। আমরা সকলেই জানি, যদি আমরা জনকয়েকও ইহা কার্য্যে পরিণত করিতে চেষ্টা করি, সমুদয় সমাজ-বন্ধন ছিন্ন হইয়া যাইবে—সমাজের বিনাশ-দশা সমুপস্থিত

হইবে, দুষ্ক লোকের হস্তে আমাদের সম্পত্তি ও জীবন বাইবে; তাহারা আমাদের উপর বাহা ইচ্ছা, তাহাই করিবে। একদিনও এইরূপ অপ্রতীকার-ধর্ম কার্যে পরিণত করিলে, সমাজের সম্পূর্ণ ধ্বংস হইবে। তথাপি আমরা প্রাণে প্রাণে, অন্তরে অন্তরে “অপ্রতীকার”রূপ উপদেশের সত্যতা উপলব্ধি করিয়া থাকি। আমরা উহাকে সর্বোচ্চ আদর্শ বলিয়া বিবেচনা করি; কিন্তু কেবলমাত্র ঐ মত প্রচার করিলে অসংখ্য মানবকে অগ্নায়-কর্মী বলিয়া নিন্দা করা হইল। শুধু তাহাই নহে, উহাতে মানুষের মনে সর্বদাই বোধ হইবে যে, সে সর্বদাই অগ্নায় করিতেছে, সুতরাং তাহার সকল কার্যেই মনে খুঁত খুঁত করিবে। ইহাতে তাহার মনকে দুর্বল করিয়া দিবে, আর এইরূপ প্রতিনিয়ত আত্মগ্লানি অগ্নায় দুর্বলতা হইতে অধিক পাপ প্রসব করিবে। যে ব্যক্তি আপনাকে ঘৃণা করিতে আরম্ভ করিয়াছে, তাহার পক্ষে অবনতির দ্বার উদ্ঘাটিত হইয়াছে। জাতি-সম্বন্ধেও এই কথা।

আমাদের প্রথম কর্তব্য—আপনাকে ঘৃণা না করা। উন্নত হইতে হইলে প্রথম নিজের প্রতি, তার পর ঈশ্বরের প্রতি বিশ্বাস আবশ্যিক। যাহার নিজের প্রতি বিশ্বাস নাই, তাহার ঈশ্বরের প্রতি কখনই বিশ্বাস আসিতেই পারে না। তাহা হইলে ‘কর্তব্য ও সদাচার অবস্থাভেদে ভিন্ন ভিন্ন,’ ইহা স্বীকার করা ব্যতীত আমাদের আর গত্যন্তর নাই। অগ্নায়ের প্রতীকার করিলেই যে তাহা অগ্নায় হইল, তাহা নহে। সে যেরূপ অবস্থায় পড়িয়াছে, তাহাতে প্রতীকার করা তাহার কর্তব্য হইতে পারে।

পাশ্চাত্য প্রদেশের আপনারা অনেকে, ভগবদগীতার প্রথম-
 ধ্যায়—(যেখানে অৰ্জুন, তাঁহার বিপক্ষগণ তাঁহার আত্মীয় ও বন্ধু
 বান্ধব বলিয়া এবং অহিংসাই পরম ধর্ম বলিয়া যুদ্ধে অনিচ্ছা
 প্রকাশ করিলে, শ্রীকৃষ্ণ তাঁহাকে কাপুরুষ ও কপটী বলিতেছেন,)
 পাঠ করিয়া হয়ত আশ্চর্য্য হইয়াছেন। এইটাই একটি প্রধান বুঝিবার
 বিষয় যে, কোন বিষয়ের দুই চরম বিপরীত প্রাপ্ত দেখিতে একই
 প্রকার। চূড়ান্ত ‘অস্তি’ ও চূড়ান্ত ‘নাস্তি’ সকল সময়েই সদৃশ।
 আলোককম্পনের অতি মৃদুতায় উহা আমাদের দৃষ্টিগোচর হয় না,
 অতি দ্রুত কম্পনেও তদ্রূপ। শব্দ সম্বন্ধেও তদ্রূপ; অতি মৃদু
 হইলেও উহা শুনা যায় না, অতি উচ্চ হইলেও শুনা যায় না।
 ‘প্রতীকার’ ও ‘অপ্রতীকারে’ এইরূপ প্রভেদ। একজন লোক
 কোন অত্যাচার প্রতীকার করে না, কারণ, সে দুর্বল, অলস ও
 প্রতীকারে অক্ষম; প্রতীকারের ইচ্ছা নাই বলিয়া প্রতীকার করে
 না, নহে। আর একজন জানেন, ইচ্ছা করিলে তিনি দুর্দমনীয়
 আঘাত প্রদান করিতে পারেন, তথাপি তিনি যে শুদ্ধ আঘাত
 করেন না, তাহা নহে, বরং শত্রুকে আশীর্ব্বাদ করেন। যে
 ব্যক্তি দুর্বলতাবশতঃ ‘প্রতীকার’ করে না, সে পাতকগ্রস্ত হয়,
 স্মরণ্য তাহার এই ‘অপ্রতীকার’ হইতে কোন উপকার লাভ
 করিতে পারে না। অপর ব্যক্তি আবার প্রতীকার করিয়া পাপ
 সঞ্চয় করে। বুদ্ধ নিজ সিংহাসন ও রাজপদ ত্যাগ করিলেন,
 ইহা প্রকৃত ত্যাগ বটে, কিন্তু যাহার ত্যাগ করিবার কিছুই নাই,
 এমন ভিক্ষুকের পক্ষে ত্যাগের কোন কথা আসিতে পারে না।

অতএব এই ‘অপ্রতীকার’ ও ‘আদর্শ প্রেমের’ কথা বলিবার সময় আমরা প্রকৃত পক্ষে কোন্ বিষয়টাকে লক্ষ্য করিতেছি, সেই দিকে বিশেষ ভাবে দৃষ্টি রাখা আবশ্যিক। আগে বিশেষ করিয়া লক্ষ্য করিয়া দেখা উচিত, আমাদের প্রতীকারের শক্তি আছে কি না। তার পর যদি আমাদের শক্তি সত্ত্বেও প্রতীকার-চেষ্টা-শূন্য হই, তবে আমরা মহৎ কর্ম করিতেছি বটে; কিন্তু যদি আমাদের প্রতীকারের শক্তি না থাকে, আর যদি আপনার মনকে আপনি বুঝাইবার চেষ্টা করি যে, আমরা অতি উচ্চ প্রেমের প্রেরণায় কার্য করিতেছি, তবে আমরা ঠিক উহার বিপরীত করিতেছি, বুঝিতে হইবে। অর্জুনও এইরূপে, তাঁহার বিপক্ষে প্রবল সৈন্যবৃহৎ সম্বিষ্ট দেখিয়া ভীত হইয়াছিলেন। তাঁহার ‘ভাল-বাসা’ তাঁহার দেশের প্রতি ও রাজার প্রতি কর্তব্য ভুলাইয়া দিয়াছিল। এই জন্যই কৃষ্ণ তাঁহাকে ভণ্ড বলিয়াছিলেন। “অশৌচ্যান্নশোচন্তুং প্রজ্ঞাবাদাংশ্চ ভাষসে।” “তস্মাদ্ভুক্তিষ্ঠ কৌন্তেয় যুদ্ধায় কৃতনিশ্চয়ঃ।” “তুমি শোকের অযোগ্য ব্যক্তিদিগের জন্য শোক করিতেছ, অথচ পণ্ডিতের মত কথা বলিতেছ।” “অতএব, তুমি যুদ্ধের জন্য কৃত-নিশ্চয় হইয়া উঠ।”

কর্মযোগীর এই ভাব। কর্মযোগী জানেন, আমাদের সর্বোচ্চ আদর্শ—এই অপ্রতীকার; তিনি আরও জানেন যে, উহা শক্তির উচ্চতম বিকাশ, আর ‘অন্যায়ের প্রতীকার’ কেবল ‘অপ্রতীকার’রূপ শ্রেষ্ঠতম শক্তিলভের সোপানমাত্র। এই সর্বোচ্চ আদর্শে উপনীত হইবার পূর্বে ‘প্রতীকার’ করা তাঁহার

কৰ্তব্য । তাঁহাকে কাৰ্য্য কৰিতে হইবে, প্রতিদ্বন্দ্বিতা কৰিতে হইবে, যতদূর সাধ্য উত্তম প্রকাশ করিয়া প্রতিদ্বন্দ্বিতা কৰিতে হইবে । যখন তিনি এই প্রতীকারের শক্তি লাভ করিবেন, তখনই অপ্রতীকার তাঁহার পক্ষে ধৰ্ম্ম বলিয়া গণ্য হইবে ।

আমাদের দেশে একটা লোকের সহিত আমার একবার সাক্ষাৎ হয়—তাহাকে আমি পূর্ব হইতেই অতিশয় অলস, নির্বোধ ও অজ্ঞ বলিয়া জানিতাম । তাহার জ্ঞানলাভেরও কিছু আগ্রহ ছিল না—সে পশুর ন্যায় জীবন যাপন করিতেছিল । আমার সহিত দেখা হইলে সে আমাকে জিজ্ঞাসা করিল, “ব্রহ্মজ্ঞানলাভের জন্য আমাকে কি কৰিতে হইবে, আমি কি উপায়ে মুক্ত হইব ?” আমি তাহাকে জিজ্ঞাসিলাম, ‘তুমি মিথ্যা কথা কহিতে পার কি ?’ সে বলিল, ‘না ।’ তখন আমি বলিলাম, ‘তবে তোমার মিথ্যা কহিতে শিখিতে হইবে । একটা পশুর মত বা কাষ্ঠ লোষ্ট্রের মত জড়বৎ জীবন-যাপন অপেক্ষা মিথ্যা কথা বলা ভাল । তুমি অকৰ্ম্মণ্য—নিষ্ক্রিয় অবস্থা—যে অবস্থায় মন সম্পূর্ণ শান্তভাবে বলম্বন করে, ও যাহা সর্ব্বশ্রেষ্ঠ অবস্থা, তাহা অবশ্য তোমার লাভ হয় নাই । তুমি এতদূর জড়প্রকৃতি যে, তোমার একটা অন্যায় আজ করিবারও ক্ষমতা নাই ।’ অবশ্য যে লোকটার কাৰ্য্য বলিতেছি, সে লোকটার মত তামসিক প্রকৃতির লোক সচরাচর দেখা যায় না, আর আমি তাহার সহিত উপহাস কৰিতেছিলাম, কিন্তু আমার ভাব ছিল এই যে, সম্পূর্ণ নিষ্ক্রিয় অবস্থা বা শান্তভাবে লাভ কৰিতে হইলে তাহাকে কৰ্ম্মশীলতার মধ্য দিয়া যাইতে হইবে ।

আলস্কে সর্ব প্রকারেই ত্যাগ করিতে হইবে । ক্রিয়াশীলতা অর্থে সর্বদাই প্রতীকার বুঝাইয়া থাকে । সর্বপ্রকার মানসিক ও শারীরিক দুর্বলতার প্রতীকার কর ; যখন তুমি ইহাতে কৃতকার্য হইবে, তখনই শান্তি আসিবে । ইহা বলা অতি সহজ,— “কাহাকেও ঘৃণা করিও না, কোন অমঙ্গলের প্রতীকার করিও না” কিন্তু কার্যকালে ইহা কতদূর দাঁড়ায়, তাহা ত আমরা জানি । যখন সমুদয় সমাজের চক্ষু আমাদের দিকে পড়ে, তখন আমরা ‘অপ্রতীকারের’ ভাব দেখাইতে পারি, কিন্তু বাসনা দিবারাত্র দূষিত ক্ষতের ন্যায় আমাদের শরীরকে ক্ষয় করিতে থাকে । যথার্থ অপ্রতীকারের ভাব আসিলে প্রাণে যে শান্তি অনুভব হয়, আমরা তাহার সম্পূর্ণ অভাব অনুভব করি, মনে হয়, প্রতীকার করাই ভাল । তোমার অন্তরে যদি ঐশ্বর্যের বাসনা থাকে, আর যদি তোমার জানা থাকে যে, সমুদয় জগৎ তোমাকে বলিবে, ঐশ্বর্য-কামী পুরুষ অসৎ লোক, তবে তুমি হয়ত ঐশ্বর্য-অন্বেষণে প্রাণ-পণ চেষ্টা করিতে সাহসী না হইতে পার, কিন্তু তোমার মন দিবা-নিশি অর্থের দিকে দৌড়িতেছে । ইহা কপটতামাত্র, ইহাতে কোন কার্য হয় না । সংসারসমুদ্রে ঝাঁপ দাও, কিছুদিন পরে যখন সংসারে যাহা কিছু আছে ভোগ করিয়া শেষ করিবে, তখনই বৈরাগ্য আসিবে, তখনই শান্তি আসিবে । অতএব প্রভুত্ব লাভের বাসনা এবং অন্য যাহা কিছু বাসনা আছে, সমুদয় অগ্রে পূরণ করিয়া লও ; তার পর এই সকল বাসনা পরিপূর্ণ হইলে এমন এক সময় আসিবে, যখন জানিতে পারিবে, এগুলি অতি

ক্ষুদ্র জিনিষ । কিন্তু যতদিন না তুমি বাসনা পূরণ করিতেছ, যতদিন না তুমি এই ক্রিয়াশীলতার মধ্য দিয়া যাইতেছ, ততদিন তোমার পক্ষে এই শান্ত্যাব লাভ করা অসম্ভব । এই অহিংসা-তত্ত্ব সহস্র সহস্র বৎসর ধরিয়া প্রচারিত হইয়া আসিতেছে ; জাত ব্যক্তিমাতেই বাল্যকাল হইতেই ইহা শুনিয়া আসিতেছে ; তথাপি জগতে ঐ অবস্থাপ্রাপ্ত লোক খুব কম দেখিতে পাই । আমি ত পৃথিবীর অর্দ্ধাংশের উপর ঘুরিয়া বেড়াইলাম ; কিন্তু আমি আমার জীবনে কুড়িটা যথার্থ শান্ত্যপ্রকৃতি ও অহিংসক ব্যক্তি দেখিয়াছি কি না সন্দেহ ।

প্রত্যেক ব্যক্তির কর্তব্য—নিজের নিজের আদর্শ লইয়া তাহাই জীবনে পরিণত করিতে চেষ্টা করা । অপর ব্যক্তির আদর্শ লইয়া তদনুসারে চরিত্র-গঠনের চেষ্টা হইতে উন্নতি-লাভে কৃতকার্য হইবার ইহা অপেক্ষাকৃত নিশ্চিত উপায় । অপরের আদর্শ হয়ত তিনি জীবনে কখনই পরিণত করিতে সমর্থ হইবেন না । মনে কর, আমরা একটা শিশুকে একেবারে কুড়ি মাইল ভ্রমণ করিতে বলিলাম । শিশুটা হয় মরিয়া যাইবে, না হয়, সহস্রে একজন ঐ কুড়ি মাইল কক্ষে স্ফেট হামাগুড়ি দিয়া যাইবে—শেষে অবসন্ন ও অর্দ্ধমৃত অবস্থায় গন্তব্য স্থানে পঁহুছিবে । আমরাও সচরাচর লোকের প্রতি এই-রূপ করিতে গিয়া থাকি । কোন সমাজের সকল নরনারী এক-রূপ মন বা শক্তিবিশিষ্ট নহে, অথবা কোন বিষয় বুঝিবার সকলের একরূপ শক্তি নাই । তাহাদের প্রত্যেকেরই আদর্শ

অবশ্য ভিন্ন ভিন্ন থাকা উচিত, আর এই আদর্শগুলির কোনটাকেই উপহাস করিবার অধিকার আমাদের নাই। প্রত্যেকেই নিজ নিজ আদর্শে পঁহুছিবার জন্য যতদূর পারে করুক। আমাকে তোমার বা তোমাকে আমার আদর্শের দ্বারা বিচার করা ঠিক নহে। ওক বৃক্ষের আদর্শে আপেল বা আপেল বৃক্ষের আদর্শে ওক বৃক্ষকে বিচার করা উচিত নহে। আপেল বৃক্ষকে বিচার করিতে হইলে আপেলের, এবং ওক বৃক্ষকে বিচার করিতে হইলে ওকের নমুনা লইয়া বিচার করা আবশ্যিক। এইরূপ আমাদের সকলের সম্বন্ধে বুঝিতে হইবে।

বহুত্বের মধ্যে একত্বই সৃষ্টির ক্রম। নরনারীর প্রত্যেকের মধ্যে ব্যক্তিগত প্রভেদ যতই থাকুক না কেন, পশ্চাতে সেই একত্ব রহিয়াছে। আর বিভিন্নচরিত্র নরনারীর শ্রেণী সৃষ্টিনিয়মের স্বাভাবিক বিভিন্নতামাত্র। এই কারণেই এক প্রকার আদর্শের দ্বারা সকলের বিচার করা, বা সকলের সম্মুখে এক প্রকারের আদর্শ স্থাপন করা, কোন মতেই উচিত নয়। এইরূপ প্রণালীতে কেবল অস্বাভাবিক চেষ্টার উদ্বেক হয় মাত্র। তাহার ফল এই দাঁড়ায় যে, মানুষ আপনাকে ঘৃণা করিতে আরম্ভ করে, আর তাহার ধার্মিক ও সাধু হইবার বিশেষ বিঘ্ন হয়। আমাদের কর্তব্য—প্রত্যেক ব্যক্তিকে তাহার নিজের সর্বোচ্চ আদর্শ অনুসারে চলিবার চেষ্টা করিতে উৎসাহিত করা এবং ঐ আদর্শ, সত্যের যত নিকটবর্তী হয়, তাহার চেষ্টা করা।

হিন্দুধর্মনীতিতে আমরা দেখিতে পাই, অতি প্রাচীন কাল

হইতেই এই তত্ত্বটি পরিগৃহীত হইয়াছে, আর তাঁহাদের শাস্ত্রে ও ‘ধর্ম্মনীতি’বিষয়ক পুস্তকে ব্রহ্মচর্যা, গার্হস্থ্য, বানপ্রস্থ, সন্ন্যাস এই সকল বিভিন্ন আশ্রমের জন্য বিভিন্নরূপ বিধি দেওয়া হইয়াছে ।

হিন্দুশাস্ত্রমতে, মানবসাধারণ ধর্ম্ম ব্যতীত প্রত্যেক ব্যক্তির জীবনে বিশেষ বিশেষ কর্তব্য আছে ; হিন্দুকে প্রথমে ব্রহ্মচর্যাশ্রম বা ছাত্রজীবন অবলম্বন করিতে হয় । তার পর তিনি বিবাহ করিয়া গৃহী হইয়া থাকেন । বৃদ্ধাবস্থায় গৃহস্থাশ্রম হইতে অবসর গ্রহণ করিয়া তিনি বানপ্রস্থ ধর্ম্মাবলম্বন করেন, সর্ববশেষে তিনি সংসার ত্যাগ করিয়া সন্ন্যাসী হন ।

এইরূপ বিভিন্ন আশ্রম অনুসারে জীবনের প্রত্যেক বিভাগে বিভিন্নরূপ কর্তব্য উপদিষ্ট হইয়াছে । এই আশ্রমগুলির মধ্যে কোনটাই অপরটি হইতে শ্রেষ্ঠ নহে । যিনি বিবাহ না করিয়া ধর্ম্মকার্যের জন্য জীবন উৎসর্গ করিয়াছেন, তাঁহার জীবন যতদূর শ্রেষ্ঠ, বিবাহিত ব্যক্তির জীবন তদপেক্ষা কিঞ্চিৎ ন্যূন নহে । সিংহাসনারূঢ় রাজা যেরূপ শ্রেষ্ঠ ও মান্য, একজন পথধূলিপরিষ্কারকও তদ্রূপ । রাজাকে তাঁহার রাজসিংহাসন হইতে উঠাইয়া তাঁহাকে ঝাড়ুদারের কায করাও, দেখ, তিনি কি করেন । আবার ঝাড়ুদারকে লইয়া সিংহাসনে বসাইয়া দাও, দেখ, সেই বা কিরূপ রাজকার্য্য করে । “সংসারী হইতে সন্ন্যাসী শ্রেষ্ঠ” বলা বৃথামাত্র । সংসার হইতে স্বতন্ত্র থাকিয়া স্বাধীন সহজ জীবনযাপনাপেক্ষা সংসারে থাকিয়া ঈশ্বরোপাসনা

করা কঠিন । ভারতে বিভিন্ন আশ্রমগুলিকে কমাইয়া আজ কাল কেবল দুটি আশ্রমের বিধান দেওয়া হইয়াছে—গৃহস্থাশ্রম ও সন্ন্যাসাশ্রম—সন্ন্যাসী অর্থে ধর্ম্যাচার্য্য । গৃহস্থ বিবাহ করেন এবং সামাজিকের কর্তব্য করিয়া যান, আর সংসার-ত্যাগীর কর্তব্য—তঁাহার সমুদয় শক্তি কেবল ধর্ম্মের দিকে দেওয়া । তিনি কেবল ঈশ্বরোপাসনা করিবেন ও ধর্ম্ম শিক্ষা দিবেন ।

এক্ষণে তোমরা বুঝিবে, কোন্ আশ্রম কঠিন । আমি মহানির্ব্বাণ-তন্ত্র হইতে গৃহস্থের কর্তব্য-সম্বন্ধে উপদেশগুলি পড়িব—ঐ গুলি শুনিলে তোমরা দেখিবে, গৃহস্থ হওয়া ও গৃহস্থের কর্তব্য যথাযথ ভাবে প্রতিপালন করা বড় কঠিন ।

ব্রহ্মনিষ্ঠো গৃহস্থঃ স্মৃৎ ব্রহ্মজ্ঞানপরায়ণঃ ।

যদ্যৎ কস্মি প্রকুব্বীত তদব্রহ্মণি সমর্পয়েৎ ॥

মহানির্ব্বাণ তন্ত্র, ৮ম উল্লাস, ২৩ শ্লোক ।

গৃহস্থ ব্যক্তি ব্রহ্মনিষ্ঠ হইবেন । ব্রহ্মজ্ঞানলাভই যেন তাঁহার জীবনের চরম লক্ষ্য হয় । তথাপি তাঁহাকে সর্ব্বদা কস্মি করিতে হইবে, তাঁহার নিজের সমুদয় কর্তব্য সাধন করিতে হইবে । তিনি যাহা যাহা করিবেন, তাহাই ব্রহ্মে সমর্পণ করিতে হইবে ।

কস্মি করা অথচ ফলাকাঙ্ক্ষা না করা, লোককে সাহায্য করা অথচ এটি না ভাবা যে, তাহার তোমার প্রতি কৃতজ্ঞ হওয়া উচিত, সৎ কস্মি করা অথচ উহাতে তোমার নাম যশ হইল বা না হইল, এ বিষয়ে একেবারে লক্ষ্য না করা—এইটাই

এই জগতে সৰ্বাপেক্ষা কঠিন ব্যাপার । জগতের লোক যখন প্রশংসা করিতে আরম্ভ করে, তখন অতি ঘোর কাপুরুষও সাহসী হয় । সমাজের অনুমোদন ও প্রশংসা পাইলে অতি আহাম্মক ব্যক্তিও বীরোচিত কার্যসকল করিতে পারে, কিন্তু নিজ প্রতিবাসীদের স্তুতি প্রশংসা না চাহিয়া অথবা সে দিকে লক্ষ্য না করিয়া সৰ্বদা সংকার্য্য করাই প্রকৃত পক্ষে সৰ্ব্বশ্রেষ্ঠ স্বার্থত্যাগ ।

ন মিথ্যাভাষণং কুর্যাৎ ন চ শাঠ্যং সমাচরেৎ ।

দেবতাতিথিপূজাস্থ গৃহস্থো নিরতো ভবেৎ ॥

ঐ, ২৪ ।

গৃহস্থের প্রধান কর্তব্য—জীবিকার্জন, কিন্তু তাঁহাকে বিশেষ লক্ষ্য রাখিতে হইবে, যেন মিথ্যা কথা কহিয়া অথবা প্রতারণা দ্বারা অথবা চুরি করিয়া উহা সংগ্রহ না করেন । আরও তাহাকে স্মরণ রাখিতে হইবে যে, তাঁহার জীবন ঈশ্বরের সেবার জন্য, তাঁহার জীবন দরিদ্র ও অভাবগ্রস্তদিগের সেবার জন্য ।

মাতরং পিতরঞ্চৈব সাক্ষাৎ প্রত্যক্ষদেবতাং ।

মন্ত্ৰা গৃহী নিষেবেত সদা সৰ্ব্বপ্রযত্নতঃ ॥ ঐ, ২৫ ।

মাতা ও পিতাকে প্রত্যক্ষ দেবতাস্বরূপ জানিয়া গৃহী ব্যক্তি সৰ্বদা সৰ্ব্বপ্রযত্নে তাঁহাদের সেবা করিবেন ।

তুষ্টিয়াং মাতরি শিবে তুষ্টে পিতরি পার্বতি ।

তব প্রীতিৰ্ভবেদেবি পরব্রহ্ম প্রসীদতি ॥

ঐ, ২৬ ।

যদি মাতা ও পিতা তুষ্ট থাকেন, তবে সেই ব্যক্তির প্রতি
পরব্রহ্ম প্রীত হন ।

ঔদ্ধত্যং পরিহাসঞ্চ তর্জ্জনং পরিভাষণং ।

পিত্রোরগ্রে ন কুবর্বীত বদীচ্ছেদাত্মনো হিতম্ ॥

মাতরং পিতরং বীক্ষ্য নত্বোত্তীর্ণং সুসম্ভ্রমঃ ।

বিনাশ্তয়া নোপরিশেৎ সংস্থিতঃ পিতৃশাসনে ॥

ঐ, ৩০, ৩১ ।

পিতামাতার সম্মুখে ঔদ্ধত্য, পরিহাস, চঞ্চলতা ও ক্রোধ
প্রকাশ করিবেন না । যে সন্তান পিতামাতাকে কখন কৰ্কশ কথা
না বলেন, তিনি প্রকৃতপক্ষেই সংসন্তান । পিতামাতাকে দর্শন
করিয়া সসম্ভ্রমে প্রণাম করিবেন । তাঁহাদের সম্মুখে দাঁড়াইয়া
থাকিবেন, আর যতক্ষণ না তাঁহারা বসিতে অনুমতি করেন,
ততক্ষণ বসিবেন না ।

মাতরং পিতরং পুত্রং দারানতিথিসোদরান্ ।

হিত্বা গৃহী ন ভুঞ্জীয়াৎ প্রাণৈঃ কণ্ঠগতৈরপি ।

বঞ্চয়িত্বা গুরুন্ বন্ধুন্ যো ভুঙ্ক্তে শ্বোদরন্তরং ।

ইহৈব লোকে গর্হ্যোহসৌ পরত্র নারকী ভবেৎ ॥

ঐ, ৩৩, ৩৪ ।

মাতা, পিতা, পুত্র, পত্নী, ভ্রাতা, অতিথিকে ভোজন না করাইয়া
যে গৃহী ব্যক্তি নিজের উদর পূরণ করেন, তিনি পাপ করিতেছেন ।

জনন্যা বর্দ্ধিতো দেহঃ জনকেন প্রয়োজিতঃ ।

স্বজনৈঃ শিক্ষিতঃ প্রীত্যা সোহধমস্তান্ পরিত্যজেৎ ॥

এষামর্থো মহেশানি কৃতা কষ্টশাতাশ্চপি ।

প্রীগয়েৎ সততং শক্ত্যা ধর্মো হ্যেব সনাতনঃ ॥

ঐ, ৩৬, ৩৭ ।

পিতামাতা হইতেই এই শরীর উৎপন্ন হইয়াছে, অতএব শত
শত কষ্ট স্বীকার করিরাও ইহাদের প্রীতি সাধন করা উচিত ।

ন ভার্য্যান্তাডয়েৎ ক্বাপি মাতৃবৎ পালয়েৎ সদা ।

ন ত্যজেৎ ঘোরকর্মেহপি যদি সাধ্বী পতিব্রতা ॥ ৩৯

স্থিতেষু স্বীয়দারেষু স্থিয়মগ্ধাং ন সংস্পৃশেৎ ।

দুর্মেন চেতসা বিদ্বান্ অগ্ৰথা নারকী ভবেৎ ॥ ৪০

বিরলে শয়নং বাসং ত্যজেৎ প্রোক্তঃ পরস্ত্রিয়া ।

অযুক্তভাষণৈশ্চৈব স্থিয়ং শৌর্য্যং ন দর্শয়েৎ ॥ ৪১

ধনেন বাসসা প্রেম্না শ্রদ্ধয়াহৃতভাষণৈঃ ।

সততং তোষয়েৎ দারান্ নাপ্রিয়ং ক্চিদিচ্চরেৎ ॥ ৪২

*

*

*

*

যস্মিন্নরে মহেশানি তুচ্ছা ভার্য্যা পতিব্রতা ।

সর্ব্বোপধর্ম্মঃ কৃতস্তেন ভবতী প্রিয় এব সং ॥ ৪৪

নিজ স্ত্রীর প্রতিও গৃহস্থের নিম্নলিখিত কর্তব্য আছে ।

গৃহী ব্যক্তি স্ত্রীকে কখনও তাড়না করিবেন না, তাঁহাকে
সর্ব্বদা মাতৃবৎ পালন করিবেন, আর যদি তিনি সাধ্বী ও পতিব্রতা
হন, তবে ঘোর কর্মে পতিত হইলেও তাঁহাকে ত্যাগ করিবেন
না । জ্ঞানী ব্যক্তি নিজ স্ত্রীর নিকট অন্য স্ত্রীকে কলুষিতচিত্তে
স্পর্শ করিবেন না । এরূপ করিলে তাঁহার নরকগমন হইয়া

থাকে। প্রাজ্ঞ ব্যক্তি পরস্পরী সহিত নির্জনে শয়ন বা বাস করিবেন না। স্ত্রীলোকদের নিকট অনুচিত বাক্য প্রয়োগ করিবেন না এবং নিজের বাহাদুরিও দেখাইবেন না। ধন, বস্ত্র, প্রেম, শ্রদ্ধা ও অমৃততুল্য বাক্য দ্বারা সর্বদা স্ত্রীর সন্তোষ বিধান করিবেন, কখনও তাহার কোনরূপ অপ্রিয় আচরণ করিবেন না। হে মহেশানি, যে ব্যক্তির উপর পতিব্রতা ভার্য্যা তুষ্টা থাকেন, তিনি সমুদয় ধর্ম্য করিয়াছেন এবং তিনি তোমার প্রিয়।

চতুর্বর্ষাবধি স্নাতান্ লালয়েৎ পালয়েৎ সদা ।

ততঃ ষোড়শপর্য্যন্তং গুণান্ বিদ্যাঞ্চ শিক্ষয়েৎ ॥ ৪৫

বিংশত্যধিকান্ পুত্রান্ প্রেরয়েৎ গৃহকর্ম্মসু ।

ততস্তাং স্তূল্যভাবেন মত্ত্বা স্নেহং প্রদর্শয়েৎ ॥ ৪৬

কন্যাপ্যেবং পালনীয়্য শিক্ষণীয়্যতিষত্ততঃ ।

দেয়া বরায় বিদুষে ধনরত্নসমন্বিতা ॥ ৪৭

পুত্রকন্যার প্রতি গৃহস্থের নিম্নলিখিত কর্তব্য :—

চারি বর্ষ বয়স পর্য্যন্ত পুত্রগণকে লালনপালন করিবেন, পরে ষোড়শ বর্ষ পর্য্যন্ত নানাবিধ সদগুণ ও বিদ্যা শিক্ষা দিবেন। বিংশতি বর্ষ বয়স পর্য্যন্ত তাহাদিগকে গৃহকর্ম্মে নিযুক্ত রাখিবেন, তার পর তাহাদিগকে আত্মতুল্য বিবেচনা করিয়া তাহাদের প্রতি স্নেহ প্রদর্শন করিবেন। এইরূপেই কন্যাকে পালন করিতে হইবে, অতি যত্নপূর্ব্বক শিক্ষা দিতে হইবে এবং ধনরত্নের সহিত বিদ্বান্ বরকে সম্প্রদান করিতে হইবে।

এবং ক্রমেণ ভ্রাতৃশ্চ স্বশ্রুভ্রাতৃসুতানপি ।
 জ্ঞাতীন্ মিত্রাণি ভৃত্যাংশ্চ পালয়েত্তোষয়েদৃগৃহী ॥ ৪৮
 ততঃ স্বধর্ম্মনিরতানেকগ্রামনিবাসিনঃ ।
 অভ্যাগতানুদাসীনান্ গৃহস্থঃ পরিপালয়েৎ ॥ ৪৯
 যদ্যেবং নাচরেদ্দেবি গৃহস্থো বিভবে সতি ।
 পশুরেব স বিজ্ঞেয়ঃ স পাপী লোকগর্হিতঃ ॥ ৫০

গৃহী ব্যক্তি এইরূপে ভ্রাতাভগিনী ভ্রাতৃপুত্র ভাগিনেয়
 জ্ঞাতি বন্ধু ও ভৃত্যগণকে প্রতিপালন ও তাহাদের সন্তোষ
 সাধন করিবেন । তৎপরে গৃহস্থ ব্যক্তি স্বধর্ম্মনিরত একগ্রাম-
 বাসী, অভ্যাগত ও উদাসীনগণকে প্রতিপালন করিবেন । হে
 দেবি, বিভবসত্ত্বেও যদি গৃহস্থ এতদ্রূপ আচরণ না করেন, তবে
 তাঁহাকে পশু বলিয়া জানিতে হইবে, তিনি লোকসমাজে
 নিন্দনীয় ও পাপী ।

নিদ্রালস্তং দেহযত্নং কেশবিন্যাসমেব চ ।
 আসক্তিমশনে বস্ত্রে নাতিরিক্তং সমাচরেৎ ॥ ৫১
 যুক্তাহারো যুক্তনিদ্রো মিতবান্ধিত মৈথুনঃ ।
 স্বচ্ছো নত্রঃ শুচির্দক্ষো যুক্ত স্যাৎ সর্ববকর্ম্মসু ॥ ৫২

গৃহী ব্যক্তি অতিরিক্ত নিদ্রা, আলস্য, দেহের যত্ন, কেশ-
 বিন্যাস এবং অশনবসনে আসক্তি ত্যাগ করিবে । গৃহী ব্যক্তি
 আহার, নিদ্রা, বাক্য, মৈথুন এই সকলই পরিমিত ভাবে
 করিবেন । তিনি অকপট, নত্র, বাহ্যভ্যন্তরশৌচসম্পন্ন, নিরা-
 লস্য ও উদ্যোগশীল হইবেন ।

শূরশত্রৌ বিনীতঃ স্রাৎ বান্ধবে গুরুসন্নিধৌ । ৫৩

গৃহী ব্যক্তি শত্রুর সমক্ষে শূরভাব অবলম্বন করিবেন এবং গুরু ও বন্ধুগণের সমীপে বিনীত থাকিবেন ।

শত্রুগণকে বীর্য্যপ্রকাশ করিয়া শাসন করিতে হইবে । ইহা গৃহস্থের অবশ্য কর্তব্য । গৃহস্থের ঘরের এক কোণে বসিয়া কাঁদিলে আর ‘অহিংসা পরমো ধর্ম্মঃ’ বলিয়া বাজে বকিলে চলিবে না । যদি তিনি শত্রুগণের নিকট শৌর্য্য প্রদর্শন না করেন, তাহা হইলে তাঁহার কর্তব্যের অবহেলা করা হয় । কিন্তু তাঁহার বন্ধুবান্ধব আত্মীয় স্বজন গুরুর নিকট তাঁহাকে মেঘতুল্য শান্ত নিরীহ ভাব অবলম্বন করিতে হইবে ।

জুগুপ্সিতান্ ন মন্তেত নাবমন্তেত মানিনঃ ॥ ৫৩

নিন্দিত অসৎ ব্যক্তিদিগকে সম্মান দিবেন না এবং সম্মানের যোগ্য ব্যক্তিগণকেও অবমাননা করিবেন না ।

অসৎব্যক্তিকে সম্মান প্রদর্শন করা গৃহী ব্যক্তির কর্তব্য নহে, কারণ, যদি তিনি জগতের অসৎ ব্যক্তিগণকে সম্মান প্রদর্শন করেন, তাঁহার অসদ্বিষয়েরই প্রশ্রয় দেওয়া হয় । তদ্রূপ যাঁহারা সম্মানের যোগ্য, তাঁহাদিগকে তিনি যদি সম্মান না করেন, তাহাও তাঁহার পক্ষে মহা অগ্নায় ।

সৌহার্দং ব্যবহারাংশ্চ প্রবৃত্তিং প্রকৃতিং নৃণাং ।

সহবাসেন তর্কৈশ্চ বিদিত্বা বিশ্বসেত্ততঃ ॥ ৫৪

সহবাস ও সবিশেষ পর্যালোচনা দ্বারা লোকের বন্ধুত্ব,

ব্যবহার, প্রবৃত্তি ও প্রকৃতি জানিয়া তবে তাহাদের উপর বিশ্বাস করিবেন ।

যাহার তাহার সঙ্গে বন্ধুত্ব করিবেন না, যেখানে সেখানে যাইয়া লোকের সঙ্গে বন্ধুত্ব করিবেন না । যাহাদের সঙ্গে তিনি বন্ধুত্ব করিতে ইচ্ছা করেন, তাহাদের কার্যকলাপ, অন্যান্য ব্যক্তিদের সহিত তাহাদের ব্যবহার বিশেষরূপে পর্যবেক্ষণ করিবেন, সেইগুলি বিচারপূর্বক আলোচনা করিবেন, তার পর বন্ধুত্ব করিবেন ।

স্বীয়ং যশঃ পৌরুষঞ্চ গুপ্তয়ে কথিতঞ্চ যৎ ।

কৃতং যদুপকারায় ধর্ম্মজ্ঞো ন প্রকাশয়েৎ ॥৫৬

ধর্ম্মজ্ঞ গৃহী ব্যক্তি নিজ যশঃ ও পৌরুষের বিষয়, অপরের কথিত গুপ্ত কথা এবং অপরের উপকারার্থ তিনি যাহা করিয়াছেন, তাহা সাধারণের নিকট প্রকাশ করিবেন না ।

তাহার নিজেকে দরিদ্র বা ধনী কিছুই বলা উচিত নহে । তাহার নিজের ধনের গর্ব্ব করা উচিত নয় । ঐ বিষয় তাহার গোপনে রাখা উচিত । ইহাই তাহার ধর্ম্ম । ইহা শুধু সাংসারিক বিজ্ঞতা নহে, যদি কেহ এরূপ না করেন, তাহাকে দুর্গীতিপরায়াণ বলা যাইতে পারে ।

গৃহস্থই সমগ্র সমাজের মূল ভিত্তি ; তিনিই প্রধান উপার্জক । দরিদ্র, দুর্বল, বালকবালিকা, স্ত্রীলোক যাহারা কোন কার্য করে না, সকলেই গৃহস্থের উপর নির্ভর করিতেছে । অতএব গৃহস্থকে কতকগুলি কর্তব্য সাধন করিতে হইবে, আর সেই

কর্তব্যগুলি এমন হওয়া উচিত, যেন সেইগুলি সাধন করিতে করিতে তিনি দিন দিন নিজ হৃদয়ে শক্তির বিকাশ অনুভব করেন, আর মনে না করেন যে, তিনি নিজ আদর্শের অনুযায়ী কার্য্য করিতেছেন না । এই কারণে—

জুগুপ্সিতপ্রবৃত্তৌ চ নিশ্চিততঃপি পরাজয়ে ।

গুরুণা লঘুনা চাপি যশস্বী ন বিবাদয়েৎ ॥৫৭

যদি তিনি কোন অন্যায় বা নিন্দিত কার্য্য করিয়া থাকেন, অথবা এমন কোন ব্যাপারে নিযুক্ত হইয়া থাকেন, যাহাতে তিনি নিশ্চিত জানেন যে, অকৃতকার্য্য হইবেন, তাঁহার সে বিষয় সাধারণের নিকট প্রকাশ করা উচিত নহে । এই রূপে আত্মদোষ প্রকাশের কোনও প্রয়োজন ত নাইই, অপর দিকে আবার উহাতে তাঁহার বিরুদ্ধসাহ আসিয়া তাঁহার যথাযথ কর্তব্যকর্মে বাধা দেয় । তিনি যে অন্যায় করিয়াছেন, তজ্জন্ত ত তাঁহাকে ভুগিতেই হইবে ; তাঁহাকে চেষ্টা করিতে হইবে, যাহাতে তিনি ভাল করিতে পারেন । জগৎ শক্তিমান্ ও দৃঢ়চিত্ত ব্যক্তিদিগের সহিত সহানুভূতি করিয়া থাকে ।

বিদ্যাধনবশো ধর্ম্মান্ যতমান উপার্জ্জয়েৎ ।

ব্যসনঞ্চাসতাং সঙ্গং মিথ্যাদ্রোহং পরিত্যজেৎ ॥৫৮

যত্নপূর্ব্বক বিদ্যা, ধন, যশঃ ধর্ম্ম উপার্জ্জন করিবে ; এবং ব্যসন (দ্যুতক্রীড়াদি), অসৎসঙ্গ, মিথ্যাবাক্য ও পরহিংসা পরিত্যাগ করিবে ।

তাঁহাকে প্রথমতঃ জ্ঞানলাভের জন্ত চেষ্টা করিতে হইবে,

দ্বিতীয়তঃ, তাঁহাকে ধনোপার্জননের জন্য চেষ্টা করিতে হইবে । ইহাই তাঁহার কর্তব্য, আর যদি তিনি তাঁহার এই কর্তব্য সাধন না করেন, তাঁহাকে ত মানুষ বলিয়াই গণনা করা যাইতে পারে না । যদি কোন গৃহস্থ অর্থোপার্জননের চেষ্টা না করেন, তাঁহাকে দুর্নীতিপরায়ণ বলিতে হইবে । যদি তিনি অলসভাবে জীবন যাপন করেন ও তাহাতেই সন্তুষ্ট থাকেন, তাঁহাকে অসৎপ্রকৃতি বলিতে হইবে, কারণ, তাঁহার উপর সহস্র সহস্র ব্যক্তি নির্ভর করিতেছে । যদি তিনি যথেষ্ট ধন উপার্জন করেন, অপর শত শত ব্যক্তির তাহাতে ভরণ-পোষণ হইবে ।

যদি এই সহরে শত শত ব্যক্তি ধনী হইবার চেষ্টা করিয়া ধনী না হইতেন, তাহা হইলে এই সভ্যতা, দরিদ্রালয় এবং বড় বড় বাড়ী কোথায় থাকিত ?

এ ক্ষেত্রে অর্থোপার্জন অন্য় নহে, কারণ ঐ অর্থ বিতরণের জন্ত । গৃহস্থই সমাজের কেন্দ্র । অর্থোপার্জন ও তাহা সংকার্য্যে ব্যয় করাই তাঁহার পক্ষে উপাসনা । কারণ, যে গৃহস্থ সদুপায়ে ও সদুদ্দেশ্যে ধনী হইবার চেষ্টা করিতেছেন, সন্ন্যাসী নিজ কুটীরে বসিয়া উপাসনা করিলে যেমন তাঁহার মুক্তিলাভের সহায়তা হইয়া থাকে, গৃহস্থেরও ঠিক তাহাই হইয়া থাকে ; কারণ, এই উভয়েতেই আমরা ঈশ্বর ও ঈশ্বরের যাহা কিছু, তৎসমুদয়ের উপর ভক্তিভাবপ্রণোদিত আত্মনির্ভর ও আত্মত্যাগরূপ একই ধর্ম্মের বিভিন্ন বিকাশ দেখিতেছি ।

অনেক সময় লোকে আপনাদের সাধ্যাতীত কার্যে প্রবৃত্ত হয়, আর তাহার ফল এই হয় যে, তাহাদের উদ্দেশ্যসিদ্ধির জন্য অপরকে প্রতারণা করিয়া থাকে ।

আবার—

অবস্থানুগতশ্চেচ্চাঃ সময়ানুগতাঃ ক্রিয়াঃ ।

তস্মাদবস্থাং সময়ং বীক্ষ্য কৰ্ম্ম সমাচরেৎ ॥৫৯

চেচ্চা অবস্থার অনুগত এবং ক্রিয়া সময়ের অনুগত । অতএব অবস্থা ও সময় অনুসারেই কৰ্ম্ম করিবে ।

সকল বিষয়েই এই সময়ের দিকে বিশেষ দৃষ্টি রাখিতে হইবে । এক সময়ে যাহা অসিদ্ধ হইল, অপর সময়ে হয় ত তাহাতে সম্পূর্ণ সাফল্য ঘটিল ।

সত্যং মৃদু প্রিয়ং ধীরো বাক্যং হিতকরং বদেৎ ।

আত্মোৎকর্ষন্তথা নিন্দাং পরেষাং পরিবৰ্জয়েৎ ॥৬২

ধীর গৃহস্থ ব্যক্তি সত্য, মৃদু, প্রিয় ও হিতকর বাক্য বলিবেন । তিনি নিজের উৎকর্ষ খ্যাপন করিবেন না এবং পরের নিন্দা পরিত্যাগ করিবেন ।

জলাশয়াশ্চ বৃক্ষাশ্চ বিশ্রামগৃহমধ্বনি ।

সেতুঃ প্রতিষ্ঠিতো যেন তেন লোকত্রয়ং জিতং ॥৬৩

যে ব্যক্তি জলাশয়খনন, বৃক্ষরোপণ, পথিমধ্যে বিশ্রামগৃহ ও সেতু নিৰ্ম্মাণ করিয়া সাধারণের কল্যাণের জন্য প্রতিষ্ঠা ও উৎসর্গ করেন, তিনি ত্রিভুবন জয় করিয়া থাকেন ।

বড় বড় যোগিগণ যে পদ প্রাপ্ত হন, তিনিও এই সকল

কৰ্ম করিয়া সেই পদই লাভ করিয়া থাকেন ।

কৰ্ম-যোগের ইহাই এক অংশ—সর্বদা ক্রিয়াশীলতা—
ইহাই গৃহস্থের কর্তব্য । ঐ তন্ত্ৰেই আর কিছু পরে নিম্নলিখিত
শ্লোকটি দৃষ্ট হয় :—

ন বিভেতি রণাদ্ যো বৈ সংগ্রামেহপ্যপরাঙ্গুথঃ ।

ধৰ্মযুদ্ধে মৃতো বাপি তেন লোকত্রয়ং জিতং ॥ ৬৭

যিনি যুদ্ধে ভয় পান না, যিনি সংগ্রামে অপরাঙ্গুথ, যিনি
ধৰ্মযুদ্ধে মৃত হন, তিনি ত্রিভুবন জয় করিয়াছেন ।

যদি স্বদেশের বা স্বধর্মের জন্য যুদ্ধ করিয়া তাঁহার মৃত্যু
হয়, যোগিগণ ধ্যানের দ্বারা যে পদ লাভ করেন, তিনিও সেই
পদ লাভ করিয়া থাকেন । ইহাতে এইটী স্পষ্ট দেখাইতেছে
যে, একজনের পক্ষে যাহা কর্তব্য, অপরের পক্ষে তাহা কর্তব্য
নহে, আর শাস্ত্রে কোনটাকেই ছোট বড় বলিতেছেন না,
বিভিন্ন দেশকালপাত্রে বিভিন্ন কর্তব্য রহিয়াছে, আর আমরা
যে অবস্থায় রহিয়াছি, আমাদেরকে তদুপযোগী কর্তব্য সাধন
করিতে হইবে ।

এই সমুদয়ের নিষ্কর্ষ করিয়া এই এক ভাব পাওয়া যাই-
তেছে যে, দুর্বলতাকে যেন কোনরূপে প্রশ্রয় দেওয়া না হয় ।
আমাদের দর্শন, ধর্ম বা কর্মের ভিতর—আমাদের সমুদয়
শাস্ত্রীয় শিক্ষার ভিতর—এই বিশেষ ভাবটী আমি খুব পছন্দ
করি । যদি তোমরা বেদ পাঠ কর, তাহা হইলে দেখিবে,
‘নাভয়েৎ’ কিছুতে ভয় করিও না—এই কথা বার বার

উক্ত হইয়াছে । ভয় দুর্বলতার চিহ্ন । জগতের ঘৃণা ও উপহাসের দিকে লক্ষ্য না রাখিয়া কর্তব্য করিয়া যাইতে হইবে ।

যদি কেহ সংসার হইতে স্বতন্ত্র থাকিয়া ঈশ্বরের উপাসনা করিতে যান, তাঁহার ভাবা উচিত নহে যে, যাঁহারা সংসারে থাকিয়া সংসারের হিতচেষ্টা করিতেছেন, তাঁহারা ঈশ্বরের উপাসনা করিতেছেন না ; আবার যাঁহারা সংসারে স্ত্রী-পুত্রাদির জন্য রহিয়াছেন, তাঁহারা যেন সংসারত্যাগীদিগকে আলস্য-পরায়ণ ঘৃণিত জীব মনে না করেন । নিজ নিজ অধিকারে কেহই ছোট নহে ।

এই বিষয়টি আমি একটা গল্প দ্বারা বুঝাইব,—কোন দেশে এক রাজা ছিলেন । তাঁহার রাজ্যে যে কোন সন্ন্যাসী আসিতেন, তাঁহাকেই তিনি জিজ্ঞাসা করিতেন, “যে সংসার ত্যাগ করিয়া সন্ন্যাস গ্রহণ করে, সে শ্রেষ্ঠ, না, যে গৃহস্থের কর্তব্য সমুদয় করিয়া যায়, সেই শ্রেষ্ঠ ?” অনেক বিজ্ঞ লোক এই সমস্তার মীমাংসার চেষ্টা করিলেন । কেহ কেহ বলিলেন, ‘সন্ন্যাসী শ্রেষ্ঠ’ । রাজা এই বাক্যের প্রমাণ চাহিলেন । যখন তাঁহারা প্রমাণ দিতে অক্ষম হইলেন, তখন রাজা তাঁহাদিগকে বিবাহ করিয়া গৃহস্থ হইবার আদেশ দিলেন । আবার অপর কতকগুলি ব্যক্তি আসিয়া বলিলেন, “স্বধর্ম্মপরায়ণ গৃহস্থই শ্রেষ্ঠ ।” রাজা তাঁহাদের নিকটও প্রমাণ চাহিলেন । যখন তাঁহারা তাহা দিতে পারিলেন না, তখন তাঁহাদিগকেও তিনি গৃহস্থ করিয়া আপনার রাজ্যে বাস করাইলেন ।

অবশেষে তাঁহার নিকট এক যুবা সন্ন্যাসী আসিয়া উপস্থিত হইলেন ; রাজা তাঁহার নিকটেও উপরোক্ত প্রশ্ন করাতে সন্ন্যাসী বলিলেন, “হে রাজন্, নিজ নিজ অধিকারে উভয়েই শ্রেষ্ঠ ; কেহই ন্যূন নহেন ।” রাজা বলিলেন, “ইহার প্রমাণ দিন ।” সন্ন্যাসী বলিলেন, “হাঁ, আমি প্রমাণ দিব । তবে কিছুদিন আপনাকে আমার মত থাকিতে হইবে । তাহা হইলেই আমার বাক্য আপনার নিকট প্রমাণ করিতে পারিব ।” রাজা সম্মত হইলেন এবং সন্ন্যাসীর অনুগামী হইয়া রাজ্যের পর রাজ্য অতিক্রম করিয়া আর এক রাজ্যে উপস্থিত হইলেন । সেই রাজ্যের রাজধানীতে তখন এক মহাসমারোহ-ব্যাপার চলিতেছিল । রাজা ও সন্ন্যাসী ঢাক ও অগ্ন্যাগ্ন নানাপ্রকার বাজ্ঞ এবং ঘোষণা-কারিগণের চীৎকার শুনিতে পাইলেন । পথে লোকে সুসজ্জিত হইয়া কাতারে কাতারে দাঁড়াইয়া আছে—আর টেট্রা পেটা হইতেছে । রাজা ও সন্ন্যাসী দাঁড়াইয়া দেখিতে লাগিলেন, ব্যাপারটা কি । ঘোষণাকারী চীৎকার করিয়া বলিতেছিল, “এই দেশের রাজকন্যা স্বয়ম্বর হইবেন ।”

ভারতে প্রাচীন কাল হইতেই এইরূপে রাজকন্যাগণের স্বয়ম্বর হইবার প্রথা প্রচলিত ছিল । প্রত্যেক রাজকন্যারই, অবশ্য, কিরূপ বর মনোনীত করিবেন, তাহার সম্বন্ধে বিশেষ বিশেষ ভাব ছিল । কাহারও কাহারও ভাব—বর যেন পরম সুন্দর হয়, কাহারও কেবল অতিশয় বিদ্বান্ বরের আকাঙ্ক্ষা, কেহ কেহ আবার খুব ধনী বরের আকাঙ্ক্ষা করিতেন ; ইত্যাদি ইত্যাদি ।

রাজকন্যা অতিশয় চাকচিক্যশালী শোভাময় বসন-ভূষণে বিভূষিতা হইয়া একটা সিংহাসনে বাহিতা হইতেন, আর ঘোষণাকারীরা চতুর্দিকে ঘোষণা করিত, অমুক রাজকন্যা এইবারে স্বয়ম্বর হইবেন। তখন নিকটবর্তী সকল রাজ্যের রাজপুত্রেরা শ্রেষ্ঠ পরিচ্ছদ ধারণ করিয়া রাজকন্যার সম্মুখীন হইতেন। কখন কখন তাঁহাদেরও ঘোষণাকারী থাকিত, তাহারা তাঁহার গুণাবলী, কিসে তিনি রাজকন্যার মনোনীত হইবার যোগ্যপাত্র, তাহা বর্ণনা করিত। রাজকন্যাকে চতুর্দিকে বহিয়া লইয়া যাওয়া হইত, তিনি তাঁহাদিগের দিকে দেখিতেন, আর কে কিরূপ গুণশালী, তাহা শুনিতেন। যদি তাহাতে তাঁহার সন্তোষ না হইত, তিনি বাহকদিগকে বলিতেন, ‘এখান হইতে চল’; তখন সেই প্রত্যাখ্যাত রাজতনয়াকাজক্ষীর দিকে আর কেহ চাহিয়া দেখিত না। কিন্তু যদি রাজকন্যা ইহাদের মধ্যে কাহারও প্রতি মন সমর্পণ করিতেন, তবে তাঁহার গলদেশে বরমালা অর্পণ করিতেন; করিলেই তিনিই তাঁহার স্বামী হইতেন।

যে দেশে আমাদের পূর্ব-কথিত রাজা ও সন্ন্যাসী আসিয়াছেন, সেই দেশের রাজকন্যার এইরূপ স্বয়ম্বর হইতেছিল। এই রাজকন্যা পৃথিবীর মধ্যে সর্ববাপেক্ষা সুন্দরী ছিলেন, আর এই পণ ছিল যে, রাজার মৃত্যুর পর তাঁহার জামাতা রাজা হইবেন। এই রাজকন্যার ইচ্ছা ছিল, সর্ববাপেক্ষা সুন্দর পুরুষকে বিবাহ করেন, কিন্তু তিনি তাঁহার মনের মত সর্ববাপেক্ষা সুন্দর পুরুষ পাইতেছিলেন না। অনেক বার এইরূপ স্বয়ম্বর-সভা আহূত হয়, তথাপি রাজকন্যা কাহাকেও মনোনীত করেন নাই।

বতগুলি স্বয়ম্বর-সভা হইয়াছিল, তন্মধ্যে এইটাই সর্বাপেক্ষা মহৎ ও বৃহৎ হইয়াছিল ; এই সভায় পূর্ব পূর্ব বারের অপেক্ষা অধিক লোক সমবেত হইয়াছিল, আর এই সভার দৃশ্য অতি চমৎকার-জনক অদ্ভুত হইয়াছিল ।

রাজকন্যা সিংহাসনে করিয়া আসিলেন ও বাহকগণ দ্বারা ভিন্ন ভিন্ন স্থানে বাহিতা হইতে লাগিলেন । রাজকন্যা কাহারও দিকে ক্রক্ষেপও করিলেন না । সকলেই, এবারও পূর্ব পূর্ব বারের মত কেহই মনোনীত হইবেন না ভাবিয়া বিমর্ষ হইতে লাগিলেন । এমন সময়ে এক যুবা সন্ন্যাসী তথায় আসিয়া উপস্থিত হইলেন । তাঁহার রূপের প্রভা দেখিয়া বোধ হইল, যেন স্বয়ং সূর্য্যদেব আকাশমার্গ ছাড়িয়া ধরাতলে অবতীর্ণ হইয়াছেন । তিনি সভার এক কোণে দাঁড়াইয়া কি হইতেছে, দেখিতে লাগিলেন । রাজকন্যাসহিত সেই সিংহাসন তাঁহার নিকটবর্তী হইল । রাজকন্যা সেই পরম রূপবান্ সন্ন্যাসীকে দেখিবামাত্র বাহকদিগকে দণ্ডায়মান হইতে বলিয়া সন্ন্যাসীর গলদেশে বরমালা অর্পণ করিলেন । যুবা সন্ন্যাসীটা মালা লইয়া ছুঁড়িয়া ফেলিয়া দিলেন, বলিতে লাগিলেন, ‘এ কি পাগলামি করিতেছ ? আমি সন্ন্যাসী, বিবাহের সহিত আমার সম্পর্ক কি ?’ সেই দেশের রাজা মনে করিলেন, বোধ হয় লোকটা দরিদ্র, সেই জন্য রাজকন্যাকে বিবাহ করিতে ভরসা করিতেছে না, অতএব বলিলেন, ‘তুমি এক্ষণে আমার কন্যার সহিত অর্দ্ধরাজ্য পাইবে এবং আমার মৃত্যুর পর সমুদয় রাজ্য পাইবে ।’ এই বলিয়া সন্ন্যাসীর গলদেশে আবার

মাল্য অর্পণ করিলেন। সন্ন্যাসী, ‘কি উৎপাত ! আমি বিবাহ করিতে চাহি না, তবু একি ?’ এই বলিয়া পুনরায় মালা ফেলিয়া দিয়া দ্রুতপদে সেই সভা হইতে প্রস্থান করিলেন।

এদিকে এই যুবকটির প্রতি রাজকন্যার এতদূর ভালবাসা পড়িয়াছিল যে, তিনি বলিলেন, ‘হয় আমি ইঁহাকে বিবাহ করিব, নয় মরিব।’ এই বলিয়া তিনি তাঁহাকে ফিরাইয়া আনিবার জন্য তাঁহার অনুবর্তন করিলেন। তখন সেই অপর সন্ন্যাসী— যিনি রাজাকে এখানে আনিয়াছিলেন—রাজাকে বলিলেন, ‘চলুন, আমরা এই দুই জনের অনুগমন করি।’ এই বলিয়া তাঁহার অনেকটা দূরে দূরে থাকিয়া তাঁহাদের পশ্চাৎ পশ্চাৎ চলিতে লাগিলেন। যে সন্ন্যাসী রাজকুমারীর পাণিগ্রহণে অসম্মত হইয়াছিলেন, তিনি রাজধানী হইতে বাহির হইয়া কয়েক মাইল ধরিয়া গ্রামের মধ্য দিয়া চলিয়া বনে প্রবেশ করিলেন। রাজকন্যাও তাঁহার অনুগমন করিলেন ; অপর দুই জনও তাঁহাদের পশ্চাৎ পশ্চাৎ চলিলেন।

পূর্বোক্ত যুবা সন্ন্যাসীটী ঐ বনটীকে তন্ন তন্ন রূপে জানিতেন ; উহার কোথায় কি গুপ্ত পথ আছে, উহার অন্ধি সন্ধি সমস্তই জানিতেন। হঠাৎ তিনি এইরূপ একটা পথে প্রবেশ করিয়া একেবারে অন্তর্হিত হইলেন। রাজকন্যা আর তাঁহার কোন সন্ধান পাইলেন না। অনেকক্ষণ ধরিয়া তাঁহাকে খুঁজিয়া তিনি একটা বৃক্ষতলে বসিয়া কাঁদিতে লাগিলেন ; কারণ, তিনি সেই বন হইতে বাহিরে আসিবার পথ জানিতেন না। তখন

সেই রাজা ও সেই অপর সন্ন্যাসীটি তাঁহার নিকট আসিয়া বলিলেন, “কাঁদিও না, আমরা তোমাকে এই বনের বাহিরে যাইবার পথ দেখাইয়া দিব। কিন্তু এখন পথ বাহির করা বড় কঠিন ; কারণ, এখন বড় অন্ধকার। এই একটা বড় গাছ রহিয়াছে ; এস, আজ ইহার তলায় বিশ্রাম করা যাক—প্রভাত হইলেই তোমাকে বাহির হইবার পথ দেখাইয়া দিব।”

সেই গাছে এক পাখীর বাসা ছিল। তাহাতে একটা ছোট পক্ষী, পক্ষিণী ও তাহাদের তিনটি ছোট ছোট শাবক থাকিত। ছোট পাখীটি নীচের দিকে চাহিয়া তিনটি লোককে গাছের তলায় দেখিল ও পক্ষিণীকে বলিল, ‘দেখ, কি করা যায় ? আমাদের ঘরে অনেকগুলি অতিথি আসিয়াছেন—এ শীতকাল, আর আমাদের নিকট আগুনও নাই।’ এই বলিয়া সে উড়িয়া গেল, ঠোঁটে করিয়া একখণ্ড জ্বলন্ত কাষ্ঠখণ্ড লইয়া আসিল এবং উহা তাহার অতিথিগণের সম্মুখে ফেলিয়া দিল। তাঁহারা সেই অগ্নিখণ্ডে জ্বালানি কাষ্ঠ যোগ করিয়া বেশ আগুন প্রস্তুত করিলেন। কিন্তু পক্ষীটির তাহাতেও তৃপ্তি হইল না। সে তাহার পত্নীকে বলিল, “প্রিয়ে, আমরা কি করি ? ইহাদিগকে খাইতে দিবার মত আমাদের ঘরে কিছুই নাই ; কিন্তু ইহারা ক্ষুধার্ত, আর আমরা গৃহস্থ ; ঘরে যে কেহ আসিবে, তাহাকেই খাইতে দেওয়া আমাদের কর্তব্য। আমি নিজে যতদূর পারি, করিব। আমি ইহাদিগকে আমার নিজ শরীর দিব।” এই বলিয়া সে উড়িয়া গিয়া বেগে অগ্নিতে পড়িল ও মরিয়া গেল। অতিথিরা তাহাকে

পড়িতে দেখিলেন, তাহাকে বাঁচাইবার যথাসাধ্য চেষ্টা করিলেন, কিন্তু সে অতিদ্রুত আসিয়া আগুনে পড়িয়া মরাতে তাঁহারা উহাকে নিবারণ করিবার সময় পাইলেন না ।

পক্ষিণী তাহার স্বামীর কার্য্য দেখিল, বলিল, “তিন জন লোক রহিয়াছেন, তাঁহাদের খাইবার জন্য একটা ছোট পক্ষী মাত্র রহিয়াছে । ইহাতে ত কুলাইবে না । স্ত্রীর কর্তব্য—স্বামীর কোন উদ্যম বিফল হইতে না দেওয়া । অতএব আমিও আমার শরীর সমর্পণ করি ।” এই বলিয়া সেও আগুনে ঝাঁপ দিল ও পুড়িয়া মরিয়া গেল ।

তার পর সেই তিনটি পক্ষিশাবক যখন সমুদয় দেখিল, আর দেখিল, ইহাতেও তিনজনের পর্য্যাপ্ত খাদ্য হয় নাই, বলিল, “আমাদের পিতামাতা যতদূর সাধ্য করিলেন, কিন্তু ইহা ত পর্য্যাপ্ত হইল না । পিতামাতার কার্য্য সম্পূর্ণ করিতে চেষ্টা করা সন্তানের কর্তব্য ; আমাদেরও শরীর যাউক ।” এই বলিয়া তাহারাও সকলে অগ্নিতে ঝাঁপ দিল ।

ঐ তিনটি ব্যক্তি পক্ষীগুলিকে খাইতে পারিলেন না ; তাঁহারা যাহা দেখিলেন, তাহাতেই আশ্চর্য্য হইয়া গেলেন এবং কোনরূপে অনাহারে রাত্রি যাপন করিলেন । প্রভাত হইলে রাজা ও সন্ন্যাসী সেই রাজকন্তাকে পথ দেখাইয়া দিলেন । তখন তিনি তাঁহার পিতার নিকট প্রত্যাবর্তন করিলেন ।

তখন সন্ন্যাসী রাজাকে সম্বোধিয়া কহিলেন, “রাজন, দেখিলে, নিজ নিজ অধিকারে কেহই অপরাহী হইতে নিকৃষ্ট নহে । যদি

তুমি সংসারে থাকিতে চাও, তবে ঐ পক্ষিগণের ন্যায় প্রতি মুহূর্তে অপরের জন্য প্রাণবিসর্জ্ঞন করিবার নিমিত্ত প্রস্তুত হইয়া থাক । আর যদি তুমি সংসার ত্যাগ করিতে চাও, তবে ঐ যুবকের ন্যায় হও, বাঁহার পক্ষে পরমা সুন্দরী কন্যা ও রাজ্যও শূন্যবৎ প্রতিভাত হইয়াছিল । যদি তুমি গৃহস্থ হইতে চাও, তবে তোমার জীবনকে অপরের হিতের জন্য সর্বদা বিসর্জ্ঞন দিতে প্রস্তুত হইয়া থাক । আর যদি তুমি সন্ন্যাস-জীবনকেই মনোনীত কর, তবে সৌন্দর্য্য, ঐশ্বর্য্য ও শক্তির দিকে মোটে দৃষ্টিপাতই করিও না । প্রত্যেকেই নিজ নিজ অধিকারে শ্রেষ্ঠ, কিন্তু এক জনের কর্তব্য অপরের নহে ।”

তৃতীয় অধ্যায় ।

কৰ্ম্মরহস্য ।

অপরের দৈহিক অভাব পূরণ করিয়া তাহাকে সাহায্য করা মহৎ কৰ্ম্ম বটে, কিন্তু অভাব যত অধিক এবং সাহায্য বা উপকার যত অধিক দূরস্পর্শী, সেই অনুসারে সেই উপকারও শ্রেষ্ঠতর । যদি এক ঘণ্টার জন্য কোন ব্যক্তির অভাব দূর করিতে পারা যায়, তাহা তাহার পক্ষে অবশ্য উপকার বলিতে হইবে, কিন্তু যদি এক বৎসরের জন্য অভাব দূর করিতে পারা যায়, তাহা আরও অধিক উপকার, আর যদি অভাব চিরকালের জন্য দূর করিতে পারা যায়, তাহাই মানুষের সর্বোচ্চ সাহায্য বা উপকার । অধ্যাত্মজ্ঞানই এক মাত্র বস্তু, যাহা আমাদের সমুদয় কৰ্ম্ম চিরকালের জন্য দূর করিতে পারে ; অপরাপর জ্ঞান অতি অল্প সময়ের জন্য অভাব পূরণ করে মাত্র । মানুষের প্রকৃতি যদি একেবারে পরিবর্তিত হইয়া যায়, তবেই তাহার অভাব চিরকালের জন্য দূরীভূত হইতে পারে । কেবল আত্ম-বিষয়ক জ্ঞানের দ্বারাই অভাব-বৃত্তির একেবারে বিনাশ সম্ভব হইতে পারে ; অতএব মানুষকে আধ্যাত্মিক সাহায্য করাই তাহার সর্বশ্রেষ্ঠ সাহায্য করা । মানুষকে যিনি পরমার্থজ্ঞান প্রদান করিতে

পারেন, তিনিই মানুষের সর্বশ্রেষ্ঠ হিতৈষী । আমরা দেখিতেও পাই, মানুষের আধ্যাত্মিক অভাব পূরণ করিবার জন্য বাঁহারা সাহায্য করিয়াছেন, তাঁহারাই খুব ক্ষমতাশালী পুরুষ ছিলেন ; কারণ, আধ্যাত্মিক জ্ঞানই জীবনের অন্যান্য কার্যসমূহের ভিত্তি । আধ্যাত্মিক সুস্থতা ও সবলতাসম্পন্ন মানব যদি ইচ্ছা করেন, অন্যান্য বিষয়েও দক্ষ হইতে পারেন, আর মানুষের ভিতর আধ্যাত্মিক বল না আসিলে, তাহার শারীরিক অভাবগুলি পর্য্যন্ত পূরণ হয় না । আধ্যাত্মিক উপকারের পরই হইতেছে বুদ্ধিবৃত্তির উন্নতি-সম্বন্ধে সাহায্য করা ; জ্ঞান দান করা ভোজ্যবস্ত্র-দান হইতে শ্রেষ্ঠ দান । প্রাণদান হইতেও উহা শ্রেষ্ঠ ; কারণ, জ্ঞানই মানুষের প্রকৃত জীবন । অজ্ঞান—মৃত্যু, জ্ঞানই জীবন । জীবন যদি কেবল অন্ধকারময় এবং অজ্ঞান ও কষ্টের মধ্য দিয়া কষ্টে স্ফটে চলা মাত্র হয়, তবে জীবনের মূল্য অতি অল্প । তার পর অবশ্য শারীরিক অভাব পূরণ । অতএব ‘পরোপকার’ সম্বন্ধে বিচার করিবার সময় যেন আমরা এই ভ্রমে পতিত না হই যে, শারীরিক সাহায্যই এক মাত্র সাহায্য । শারীরিক সাহায্য সর্বশেষে ও সর্ববিন্মে, কারণ, উহাতে চিরতৃপ্তি নাই । ক্ষুধার্ত হইলে যে কষ্ট হয়, তাহা খাইলেই চলিয়া যায়, কিন্তু ক্ষুধা আবার ফিরিয়া আসে । কষ্ট তখনই দূর হইবে, যখন আমার সর্ববিধ অভাব দূর হইবে । তখন ক্ষুধা আমাকে কষ্ট দিতে পারিবে না । কোনরূপ দুঃখ কষ্ট বা যাতনা আমাকে চঞ্চল করিতে সমর্থ হইবে না । অতএব, যাহাতে আমাদিগকে

আধ্যাত্মিক-সবলতা-সম্পন্ন করে, তাহাই সর্বশ্রেষ্ঠ উপকার ; তাহার পর মানসিক উপকার ; তার পর শারীরিক ।

কেবল শারীরিক সাহায্য দ্বারা জগতের দুঃখ দূর করা অসম্ভব । যতদিন মানুষের প্রকৃতি না পরিবর্তিত হইতেছে, ততদিন এই শারীরিক অভাবসকল আসিবেই আসিবে ; ততদিন এই কষ্টগুলি বোধ হইবেই হইবে । যতই শারীরিক সাহায্য কর না কেন, কোন মতেই কষ্ট একেবারে দূর হইবে না । জগতের এই দুঃখ-সমস্তার একমাত্র মোক্ষমাংসা—মানব-জাতিকে পবিত্র করা । আমরা জগতে যাহা কিছু দুঃখ কষ্ট ও অশুভ দেখিতে পাই, অজ্ঞানই তৎসমুদয়ের জননী । মানুষকে জ্ঞানালোক দাও, মানুষকে আধ্যাত্মিকবলসম্পন্ন কর । যদি আমরা ইহা করিতে সক্ষম হই, যদি সকল মানুষ পবিত্র, আধ্যাত্মিক-বলসম্পন্ন ও শিক্ষিত হয়, কেবল তাহা হইলেই জগৎ হইতে দুঃখ চলিয়া যাইবে, তাহার পূর্বের দুঃখ যাইতেই পারে না । দেশে যত বাড়ী আছে, সকল বাড়ীগুলিকে দান-ভাণ্ডার করিয়া তুলিতে পারি, দেশকে হাঁসপাতালে হাঁসপাতালে ছাইয়া ফেলিতে পারি, কিন্তু যতদিন না মানুষের স্বভাব বদলাইতেছে, ততদিন কষ্ট থাকিবেই থাকিবে ।

আমরা গীতায় পুনঃপুনঃ শিক্ষা পাই, আমরাদিগকে অনবরত কৰ্ম্ম করিতে হইবে, কিন্তু সকল কৰ্ম্মই সদসৎমিশ্রিত । আমরা এমন কোন কৰ্ম্ম করিতে পারি না, যাহার কোন খানে কিছু ভাল নাই, আবার এমন কোন কৰ্ম্ম হইতে পারে না, যাহাতে

কোথাও কাহারও না কাহারও কিছু অনিষ্ট করিবে। প্রত্যেক কার্য্যই অনতিক্রমণীয় ভাবে সদসৎমিশ্রিত। তথাপি শাস্ত্র আমাদিগকে সর্বদা কার্য্য করিতে বলিতেছেন। সদসৎ উভয়ই উহাদের ফলপ্রসব করিবে। সংকর্ম্মের ফল সৎ, অসৎ কর্ম্মের ফল অসৎ হইবে, কিন্তু এই সদসৎ উভয়ই আত্মার বন্ধনমাত্র। গীতায় এ তত্ত্বের এই মীমাংসা করা হইয়াছে যে, যদি আমরা কর্ম্মে আসক্ত না হই, তবে উহা আমাদের উপর কোন শক্তি প্রকাশ করিতে পারিবে না। এক্ষণে আমরা ‘কর্ম্মে অনাসক্তি’ বলিতে কি বুঝায়, তাহা বুঝিতে চেষ্টা করিব।

গীতার মূল সূত্রই এই :—নিরন্তর কর্ম্ম কর, কিন্তু তাহাতে আসক্ত হইও না। ‘সংস্কার’ শব্দে মনের যে দিকে বিশেষ ঝোঁক তাহা বুঝাইয়া থাকে। মনকে যদি একটী হ্রদের সহিত তুলনা করা যায়, তবে বলা যায় যে, মনের মধ্যে যে কোন তরঙ্গ উঠে, নিবৃত্ত হইলে তাহা একেবারে নাশ হইয়া যায় না, কিন্তু উহা চিন্তের ভিতর একটী দাগ এবং সেই তরঙ্গটির উদয় হইবার পুনঃসম্ভবনীয়তা রাখিয়া যায়। এই দাগ এবং ঐ তরঙ্গের পুনরাবির্ভাবের সম্ভবনীয়তার একত্রে নাম—সংস্কার। আমরা যে কোন কার্য্য করি, আমাদের প্রত্যেক অঙ্গ-সঞ্চালন, আমাদের মনের প্রত্যেক চিন্তা চিন্তের উপর এইরূপ সংস্কার ফেলিয়া যাইতেছে, আর যখন তাহারা উপরিভাগে প্রকাশ না থাকে, তখনও তাহারা এত প্রবল থাকে যে, তলে তলে অজ্ঞাতভাবে কার্য্য করিতে থাকে। আমরা প্রতি মুহূর্ত্তে

যাহা, তাহা আমাদের মনের উপর এই সকল সংস্কার-পুঞ্জের দ্বারা নিয়মিত। আমি এই মুহূর্তে যাহা, তাহা আমার ভূত জীবনের এই সকল সংস্কারসমষ্টিমাত্র। ইহাকেই প্রকৃত পক্ষে চরিত্র বলে। প্রত্যেক ব্যক্তির চরিত্র এই সংস্কার-সমষ্টির দ্বারা নিয়মিত। যদি শুভ সংস্কার প্রবল হয়, সেই চরিত্র সাধু-চরিত্ররূপে পরিণত হয়, অসৎ সংস্কার প্রবল হইলে তাহা অসচ্চরিত্র হয়। যদি কোন ব্যক্তি সর্বদা মন্দ কথা শুনে, মন্দ চিন্তা করে, মন্দ কায করে, তাহার মন এই মন্দ-সংস্কার-পূর্ণ হইয়া যাইবে এবং তাহারাই অজ্ঞাতভাবে তাহার কার্য্য-প্রবৃত্তিকে নিয়মিত করিবে। বাস্তবিক পক্ষে সর্বদাই এই সংস্কারগুলির কার্য্য হইতেছে, সুতরাং সে ব্যক্তি মন্দসংস্কার-সম্পন্ন হওয়ায় তাহার কার্য্যও মন্দ হইবে। সে একটি মন্দ লোক হইয়া দাঁড়াইবে, সে তাহা না হইয়া থাকিতে পারিবে না। এই সংস্কারসমষ্টি মন্দকার্য্য করিবার প্রবল প্ররোচক শক্তি-স্বরূপ হইবে। সে এই সংস্কারগুলির হস্তে যন্ত্রতুল্য হইবে, তাহার তাহাকে জোর করিয়া মন্দ কার্য্যে প্রবৃত্ত করাইবে। এইরূপ, যদি কোন লোক ভাল বিষয় ভাবে এবং ভাল কায করে, উহাদের সংস্কারগুলির সমষ্টি ভালই হইবে এবং উহারা পূর্বোক্ত প্রকারে তাহাকে তাহার অনিচ্ছা-সত্ত্বেও সৎকার্য্যে প্রবৃত্ত করিবে। যখন মানুষ এত ভাল কায করে এবং এত সৎচিন্তা করে যে, তাহার প্রকৃতিতে অনিচ্ছা সত্ত্বেও অনিবার্য্যরূপে সৎকার্য্য করিবার ইচ্ছা উপস্থিত হয়,

তখন সে কোন অন্যায় কার্য করিব বলিয়া মনে মনে চিন্তা করিলেও, ঐ সকল সংস্কারের সমষ্টিস্বরূপ তাহার মন তাহাকে উহা করিতে দিবে না। সংস্কারগুলিই তাহাকে মন্দদিক্ হইতে ফিরাইয়া আনিবে। সে তখন তাহার সংস্কারের হস্তে পুত্তলিকাপ্রায়। যখন এইরূপ হয়, তখনই সেই ব্যক্তির চরিত্র গঠিত হইয়াছে বলা যায়।

যেমন কূৰ্ম তাহার পদ ও মস্তক তাহার খোলার ভিতরে গুটাইয়া রাখে; তুমি তাহাকে মারিয়া ফেলিতে পার, খণ্ড খণ্ড করিয়া ফেলিতে পার, কিন্তু তাহারা বাহিরে আসিবে না, যে ব্যক্তির বিভিন্ন ইন্দ্রিয়কেন্দ্রগুলির উপর সংযম লাভ হইয়াছে, তাহার চরিত্রও সেইরূপ। সর্বদা সচ্চিন্তার প্রতিক্রিয়া দ্বারা শুভ সংস্কারগুলি তাহার মনের উপরিভাগে সর্বদা ভ্রমণ করাতে চিন্তের শুভ সংস্কার প্রবল হয়; তাহার ফল এই যে, আমরা ইন্দ্রিয় (কর্মেন্দ্রিয় ও জ্ঞানেন্দ্রিয় উভয়ই) জয় করি। তখনই চরিত্রের প্রতিষ্ঠা হয়, তখনই কেবল তুমি সত্য লাভ করিতে পার। এরূপ লোকই চিরকালের জন্য নিরাপদ ভূমিতে দণ্ডায়মান হয়। তাহার দ্বারা কোন অন্যায় কার্য সম্ভবে না। তাহাকে যেখানেই ফেলিয়া দাও না কেন, যে সঙ্গেই তাহাকে রাখ না কেন, তাহার পক্ষে কোন বিপদের সম্ভাবনা নাই। এই শুভসংস্কারসম্পন্ন হওয়া অপেক্ষা আর এক উচ্চতর অবস্থা আছে—মুক্তির বাসনা। তোমাদের অবশ্য স্মরণ আছে যে, এই সকল বিভিন্ন যোগের লক্ষ্য—আত্মার

তৃতীয় অধ্যায় ।

৫৩

মুক্তি । প্রত্যেকেই সমভাবে একই স্থানে লইয়া যায় । বুদ্ধ
 ধ্যানের দ্বারা বা খৃষ্ট প্রার্থনা দ্বারা যে অবস্থা লাভ করিয়াছিলেন,
 মানুষ কেবল কৰ্ম্মের দ্বারা সেই অবস্থা লাভ করিতে পারে ।
 বুদ্ধ ছিলেন জ্ঞানী, আর খ্রীষ্ট ছিলেন ভক্ত ; কিন্তু উভয়ে সেই
 একই পদ প্রাপ্ত হইয়াছিলেন । এইটুকুই বুঝা কঠিন যে,
 মুক্তি অর্থে একেবারে সম্পূর্ণ স্বাধীনতা—শুভ বন্ধন হইতে
 যেমন, অশুভের বন্ধন হইতেও তেমনি মুক্তি । সোণার শিকলও
 শিকল, লোহার শিকলও শিকল । আমার আঙ্গুলে একটা
 কাঁটা ফুটিয়াছে, আমি আর একটা কাঁটা দ্বারা কাঁটাটী
 তুলিলাম । তুলা হইয়া গেলে দুইটা কাঁটাই ফেলিয়া দিলাম ।
 দ্বিতীয় কাঁটাটী রাখিবার দরকার নাই, কারণ, উভয়টাই কাঁটা
 ত বটে । এইরূপ, অশুভ সংস্কারগুলি শুভসংস্কার দ্বারা নাশ
 করিতে হইবে । মনের মন্দ দাগগুলি তুলিয়া উহার উপর
 ভাল দাগ ফেলিতে হইবে, যতদিন না যাহা কিছু মন্দ
 একেবারে প্রায় অন্তর্হিত হইয়া যায়, অথবা জিত হয়, অথবা
 মনের এক কোণে বশীভূত ভাবে থাকে । কিন্তু তৎপরে শুভ
 সংস্কারগুলিকেও জয় করিতে হইবে । তখনই যে ‘আসক্ত’
 ছিল, সে ‘অনাসক্ত’ হইয়া যায় । কার্য্য কর, কিন্তু যেন ঐ
 কার্য্য বা চিন্তা মনের উপর প্রবল ভাবে কোন সংস্কার
 ফেলিয়া না যায় । তরঙ্গ আঙ্গুক, পেশী ও মস্তিষ্ক হইতে মহৎ
 মহৎ কার্য্য বাহির হউক, কিন্তু তাহারা যেন আত্মার উপর
 গভীর দাগ রাখিয়া যাইতে না পারে । ইহা করিবার উপায়

কি ? আমরা দেখিতে পাই, যে কার্যে আমরা আপনাদিগকে মিশ্রিত করি, তাহারই সংস্কার থাকিয়া যায় ।

সমস্ত দিন আমার সহিত শত শত লোকের সাক্ষাৎ হইয়া থাকিতে পারে, কিন্তু আমি যাহাকে ভালবাসি, তাহার সহিতও আমার সাক্ষাৎ হইল । রাত্রে যখন আমি শয়ন করিতে গেলাম, তখন আমি আমার দৃষ্ট সমুদয় মুখগুলির বিষয় চিন্তা করিবার চেষ্টা করিতে পারি, কিন্তু এক মিনিটের জন্য যে মুখখানি দেখিয়াছিলাম, যাহাকে আমি ভালবাসিতাম, সেই মুখখানিই আমার নিকটে আসিল, অপরগুলি কোথায় অন্তর্হিত হইল ! আমার ঐ ব্যক্তির প্রতি বিশেষ আসক্তি বশতঃ অগ্ন্যাগ্ন মুখগুলি অপেক্ষা ঐটিই আমার মনে বিশেষ কার্য্য করিয়াছিল । শরীর সম্বন্ধে ঐ সকলগুলিরই একরূপ প্রভাব বলিতে হইবে । যে মুখগুলিই আমি দেখিয়াছি, সকল গুলিরই ছবি আমার অক্ষিজালের* উপর পড়িয়াছিল, মস্তিষ্ক ঐ ছবি লইয়াছিল, তথাপি মনের উপর উহাদের প্রভাব একরূপ হয় নাই । কিন্তু এক ব্যক্তির চকিতমাত্র দর্শন আমার চিত্তের মধ্যে এতদূর গভীর প্রভাব বিস্তার করিয়াছে । তাহার কারণ এই যে, অগ্ন্যাগ্ন মুখগুলির সহিত আমার চিন্তাভ্যস্তরস্ব কোন ভাবের সাদৃশ্য ছিল না, তাহাদের মধ্যে অনেকগুলি হয় ত সম্পূর্ণ নূতন—এমন

* অক্ষিজাল—Retina. চক্ষুগোলকের পশ্চাভাগস্থ কোমল পদার্থ-বিশেষ । ঐ স্থানে চাক্ষুষ স্নায়ু-সূত্রগুলি শেষ হইয়াছে । ইহার উপর বস্তুর চিত্র পতিত হইয়া চাক্ষুষ জ্ঞান উৎপন্ন হয় ।

সকল নূতন মুখ হয় ত দেখিয়াছি, যাহাদের সম্মুখে আমি কখন চিন্তাই করি নাই, কিন্তু যে মুখখানির একবার মাত্র চকিত দর্শন পাইয়াছি, তাহার সহিত চিন্তাভ্যন্তরস্থ বিষয়ের বিশেষ সংশ্রব ছিল। হয় ত কত বৎসর ধরিয়া তাহার ছবি ভাবিতেছিলাম, তাহার সম্মুখে শত শত বিষয় জানিতাম, আর এই একবার দর্শনরূপ নূতন বিষয় মনের ভিতরকার শত শত সদৃশ বিষয় পাইল, তাহাতে এই সকল সম্বন্ধ জাগরিত হইল। এই সমুদয় বিভিন্ন মুখগুলি দেখার সমবেত ফলে মনে যে সংস্কার পড়িল, ঐ একখানি মুখ দেখিয়া মানসপটে তদপেক্ষা শতগুণ সংস্কার পড়িল। সেই কারণেই উহা মনের উপর সহজেই প্রবল প্রভাব বিস্তার করিয়াছিল।

অতএব অনাসক্ত হও, কার্য্য চলিতে থাকুক—মস্তিষ্ক-কেন্দ্র-সমূহ কার্য্য করুক—নিরন্তর কার্য্য করুক, কিন্তু একটা তরঙ্গও যেন মনকে জয় না করিতে পারে। তুমি যেন সংসারে বিদেশী পথিক, যেন দুদিনের জন্য আসিয়াছ, এই ভাবে কার্য্য করিয়া যাও, নিরন্তর কার্য্য কর, কিন্তু নিজেকে যেন বন্ধনে ফেলিও না; বন্ধন বড় ভয়ানক। এই জগৎ আমাদের বাসভূমি নহে, আমাদের নানা সোপানের ভিতর দিয়া যাইতে হয়, জগৎও তদ্রূপ একটা সোপান-বিশেষ; ইহার মধ্য দিয়া আমরা চলিতেছি মাত্র। সাংখ্যের সেই মহাবাক্য স্মরণ রাখিও,—“সমুদয় প্রকৃতি—আত্মার জন্ম, আত্মা প্রকৃতির জন্ম নহেন।” প্রকৃতির অস্তিত্বের প্রয়োজন আত্মার শিক্ষার জন্য, প্রকৃতির অণু

কোন প্রয়োজন নাই। প্রকৃতির অস্তিত্বের প্রয়োজনই এই যে, আত্মা যাহাতে জ্ঞানলাভ করিতে পারে, আর জ্ঞানের দ্বারাই আত্মা আপনাকে মুক্ত করিতে পারে। আমরা যদি সর্বদাই ইহা স্মরণ রাখি, তবে আমরা প্রকৃতিতে কখনই আসক্ত হইব না; আমরা জানিব, প্রকৃতি আমাদের একটা পাঠ্য পুস্তক মাত্র। উহা হইতে জ্ঞান লাভ করিবার পর, ঐ গ্রন্থের আর আমাদের নিকট কোন মূল্য থাকে না। তাহা না করিয়া আমরা প্রকৃতির সহিত আপনাদিগকে মিশাইয়া ফেলিতেছি, আমরা ভাবিতেছি, আত্মাই প্রকৃতির জন্য; যেমন সাধারণ চলিত কথা আছে যে, ‘কেহ কেহ খাইবার জন্যই জীবন ধারণ করিয়া থাকে, কেহ আবার জীবন ধারণ করিবার জন্য খাইয়া থাকে।’ আমরা সর্বদাই এই ভুল করিতেছি। আমরা প্রকৃতিকে ‘আমি’ ভাবিয়া ভ্রমে পড়িতেছি, আর উহাতে আসক্ত হইতেছি। এই আসক্তি হইতেই আত্মার উপর প্রবল সংস্কার পড়িতেছে। উহাতেই আমরা আপনাদিগকে বদ্ধ করিয়া রাখিয়া দাসবৎ কার্য্য করাইতেছে।

মোট কথা হইতেছে এই যে, প্রভুর মত কার্য্য করিতে হইবে, ক্রীতদাসের মত নয়। কার্য্য সর্বদা কর, কিন্তু দাসের মত কার্য্য করিও না। সকলে কেমন কার্য্য করিতেছে, তাহা কি দেখিতেছ না? কেহই বিশ্রাম লাভ করিতে পারে না। শতকরা নিরনব্বই জন লোক দাসবৎ কার্য্য করিয়া থাকে, তাহার ফল দুঃখ; ঐরূপ কার্য্য স্বার্থপর। স্বাধীনতার সহিত কার্য্য কর, প্রেমের সহিত কার্য্য কর। প্রেম শব্দটা বুঝা বড়

কঠিন। স্বাধীনতা না থাকিলে প্রেম আসিতেই পারে না। ক্রীত-দাসের ত প্রেম নাই। একটী ক্রীতদাস কিনিয়া শিকলে বাঁধিয়া যদি তাহাকে কায করাও, সে বাধ্য হইয়া কষ্টে স্বেচ্ছা কায করিবে বটে, কিন্তু তাহার প্রেম থাকিবে না। এইরূপ যখন আমরা জগতের জন্য দাসবৎ কার্য্য করি, তাহাতে আমাদের প্রেম থাকে না, সুতরাং তাহা প্রকৃত কার্য্য নহে। আমাদের আত্মীয় বন্ধু বান্ধবের জন্য আমরা যে কায করি, এমন কি, আমাদের নিজের জন্য যে কায করি, তাহার সম্বন্ধেও ঐ কথা খাটে।

স্বার্থের জন্য কৰ্ম্ম দাসস্থলভ কৰ্ম্ম। আর কোন কৰ্ম্ম স্বার্থের জন্য কিনা, তাহার এই পরীক্ষা—প্রেমের সহিত যে কোন কার্য্য হয়, তাহাতেই সুখ আসিয়া থাকে। প্রকৃত প্রেমপ্রণোদিত এমন কোন কার্য্য নাই, যাহার ফলস্বরূপ শাস্তি ও আনন্দ না আসিবে। প্রকৃত সত্তা, প্রকৃত জ্ঞান, প্রকৃত প্রেম অনন্ত-কালের জন্য পরস্পর সম্বন্ধে সম্বন্ধ আর প্রকৃত পক্ষে ইহারা একে তিন। যেখানে উহাদের মধ্যে একটী বর্তমান, সেখানে অপর-গুলিও অবশ্যই থাকিবে। উহারা সেই অদ্বিতীয় সচ্চিদানন্দেরই ত্রিবিধ রূপ। যখন সেই সত্তা সান্ত ও আপেক্ষিকভাবাপন্ন হয়, তখন উহাকে আমরা জগৎ-স্বরূপে দেখিয়া থাকি। সেই জ্ঞানও আবার জাগতিকবস্তুবিষয়ক জ্ঞানে পরিণত হয় এবং সেই আনন্দ মানবহৃদয়ে যত প্রকার প্রকৃত প্রেম আছে, তাহার ভিত্তিস্বরূপ হয়। অতএব প্রকৃত প্রেম, প্রেমিক অথবা প্রেমা-স্পদ কাহারও কষ্টের কারণ হইতে পারে না।

মনে কর, কোন লোক কোন স্ত্রীলোককে ভালবাসে । সে নিজেই তাহাকে একা দখল করিতে চায়, প্রতি মুহূর্তে তাহাকে লইয়া তাহার ঈর্ষ্যা উদয় হয় । তাহার ইচ্ছা, সে তাহার নিকট বসুক, তাহার নিকট দাঁড়াক এবং তাহার ইঙ্গিতে খাওয়া দাওয়া চলা ফেরা প্রভৃতি সব কায করুক । সে ঐ স্ত্রীলোকটির ক্রীতদাস হইয়া পড়িয়াছে এবং তাহাকেও আপনার ক্রীতদাস করিয়া রাখিবার ইচ্ছা করিতেছে ; উহা ভালবাসা নয়, উহা ক্রীতদাসের এক প্রকার ভাববিকার মাত্র, উহা যেন ভালবাসার মত দেখাইতেছে, বস্তুতঃ ভালবাসা নহে । উহা ভালবাসা নহে, কারণ, উহাতে যন্ত্রণা আছে । যদি সে তাহার ইচ্ছা সম্পাদন না করে, তাহার যন্ত্রণা আসিবে । ভালবাসায় কোন যাতনাকর প্রতিক্রিয়া নাই । ভালবাসার প্রতিক্রিয়ায় কেবল আনন্দই আসিয়া থাকে । যদি তাহা না হয়, সেটী ভালবাসা নয়, আমরা অপর কিছুকে ভালবাসা বলিয়া ভুল করিতেছি । যখন তুমি তোমার স্বামী, স্ত্রী, ছেলেপিলে, এমন কি, সমুদয় জগৎকে এমন ভাবে ভালবাসিতে সমর্থ হইবে যে, তাহাতে কোনরূপ যন্ত্রণা, ঈর্ষ্যা বা স্বার্থপরতারূপ প্রতিক্রিয়ার উদয় হইবে না, তখনই তুমি প্রকৃত পক্ষে অনাসক্ত হইতে পারিবে ।

শ্রীকৃষ্ণ বলিতেছেন, “দেখ অৰ্জুন, যদি আমি এক মুহূর্ত কৰ্ম হইতে বিরত হই, সমুদয় জগৎ নষ্ট হইবে, কিন্তু আমার জগৎ হইতে লাভের কিছুই নাই । আমিই জগতের একমাত্র

প্রভু। কৰ্ম্ম করিয়া আমার কোন লাভ নাই। তবে আমি কৰ্ম্ম করি কেন? জগৎকে ভালবাসি বলিয়া।” ঈশ্বর ভালবাসেন বলিয়াই তিনি অনাসক্ত। এই প্রকৃত ভালবাসা আমাদেরকে অনাসক্ত করিয়া ফেলে। যেখানেই এই আসক্তি দেখিবে,—পরস্পর এই ভয়ানক আকর্ষণ,—সেখানেই জানিবে, উহা শারীরিক আকর্ষণ—কতকগুলি জড়বিন্দুর সহিত আর কতকগুলি জড়বিন্দুর ভৌতিক আকর্ষণ—কিছু যেন দুইটি বস্তুকে ক্রমাগত নিকটবর্তী করিতেছে। আর উহারা পরস্পর খুব নিকটবর্তী না হইতে পারিলেই যন্ত্রণার উদ্ভব। কিন্তু যেখানে প্রকৃত ভালবাসা, সেখানে ভৌতিক আকর্ষণ কিছুমাত্র নাই। প্রকৃত প্রেমিক ব্যক্তিগণ পরস্পর সহস্র মাইল ব্যবধানে থাকিতে পারেন, তাহাতে ভালবাসার কিছুমাত্র ক্ষতি হইবে না এবং কোন-রূপ যন্ত্রণাকর প্রতিক্রিয়াও হইবে না।

এই অনাসক্তি লাভ করা একরূপ সারা জীবনের কার্য্য বলিলেও হয়। কিন্তু উহা লাভ করিতে পারিলেই, আমরা প্রকৃত লক্ষ্যস্থলে উপনীত হইলাম ও মুক্ত হইলাম। তখন প্রকৃতির বন্ধন আমাদের নিকট হইতে খসিয়া পড়ে, আমরা প্রকৃতির প্রকৃত স্বরূপ দেখিতে পাই। প্রকৃতি আমাদের পায়ে আর শিকল পরাইতে পারে না। আমরা তখন সম্পূর্ণ স্বাধীন ভাবে দাঁড়াইতেও পারি, ফলাফলের দিকে লক্ষ্যশূন্য হই। ভাল মন্দ কি ফল হইল, তখন কে গ্রাহ্য করে? যে স্বাধীন ভাবে কৰ্ম্ম করে, সে ফলাকাঙ্ক্ষা করে না।

ছেলেদের কিছু দিলে তোমরা কি ছেলেদের নিকট হইতে তাহার কিছু প্রতিদান চাও ? তাহাদের জন্য কায করা তোমার কর্তব্য—ঐখানেই উহা শেষ হইল । কোন বিশেষ ব্যক্তি, নগর বা রাজ্যের জন্য যাহা করিতে ইচ্ছা কর, করিয়া যাও, কিন্তু ছেলের প্রতি তোমার যেরূপ ভাব, উহাদের প্রতি সেই ভাব ধারণ কর, উহাদের নিকট হইতে কিছু আশা করিও না । যদি তুমি সর্বদাই এই ভাব অবলম্বন করিতে পার যে, তুমি দাতামাত্র, তুমি যাহা দিতেছ, তুমি তাহা হইতে প্রত্যাশার কোন আশা রাখ না, তবে সেই কর্মে তোমার কোন আসক্তি আসিবে না । যখন আমরা কিছু প্রত্যাশা করি, তখনই আসক্তি আইসে ।

যদি দাসবৎ কার্য্য করিলে তাহাতে স্বার্থপরতা ও ফলাসক্তি আসে, তাহা হইলে নিজ মনের প্রভুবৎ কার্য্য করিলে তাহাতে অনাসক্তিজনিত আনন্দ আসিয়া থাকে । আমরা সর্বদাই অধিকার ও শ্রমের কথা কহিয়া থাকি, কিন্তু দেখিতে পাই, উহারা কেবল শিশুশূলভবাক্যমাত্র । কেবল দুইটী জিনিষ আছে, যাহা মানবের চরিত্র-নিয়মের প্রকৃতপক্ষে কার্য্যকরী হইয়া থাকে—জোরজুলুম ও দয়া । জোরজুলুম করা চিরকালই স্বার্থপরতারূপের পরিচালনা । সকল নরনারীই তাহাদের যতটা শক্তি ও সুবিধা আছে, তাহার যতদূর পারে, সহায়তা লইতে চাহে । দয়া স্বর্গতুল্য । ভাল হইতে গেলে আমাদের সকলকে দয়াবান হইতে হইবে । এমন কি, শ্রম, অধিকার, শক্তি—এসকলই দয়ার উপর প্রতিষ্ঠিত । কার্য্য করিয়া তাহার প্রতিদান লাভের চিন্তাই আমা-

দের আধ্যাত্মিক উন্নতির প্রতিবন্ধক। শুধু তাহাই নহে, পরিণামে উহাতে অনেক কষ্ট লইয়া আসে। কেবল যে কার্য সমগ্র মানবসমাজ ও প্রকৃতির জন্য স্বাধীনভাবে করা হয়, তাহাতে কোনরূপ বন্ধন আনয়ন করে না। আর এক উপায় আছে, যাহাতে এই দয়া ও নিঃস্বার্থপরতাকে কার্যে পরিণত করা যাইতে পারে অর্থাৎ যদি আমরা সগুণ ঈশ্বরে বিশ্বাস করি, তবে কার্যকে উপাসনা বলিয়া চিন্তা করিতে হইবে। আমরা এক্ষেত্রে আমাদের সমুদয় কর্মফল ভগবানে অর্পণ করিয়া থাকি। এইরূপে তাঁহাকে উপাসনা করিলে আমাদের কার্যের জন্য মানবজাতির নিকট কিছু আশা করিবার আমাদের অধিকার নাই। প্রভু স্বয়ং সর্বদা কার্য করিতেছেন এবং তাঁহার কখনই কোনরূপ আসক্তি নাই। যেমন জল পদ্মপত্রকে ভিজাইতে পারে না, সেইরূপ কার্য ফলাসক্তি উৎপন্ন করিয়া নিঃস্বার্থপর ব্যক্তিকে বন্ধন করিতে পারে না। অহংশূন্য ও অনাসক্ত ব্যক্তি জনপূর্ণ ও পাপসঙ্কুল সহরের অভ্যন্তরে যাইতে পারেন, তিনি তাহাতে পাপে লিপ্ত হইবেন না।

এই সম্পূর্ণ স্বার্থত্যাগের ভাবটী নিম্নলিখিত গল্পটীতে স্ফুটীকৃত হইয়াছে। কুরুক্ষেত্র-যুদ্ধের অবসানে পঞ্চপাণ্ডবে মিলিয়া একটী মহাযজ্ঞ করিলেন। তাহাতে দরিদ্রদিগকে নানাবিধ বহুমূল্য বস্তু দান করা হইল। সকল ব্যক্তিই ঐ যজ্ঞের জাঁকজমক ও ঐশ্বর্যে চমৎকৃত হইল আর বলিতে লাগিল, জগতে পূর্বে এরূপ যজ্ঞ আর হয় নাই। যজ্ঞশেষে এক ক্ষুদ্রকায় নকুল আসিয়া উপস্থিত হইল। তাহার অর্দ্ধশরীর হিরণ্ময়, অর্দ্ধেক পিঙ্গলবর্ণ।

সে সেই যজ্ঞভূমির মৃত্তিকায় গড়াগড়ি দিতে লাগিল । তার পর সে চতুর্দিকস্থ জনগণকে বলিল, “তোমরা সকলে মিথ্যাবাদী, ইহা যজ্ঞই নহে ।” তাহারা বলিতে লাগিল, ‘কি ! তুমি বলিতেছ, ইহা যজ্ঞই নহে ? তুমি কি জান না, এই যজ্ঞে গরীবদিগকে কত ধনরত্নাদি প্রদত্ত হইয়াছে—সকলেই ধনবান্ ও সন্তুষ্টচিত্ত হইয়া গিয়াছে ? মানুষে ইহার মত অদ্ভুত যজ্ঞ আর করে নাই ।’ নকুল বলিল, “শুনুন, একটী ক্ষুদ্র গ্রাম ছিল, তথায় এক গরীব ব্রাহ্মণ, স্ত্রী, পুত্র ও পুত্রবধূ লইয়া বাস করিতেন । ব্রাহ্মণ খুব গরীব ছিলেন ; শাস্ত্র ও ধর্মোপদেশ দ্বারা, লব্ধ ভিক্ষাই তাহার জীবিকা ছিল ।

“সেই দেশে এক সময়ে তিনবৎসরব্যাপী দুর্ভিক্ষ আসিল ; গরীব ব্রাহ্মণটি পূর্বের চেয়ে অধিক কষ্ট পাইতে লাগিলেন । অবশেষে সেই পরিবারকে পাঁচদিন ধরিয়া উপবাস করিতে হইল । ষষ্ঠ দিনে পিতা সৌভাগ্যক্রমে কিছু যবের ছাতু সংগ্রহ করিয়া আনিলেন এবং উহা চারিভাগ করিলেন । তাঁহারা উহা খাইবার উপযুক্ত করিয়া প্রস্তুত করিয়া ভোজনে বসিবেন, এমন সময়ে দরজায় ঘা পড়িল ! পিতা দ্বার খুলিয়া দিলেন, দেখিলেন, এক অতিথি দাঁড়াইয়া । ভারতবর্ষে অতিথি বড় পবিত্র ও মাণ্য । সেই সময়ের জন্য তাঁহাকে নারায়ণ মনে করা হয় এবং তাঁহার প্রতি সেইরূপ আচরণ করা হয় । গরীব ব্রাহ্মণটি বলিলেন, “আস্থন মহাশয়, আস্থন, স্বাগত, স্বাগত ।” ব্রাহ্মণ অতিথির সম্মুখে নিজ ভাগের খাদ্য রাখিলেন । অতিথি

তৃতীয় অধ্যায় ।

৬৩

অতি শীঘ্রই উহা নিঃশেষ করিয়া বলিলেন, “মহাশয়, আপনি আমাকে একেবারে মারিয়া ফেলিলেন, দেখিতেছি। আমি দশদিন ধরিয়া উপবাস করিতেছি—এই অল্পপরিমাণ খাড়ে আমার জঠরাগ্নি আরও জ্বলিয়া উঠিল।” তখন স্ত্রী স্বামীকে বলিল, “উঁহাকে আমার ভাগও দিন।” স্বামী বলিলেন, “না, তাহা হইবে না।” কিন্তু স্ত্রী জোর করিয়া বলিতে লাগিল, “এ গরীব বেচারী আমাদের নিকট উপস্থিত, আমরা গৃহস্থ, আমাদের কর্তব্য—উঁহাকে খাওয়ান, আর যখন আপনার কিছু দিবার নাই, তখন আমার উঁহাকে আমার ভাগ দেওয়া উচিত। তবেই আমার স্ত্রীর কৰ্ম্ম করা হইবে।” এই বলিয়া সে নিজ ভাগ অতিথিকে দিল। অতিথি তৎক্ষণাৎ তাহা নিঃশেষ করিলেন, আর বলিলেন, “আমি এখনও ক্ষুধায় জ্বলিতেছি।” ছেলেটা বলিল, “আপনি আমার ভাগও নিন। ছেলের কর্তব্য—পিতাকে তাঁহার কর্তব্য-পালনে সহায়তা করে।” অতিথি তাহাও খাইয়া ফেলিলেন, কিন্তু তথাপি তিনি অতৃপ্ত রহিলেন। তখন পুত্রবধূও তাহার ভাগ দিল। এইবার তাহার পর্যাাপ্ত আহার হইল। অতিথি তখন তাঁহাদিগকে আশীর্ব্বাদ করিতে করিতে চলিয়া গেলেন।

“সেই রাত্রে ঐ চারিটা লোক অনাহারে মরিয়া গেলেন। ঐ ছাতুর গোটাকতক দানা মেজেয় পড়িয়াছিল। উহার উপরে যখন আমি গড়াগড়ি দিলাম, তখন আমার অর্দ্ধেক শরীর সুবর্ণ হইয়া গেল; আপনারা সকলে ত ইহা দেখিতেছেন। সেই অবধি আমি সমুদয় জগৎ খুঁজিয়া বেড়াইতেছি, ইচ্ছা

যে, এইরূপ আর একটা যজ্ঞ দেখিব। কিন্তু আর সেরূপ যজ্ঞ দেখিতে পাইলাম না। আর কোথাওই আমার শরীরের অপরাধ স্ববর্ণরূপে পরিণত হইল না। সেই জন্যই আমি বাল-তেছি, ইহা যজ্ঞই নহে।”

ভারত হইতে এইরূপ উচ্চ স্বার্থত্যাগ ও দয়ার ভাব চলিয়া যাইতেছে; মহদাশয় ব্যক্তিদিগের সংখ্যা ক্রমশঃ কমিয়া যাইতেছে। নূতন ইংরাজী শিখিবার সময় আমি একখানি গল্পের বই পড়িয়া ছিলাম। তাহার মধ্যে প্রথম গল্পটির মর্ম্ম এই :—কোন বালক কায করিয়া বাহা কিছু উপার্জন করিয়াছিল, সবই তাহার বৃদ্ধা জননীকে দিয়াছিল। বইএর ৩৪ পৃষ্ঠা ধরিয়া বালকের এই কর্তব্যপরায়ণতার প্রশংসা করা হইয়াছে। কিন্তু ইহাতে অসাধারণত্ব কি আছে? কোন হিন্দু বালকই এই গল্পের অভ্যন্তরে যে কি নীতিশিক্ষা আছে, তাহা ধারণা করিতে পারে না। এখন পাশ্চাত্যদেশের ভাব—‘চাচা, আপন বাঁচা’, শুনিয়া আমি ইহা বুঝিতে পারিতেছি। এদেশে এমন লোকও অনেক আছে, যাহারা আপনারাই সমুদয় ভোগ করিতে থাকে, বাপ মা স্ত্রীপুত্র-দিগকে একেবারে ভাসাইয়া দেয়। গৃহস্থের কুত্রাপি ও কদাপি এরূপ আদর্শ হওয়া উচিত নহে।

এখন তোমরা বুঝিতেছ, কৰ্ম্মযোগের অর্থ কি। উহার অর্থ—সম্মুখে মৃত্যু আসিলেও মুখটা বুজাইয়া সকলকে সাহায্য করা। লক্ষ লক্ষ বার লোকে তোমায় প্রতারণা করুক, কিন্তু তুমি একটা কথাও কহিও না আর তুমি যে কিছু

ভাল কাৰ্য্য করিতেছ, এ বিষয়ও ভাবি না। দরিদ্রগণকে তুমি যে দান করিতেছ, তাহার জন্য বাহাদুরি করিও না, অথবা তাহাদের কৃতজ্ঞতার আশাও রাখিও না, বরং তাহারা যে তোমায় তাহাদের প্রতি দয়া প্রকাশ করিবার সুযোগ দিয়াছে, তজ্জন্য তাহাদের প্রতি কৃতজ্ঞ হও। অতএব স্পৰ্শই দেখা বাইতেছে, আদর্শ সন্ন্যাসী হওয়া অপেক্ষা আদর্শ গৃহী হওয়া কঠিন। ত্যাগী ও কৰ্ম্মী উভয়েই ঠিক পথে বাইতেছেন এবং ত্যাগীর কঠোর জীবন হইতে কৰ্ম্মীর জীবন কঠোরতর না হইলেও অন্ততঃ তাঁহার মতই কঠোর বটে।

চতুর্থ অধ্যায় ।

কর্তব্য কি ?

কর্মযোগের তত্ত্ব বুঝিতে হইলে কার্য্য কাহাকে বলে, তাহা জানা আমাদের আবশ্যিক । ইহা হইতেই স্বাভাবিক এই প্রশ্ন আইসে যে, কর্তব্য কি ? আমার যদি কিছু করিতে হয়, তবে প্রথমে আমাকে আমার কর্তব্য কি, জানিতে হইবে এবং দেখিতে হইবে, তাহা করিবার শক্তি আমার আছে কি না । কর্তব্যজ্ঞান আবার বিভিন্ন জাতিতে বিভিন্ন । মুসলমান বলেন, তাঁহার শাস্ত্র কোরাণে যাহা লিখিত আছে, তাহাই তাঁহার কর্তব্য । হিন্দু বলেন, তাঁহার বেদে যাহা আছে, তাহাই তাঁহার কর্তব্য । খ্রীষ্টান আবার বলেন, তাঁহার বাইবেলে যাহা আছে, তাহাই তাঁহার কর্তব্য । সুতরাং আমরা দেখিলাম, জীবনের বিভিন্ন অবস্থায়, বিভিন্ন কালে ও বিভিন্ন জাতির ভিতরে কর্তব্যের ভাব অবশ্যই ভিন্ন ভিন্ন রূপ হইবে । অত্যান্ত সার্বভৌমিক ভাব-বোধক শব্দের ন্যায় কর্তব্য শব্দেরও লক্ষণ করা কঠিন । আমরা ইহার আনুষঙ্গিক সমুদয় ব্যাপার, কর্মজীবনে উহার পরিণতি ও ফলাফল জানিয়াই উহার সম্বন্ধে একটা ধারণা করিতে পারি ।

যখন আমাদের সম্মুখে কতকগুলি ঘটনা ঘটে, তখন

আমাদের সকলেরই সেই বিষয়ে কোন বিশেষভাবে কার্য্য করিবার জন্য স্বাভাবিক অথবা পূর্বসংস্কারানুযায়ী ভাব উদয় হয়। সেই ভাব উদয় হইলে মন সেই বিষয়-সম্বন্ধে চিন্তা করিতে আরম্ভ করে। কখনও মনে করে, এরূপ অবস্থায় এইরূপ ভাবে কার্য্য করাই সম্ভব, আবার অন্য সময়ে ঠিক সেইরূপ অবস্থা হইলেও তদ্রূপ ভাবে কার্য্য করা অনায়াস বলিয়া মনে করে। সর্বত্রই কর্তব্যের এই সাধারণ ধারণা দেখা যায় যে, সকল সৎ ব্যক্তিই নিজ বিবেকের (conscience) আদেশানুযায়ী কৰ্ম্ম করিয়া থাকেন। কিন্তু কার্য্যবিশেষ কি হইলে কর্তব্যলক্ষণাক্রান্ত হয়? প্রাণসংশয়স্থলে যদি খ্রীষ্টিয়ান সম্মুখে গোমাংস পাইয়া নিজের প্রাণরক্ষার্থ উহা আহার না করে বা অপরের প্রাণরক্ষার্থ তাহাকে না দেয়, তাহা হইলে সে নিশ্চিত কর্তব্যের অবহেলা হইল, বোধ করিবে। কিন্তু হিন্দু আবার যদি ঐরূপ স্থলে উহা ভোজন করে বা অপর হিন্দুকে উহা ভোজনার্থে প্রদান করে, সেও তদ্রূপ নিশ্চিত বোধ করিবে যে, আমার কর্তব্য লঙ্ঘন হইল। হিন্দুর শিক্ষা ও সংস্কার তাহার হৃদয়ে তদ্রূপ ভাব আনিয়া দিবে। বিগত শতাব্দীতে ভারতে ঠগ নামে বিখ্যাত দস্যুদল ছিল—তাহাদের ধারণা ছিল—যাহাকে পাইবে, তাহাকেই মারিয়া তাহার সর্বস্ব অপহরণ করাই তাহাদের কর্তব্য, আর যত বেশী লোককে মারিতে পারিত, ততই তাহারা আপনাদিগকে শ্রেষ্ঠ মনে করিত। সাধারণতঃ একজন আর এক-

জনকে গুলি করিয়া হত্যা করিলে সে মনে করে, আমি কর্তব্যভ্রষ্ট হইলাম, অন্তায় কার্য করিলাম এবং তজ্জন্য সে দুঃখিতও হইয়া থাকে। কিন্তু সেই ব্যক্তিই আবার যদি সৈন্যদলের অন্তর্ভুক্ত হইয়া শুধু এক জনকে নয়, বিশজনকে গুলি করিয়া হত্যা করে, তবে সে আনন্দিতই হইয়া থাকে এবং ভাবে, আমি আমার কর্তব্য অতি সুন্দর-ভাবে সাধন করিয়াছি। অতএব এটি বেশ সহজেই বুঝা যাইতেছে যে, কেবল কার্যটির বিচার করিয়াই কর্তব্য নির্দ্ধারিত হয় না।

বাহিরের কার্য হিসাবে কর্তব্যের একটা লক্ষণ করা সূতরাং সম্পূর্ণ অসম্ভব ;—এটি কর্তব্য, এটি অকর্তব্য, এরূপ নির্দেশ করিয়া কিছু বলা যায় না। তবে ভিতরের দিক্ হইতে কর্তব্যের লক্ষণ করা যাইতে পারে বটে। যে কোন কার্য ভগবানের দিকে লইয়া যায়, তাহাই সৎকার্য। আর যে কোন কার্য আমাদিগকে নিম্নদিকে লইয়া যায়, তাহা অসৎ কার্য। ভিতরের দিক্ হইতে দেখিলে আমরা দেখিতে পাই, কতকগুলি কার্য আমাদিগকে উন্নতিপ্রবণ করে আর কতকগুলি কার্যের প্রভাবে আমরা অবনত ও পশুভাবাপন্ন হইয়া যাই। কিন্তু সর্ববিধ ব্যক্তির পক্ষে কোন কার্যের দ্বারা কিরূপ ভাব আসিবে, তাহা নিশ্চয় করিয়া বলা অসম্ভব। কেবল একটা বিষয় আছে, যাহা সকল যুগের সকল সম্প্রদায়ের ও সকল দেশের সকল মানবজাতির সাধারণ সম্পত্তি।

উহা এই নিম্নলিখিত সংস্কৃত শ্লোকার্কে বর্ণিত হইয়াছে :—
পরোপকারঃ পুণ্যায়, পাপায় পরপীড়নম্ ।

ভগবদগীতা জন্ম ও অবস্থাগত কর্তব্যের কথা বার বার উল্লেখ করিয়াছেন । আমরা যেরূপ সমাজে জন্মগ্রহণ করিয়াছি এবং আমাদের যেরূপ অবস্থা, তাহাতেই অনেক পরিমাণে জীবনের বিভিন্ন কর্তব্যগুলি আমরা কি ভাবে দেখিব, তাহা স্থির হইয়া থাকে । এই কারণে আমাদের সামাজিক অবস্থাসঙ্গত অথচ হৃদয় ও মনের উন্নতিবিধায়ক কার্য্য আমাদের করা উচিত । কিন্তু এটি বিশেষভাবে স্মরণ রাখিতে হইবে যে, সকল সমাজে ও সকল দেশে একপ্রকার আদর্শ ও একপ্রকার কার্য্যপ্রণালী প্রচলিত নহে । আমাদের এতদ্বিষয়ক অজ্ঞতাই এক জাতির প্রতি অপর জাতির ঘৃণার প্রধান কারণ । মার্কিনেরা ভাবেন, তাঁহাদের দেশের প্রথাই সর্বোৎকৃষ্ট, সুতরাং যে ব্যক্তি সেই প্রথার অনুসরণ না করে, সে অতি বদ লোক । হিন্দুও ভাবেন, তাঁহার আচারব্যবহারই সর্বোৎকৃষ্ট ও সত্য, সুতরাং যে কেহ উহার অনুসরণ না করে, সে অতি মন্দ লোক । আমরা অতি সহজেই এই ভ্রমে পড়িয়া থাকি এবং ইহা খুব স্বাভাবিকও বটে । তবে এই ভ্রমটী বড়ই অনিষ্টকর আর সংসারে যে পরস্পর সহানুভূতির অভাব ও পরস্পর ঘৃণা দেখা যায়, তাহার অর্ধেকেরও বেশী এই ভ্রম হইতেই উৎপন্ন হইয়া থাকে । আমি যখন প্রথম এদেশে আসি, তখন একদিন চিকাগো মেলায়

মধ্যে বেড়াইতেছিলাম—একজন লোক আমার পিছনে আসিয়া আমার পাগড়ি ধরিয়া জোরে এক টান মারিলেন। আমি পিছু ফিরিয়া দেখি, লোকটার বেশ পরিষ্কার পরিচ্ছন্ন কাপড় চোপড়, বেশ ভদ্রলোকের মত দেখিতে। আমি তাঁহার সহিত ইংরাজীতে কথা কহিলাম—ইংরাজী বলিবামাত্র লোকটা খুব লজ্জিত হইলেন। সম্ভবতঃ তিনি ভাবিয়াছিলেন, আমি ইংরাজী কহিতে পারি না। আর একবার ঐ মেলাতেই আর একজন লোক আমাকে ধাক্কা দিয়া ঠেলিয়া দিলেন। আমি তাঁহাকে এরূপ করিবার কারণ জিজ্ঞাসা করাতে তিনিও অপ্রতিভ হইলেন, শেষে আমতা আমতা করিতে করিতে আমার নিকট ক্ষমা প্রার্থনা করিয়া বলিলেন, “আপনি অমন করিয়া পোষাক করিয়াছেন কেন?” এই ব্যক্তি—যিনি আমাকে আমি তাঁহার মত পোষাক করি না কেন জিজ্ঞাসা করিলেন এবং আমার ঐ বেশের দরুন আমার প্রতি অসদ্ব্যবহার করিতে ইচ্ছা করিয়াছিলেন, তিনি সম্ভবতঃ খুব ভাল লোক; তিনি হয় ত সম্ভ্রান্তবংশল পিতা এবং একজন শিষ্ট সজ্জন ব্যক্তি; কিন্তু যখনই তিনি একটা লোককে ভিন্নবেশপরিহিত দেখিলেন, তখনই তাঁহার প্রকৃতিসিদ্ধ সহৃদয়তা নষ্ট হইয়া গেল। সকল দেশেই বৈদেশিকদিগকে অনেক অত্যাচার সহ্য করিতে হয়, কারণ, তাহারা সাধারণতঃ নূতন অবস্থায় পড়িয়া কিরূপে আত্মরক্ষা করিতে হয়, তাহা জানে না। এই জন্য তাহারা সেই দেশের লোকের সম্বন্ধে একটা ভুল ধারণা লইয়া

যায়। নাবিক, সৈন্য ও বণিকগণ বিদেশে এমন অদ্ভুত ব্যবহার করিয়া থাকে, যাহা তাহারা নিজেদের দেশে থাকিতে স্বপ্নেও ভাবিতে পারে না। এই কারণেই বোধ হয়, চীনেরা ইউরোপীয় ও মার্কিনগণকে “বিদেশীভূত” বলিয়া থাকে।

সুতরাং একটা বিষয় আমাদের স্মরণ রাখা আবশ্যক যে, আমরা যেন অপরের কর্তব্য বিচার করিতে হইলে তাহাদেরই চোক দিয়া দেখি, যেন অপর জাতির আচার ব্যবহার আমাদের নিজেদের মাপকাটি দিয়া মাপিতে না যাই। ইহাই আমাদের বিশেষ শিক্ষার বিষয় যে, আমার ধারণা অনুসারে সমুদয় জগৎ পরিচালিত হইতে পারে না। আমাকেই সমুদয় জগতের সহিত মিলিয়া মিশিয়া চলিতে হইবে, সমুদয় জগৎ কখন আমার ভাবের সহিত মিলিয়া মিশিয়া চলিতে পারে না। অতএব দেখিতেছি, ভিন্ন দেশকালপাত্রের আমাদের কর্তব্য কত বদলাইয়া যাইবে, আর কোন বিশেষ সময়ে আমাদের যাহা কর্তব্য, তাহাই ভাল করিয়া করাই জগতে আমাদের সর্ববিশ্রেষ্ঠ কর্ম। প্রথম আমাদের জন্মপ্রাপ্ত কর্তব্য করা আবশ্যক তার পর আমাদের পদের যাহা কর্তব্য, তাহা করিতে হইবে। প্রত্যেক ব্যক্তিই জীবনে কোন না কোন অবস্থায় অবস্থিত; তাহার প্রথমে সেই অবস্থা-সঙ্গত কর্তব্য করা আবশ্যক। মানুষ্যত্ববাবের একটা বিশেষ দুর্বলতা এই যে, মানুষ কখনই নিজের প্রতি দৃষ্টি করে না। সে ভাবে, রাজার হায়ে সেও সিংহাসনে বসিবার উপযুক্ত।

যদিও সে উপযুক্ত হয়, তথাপি তাহাকে দেখান উচিত যে, সে অগ্রে নিজ অবস্থা-সঙ্গত কার্য্য করিয়াছে। তাহা সম্পন্ন করিলে পরে তাহার নিকট উচ্চতর কর্তব্য আসিবে।—সে জগৎকে দেখাক যে, যে ক্ষুদ্র কার্য্যভার তাহার স্কন্ধে গ্ৰস্ত হইয়াছে, তাহা উত্তমরূপে পালন করিতে সে সম্পূর্ণ সক্ষম। তাহা করিতে পারিলেই তাহার নিকট অপর শ্রেষ্ঠতর কার্য্য আসিবে। আমরা যখন সংসারে রীতিমত কার্য্যে প্রবৃত্ত হই, প্রকৃতি আমাদের প্রকৃত অবস্থা জানিতে সক্ষম করেন। যে, যে কার্য্যের উপযুক্ত নহে, সে দীর্ঘকাল সেই পদে থাকিয়া সকলের সম্ভাষণ বিধান করিতে পারে না। প্রকৃতি যেটা যেমন করিয়া বিধান করিয়াছেন, যেটা যেমন ভাবে সাজাইয়াছেন, তাহার বিরুদ্ধে বিরক্তি প্রকাশ করিয়া কোন ফল নাই। ছোট কায করে বলিয়াই মানুষ ছোট হইয়া যায় না। কাহারও কর্তব্যের প্রকৃতি দেখিয়া তাহাকে বিচার করা উচিত নহে, যে ভাবে সে সেই কার্য্য করিয়া থাকে, তদ্বারাই তাহাকে বিচার করিতে হইবে।

পরে দেখিব, এই কর্তব্যের ধারণা পর্য্যন্ত আমাদের উল্টাইয়া ফেলিতে হইবে, আর তখনই মানুষ খুব শ্রেষ্ঠ কৰ্ম্ম করিতে পারে, যখন পশ্চাতে বাসনার উত্তেজনা প্রায় থাকে না। তাহা হইলেও এই কর্তব্য-জ্ঞানে কার্য্যই আমাদের কর্তব্য-জ্ঞানের অতীত কার্য্যে লইয়া যায়। তখন কার্য্য

উপাসনারূপে পরিণত হয়, শুধু তাহাই নহে, কার্য কেবল কার্যের জগুই অনুষ্ঠিত হইয়া থাকে। তবে ইহা আদর্শমাত্র, উহার পথ এই কর্তব্য। আমরা পরে দেখিব, কর্তব্য নীতি-রূপ বা প্রেম-রূপ যে সকল ভিত্তির উপর স্থাপিত, তৎ-সমুদয়ের রহস্য এই,—কাঁচা আমিকে ক্রমশঃ সূক্ষ্ম করা, যাহাতে পাকা আমি নিজ মহিমায় শোভা পাইতে পারেন, নিম্নস্তরের শক্তিক্ষয় নিবারণ, যাহাতে আত্মা উচ্চ উচ্চভূমিতে আপনাকে প্রকাশ করিতে পারেন। নীচ বাসনাগুলি উদয় হইলেও যদি উহাদিগকে চরিতার্থ না করা যায়, তাহা হইলেই আত্মার মহিমার বিকাশ হইয়া থাকে—কর্তব্য কৰ্ম করিতে গেলেও অনিবার্যরূপে এই স্বার্থত্যাগের আবশ্যক হইয়া থাকে। এইরূপে জ্ঞাতসারে বা অজ্ঞাতভাবে সমুদয় সমাজ-সংহতি উৎপন্ন হইয়াছে; উহা যেন কার্যক্ষেত্র—সদসৎপরীক্ষাভূমি। এই কার্যক্ষেত্রে স্বার্থপূর্ণ বাসনা কমাইতে কমাইতে আগর মানবের প্রকৃত স্বরূপের অনন্ত বিস্তৃতির পথ খুলিয়া দিই। ভিতরের দিক হইতে দেখিলে কর্তব্যের এই একটি সুনিশ্চিত নিয়ম পাওয়া যায় যে, স্বার্থপরতা ও ইন্দ্রিয়পরায়ণতা হইতে পাপ ও অসাধুতার উদ্ভব আবার নিঃস্বার্থ প্রেম ও আত্মসংযম হইতে ধর্মের বিকাশ।

কর্তব্য কিন্তু খুব কম সময়েই মিষ্ট লাগে। কেবল প্রেম কর্তব্য-চক্রকে স্নেহান্ত করিলেই উহা বেশ মন্থণ ভাবে চলিতে আরম্ভ হয়। নতুবা ক্রমাগত ঘর্ষণ! কোন

পিতা মাতা সন্তানদের প্রতি ঠিক কর্তব্য করিতে পারেন ? কোন্ সন্তান বা পিতামাতার প্রতি কর্তব্য করিতে পারেন ? কোন্ স্বামী স্ত্রীর প্রতি, আর কোন্ স্ত্রীই বা স্বামীর প্রতি কর্তব্য পালন করিতে পারেন ? আমরা আমাদের জীবনে প্রতিদিনই কি ক্রমাগত সংঘর্ষ দেখিতেছি না ? প্রেমমাখা হইলেই কর্তব্য মিষ্ট হয় । প্রেম আবার কেবলমাত্র স্বাধীনতাতেই দীপ্তি পায় । কিন্তু ইন্দিয়ের দাস, ক্রোধের দাস, ঈর্ষ্যার দাস এবং শত শত ছোট ছোট ঘটনা যাহা সংসারে প্রত্যহ ঘটিয়া থাকে, তাহার দাস হওয়াই কি স্বাধীনতা ? আমরা জীবনে যত প্রকার ক্ষুদ্র ক্ষুদ্র কর্কশভাব প্রত্যক্ষ করি, ঐ গুলিতে সহিষ্ণুতা অবলম্বনই স্বাধীনতার সর্বোচ্চ অভিব্যক্তি । স্ত্রীলোকে আপনাদের নিজেদের সহজে উত্তেজিত, ঈর্ষ্যাপূর্ণ মেজাজের দাস হইয়া তাহাদের স্বামীর প্রতি দোষারোপ করিয়া থাকে । তাহারা বলিয়া থাকে, এবং মনে করিয়া থাকে, আমরা স্বাধীন, কিন্তু জানে না যে, তাহারা আপনাদিগকে প্রতিপদে দাস বলিয়া প্রতিপন্ন করিতেছে । যে সকল স্বামী সর্বদাই তাহাদের স্ত্রীর দোষ দেখিতেছে, তাহাদের সম্বন্ধেও তদ্রূপ ।

ব্রহ্মচর্য্যই পুরুষ ও স্ত্রীর প্রথম ধর্ম্ম ; আর এমন মানুষ পাওয়া দুর্ঘট, (সে যতদূর মন্দ হইয়া যাউক না কেন) নত্ৰা প্রেমিকা সতী স্ত্রী যাহাকে ফিরাইয়া সৎপথে না আনিতে পারে । জগৎ এখনও এতদূর মন্দ হয় নাই । সমুদয় জগতে

আমি নৃশংস পতি ও পুরুষের অপবিত্রতা সম্বন্ধে অনেক শুনিয়াছি, কিন্তু আমার নিজের অভিজ্ঞতা এই যে, নৃশংসা ও অপবিত্রা স্ত্রীলোকের সংখ্যাও পুরুষের সংখ্যার অনুরূপ ।

যদি আমেরিকার স্ত্রীলোকেরা, তাঁহারা নিজেরা যতদূর বড়াই করেন, ততদূর পবিত্র ও সৎ হইতেন (বিদেশী লোকে তাহা শুনিয়া তাঁহাদিগকে খুব পবিত্র ও সৎ বলিয়াই বিশ্বাস করে), তবে আমি নিশ্চয় বলিতে পারি, এদেশে একটাও অপবিত্র লোক থাকিত না । মানুষ কাহাকে লইয়া অপবিত্র হইবে ? এমন পাশব ভাব কি আছে, পবিত্রতা ও সতীত্ব যাহা জয় না করিতে পারে ? একজন কল্যাণী সতী স্ত্রী, যিনি নিজ স্বামী ব্যতীত সকলকেই তাঁহার ছেলের মত দেখেন, আর সকল লোকের প্রতিই জননীর ভাব পোষণ করেন, তিনি পবিত্রতাশক্তিতে এতদূর উন্নত হন যে, এমন পশুপ্রকৃতি লোক নাই, যিনি তাঁহার সমক্ষে পবিত্রতার হাওয়া না অনুভব করিবেন । প্রত্যেক স্বামীও তদ্রূপ নিজপত্নী ব্যতীত অপরাপর স্ত্রীলোককে মাতা, কন্যা বা ভগিনীরূপে দেখিবেন । যে ব্যক্তি আবার ধর্ম্মাচার্য্য হইতে ইচ্ছুক, তাঁহার প্রত্যেক স্ত্রীলোকের উপর মাতৃভাব অবলম্বন করা এবং তাঁহার প্রতি সর্বদা তদ্রূপ ব্যবহার করা উচিত ।

মাতৃপদই জগতের সর্ববশ্রেষ্ঠ পদ, কারণ উহাতে সর্বাপেক্ষা অধিক নিঃস্বার্থপরতা শিক্ষা ও নিঃস্বার্থপর কার্য্য করিবার অবসর প্রাপ্ত হওয়া যায় । ভগবৎ-প্রেমই কেবল

মায়ের ভালবাসা হইতে উচ্চতর আর সবই নিম্নশ্রেণীর। মাতার কর্তব্য, প্রথমে ছেলেদের বিষয় ভাবা, তার পর নিজের বিষয়। তাহা না করিয়া যদি বাপ মা সর্বদা সামান্য খাবার দাবার বিষয়ে পর্য্যন্ত প্রথমে নিজেদের বিষয় ভাবেন,—নিজেই ভাল অংশটুকু লন তার পর ছেলেরা পাইল কি না পাইল সে দিকে দৃষ্টি না করেন, তবে ফলে এই হয় যে, বাপ মা ও ছেলে-দের ভিতর সম্বন্ধ দাঁড়ায়—পাখী আর পাখীর ছানায় সম্বন্ধের মত। পাখীর ছানাদের ডানা উঠিলে তাহারা আর বাপ মা মানে না। সেই লোকই বাস্তবিক ধন্য, যে স্ত্রীলোককে ভগবানের মাতৃভাবের প্রতিমূর্তি বলিয়া দেখিতে সক্ষম। সেই স্ত্রীলোকও ধন্য, যিনি মানুষকে ভগবানের পিতৃভাবের প্রতিমূর্তিরূপে দেখিতে পারেন। সেই সম্ভানেরাও ধন্য, যাহারা তাহাদের পিতামাতাকে ভগবানের প্রকাশরূপে দেখিতে সক্ষম হয়।

উন্নতিলাভের একমাত্র উপায় এই :—আমাদের হস্তে যে কর্তব্য রহিয়াছে, তাহারই অনুষ্ঠানে ধীরে ধীরে শক্তি সঞ্চয় করিয়া ক্রমশঃ উচ্চপথে যাওয়া, যতদিন না আমরা সেই সর্বোচ্চ অবস্থায় উপনীত হইতে পারি। কোন কর্তব্যকে আবার ঘৃণা করিলে চলিবে না। আমি আবার বলিতেছি, যে ব্যক্তি অপেক্ষাকৃত নিম্ন কার্য্য করে, সে উচ্চতর কার্য্য-কারী অপেক্ষা নিম্নদের লোক হইয়া যায় না। মানুষের কর্তব্যের প্রকার দেখিয়া তাহাকে বিচার করিলে চলিবে না, তাহার সেই কর্তব্য সম্পাদন করিবার

প্রকার দেখিতে হইবে। তাহার ঐ কার্য্য করিবার প্রকার এবং করিবার শক্তিই সেই ব্যক্তির পরীক্ষার উপায়। একজন অধ্যাপক, যে প্রত্যহ আবোল তাবোল বকিয়া থাকে, তদপেক্ষা একজন মুচি (তাহার নিজ ব্যবসা ও কার্য্য হিসাবে) শ্রেষ্ঠ, যে সর্ব্বাপেক্ষা অল্পক্ষণের মধ্যে একজোড়া শক্ত সুন্দর জুতা প্রস্তুত করিতে পারে।

কোন যুবা সন্ন্যাসী এক বনে গমন করিয়া অনেক দিন ধরিয়া, ধ্যান ভজন যোগাভ্যাস করিতে লাগিলেন। দ্বাদশ বৎসর কঠোর সাধনার পর এক দিন তিনি বৃক্ষতলে বসিয়া আছেন, এমন সময়ে তাঁহার মস্তকে কতকগুলি শুষ্ক পত্র পড়িল। তিনি উপরের দিকে চাহিয়া দেখিলেন, এক কাক ও বকে গাছের উপরে বসিয়া যুদ্ধ করিতেছে; ইহাতে তাঁহার অত্যন্ত ক্রোধ হইল। তিনি বলিলেন, “কি ! তোরা আমার মাথায় শুষ্ক পত্র ফেলিতে সাহস করিলি ?” এই বলিয়া তাহাদের দিকে যেমন ক্রোধে কটমট করিয়া চাহিলেন, অমনি তাঁহার মস্তক হইতে যোগাগ্নি নির্গত হইয়া পক্ষীগুলিকে ভস্মসাৎ করিয়া ফেলিল। তখন তাঁহার বড় আনন্দ হইল; আপনার এইরূপ শক্তির বিকাশে তিনি আনন্দে একরূপ বিহ্বল হইয়া পড়িলেন; ভাবিলেন, বাঃ, আমি এক কটাক্ষপাতে কাকবককে ভস্মসাৎ করিতে পারি ! কিছুদিন পরে তাঁহাকে ভিক্ষা করিতে নগরে যাইতে হইল। তিনি একটা দ্বারে গিয়া দাঁড়াইলেন, বলিলেন ‘মা,—আমাকে কিছু খাইতে দিন’। ভিতর হইতে আওয়াজ আসিল, “বৎস, একটু অপেক্ষা কর।” যোগী

মনে মনে বলিতে লাগিলেন, “ওরে পাপিষ্ঠা, তোর এতদূর
আস্পর্শ! তুই আমাকে অপেক্ষা করিতে বলিস্? এখনও
তুই আমার শক্তি জানিস্ না?” তিনি মনে মনে এইরূপ বলিতে-
ছিলেন, আবার সেই আওয়াজ আসিল “বৎস, নিজের এত অহ-
ঙ্কার করিও না, এ কাকবক-ভঙ্গ্য নহে।” তিনি বিস্মিত হইলেন।
অনেকক্ষণ অপেক্ষা করিবার পর অবশেষে এক স্ত্রীলোক আসি-
লেন। যোগী তাহার চরণে পড়িয়া বলিলেন, “মা, আপনি উহা
কিরূপে জানিলেন?” তিনি বলিলেন, “বাবা, আমি তোমার
যোগ যাগ কিছুই জানি না। আমি একজন সামান্য স্ত্রী। আমি
তোমাকে অপেক্ষা করিতে বলিয়াছিলাম, তাহার কারণ এই যে,
আমার স্বামী পীড়িত, আমি তাঁহার সেবা করিতেছিলাম, ইহা
আমার কর্তব্য কর্ম। আমি সারা জীবন কর্তব্য করিবার চেষ্টা
করিয়াছি। যখন অবিবাহিত ছিলাম, তখন কন্যার কর্তব্য যাহা,
তাহা করিয়াছি। এক্ষণে বিবাহিত হইয়াও আমার কর্তব্য করি-
তেছি। ইহাই আমার যোগাভ্যাস; এই কর্তব্য করিয়াই আমার
দিব্য চক্ষু খুলিয়াছে; তাহাতেই আমি তোমার মনোভাব ও অরণ্যে
তোমার কৃত সমুদয় ব্যাপার জানিতে পারিয়াছি। ইহা হইতে
কিছু উচ্চতর তত্ত্ব জানিতে চাও ত, অমুক নগরের বাজারে যাও;
তথায় একটা ব্যাধকে দেখিতে পাইবে। তিনি তোমাকে এমন
উপদেশ দিবেন, যাহা শিক্ষা করিতে তোমার পরম আনন্দ
হইবে।” সন্ন্যাসী ভাবিলেন, ‘অমুক নগরে একটা ব্যাধের
কাছে কেন যাইব?’

কিন্তু যে ব্যাপার এখানে দেখিলেন, তাহাতেই তাঁহার কিঞ্চিৎ চৈতন্যোদয় হইয়াছিল, সুতরাং তিনি সেই নগরে যাত্রা করিলেন—নগরের নিকট আসিয়া বাজার দেখিতে পাইলেন। দূরে দেখিলেন, একজন খুব স্থূলকায় ব্যাধ বসিয়া বৃহৎ ছুরিকা লইয়া পশুবধ করিতেছে, আর নানা লোকের সহিত বচসা ও কেনা বেচা করিতেছে। সন্ন্যাসী ভাবিলেন, “রাম রাম, এই লোকের নিকট আমাকে শিখিতে হইবে? এ ত দেখিতেছি একটা পিশাচের অবতার!” ইতিমধ্যে ঐ লোকটি উপরদিকে চাহিয়া বলিল, “স্বামিন্, অমুক মহিলাটি কি আপনাকে পাঠাইয়া দিয়াছেন? আমার কার্য্য সমাধান না হওয়া পর্য্যন্ত আপনি অনুগ্রহ করিয়া এই আসনে উপবেশন করুন।” সন্ন্যাসী ভাবিলেন, “এখানে আমার কি হইবে?” যাহা হউক, তিনি একটা আসন লইয়া উপবেশন করিলেন। সেই ব্যাধ আপন কার্য্য করিতে লাগিল। কেনা বেচা সাজ্জ হইলে পর সে আপনার টাকাকড়ি সব লইল, লইয়া সন্ন্যাসীকে বলিল, “আস্বন্ মহাশয়, আমার বাটীতে আস্বন।” তখন তাঁহারা দুইজনে ব্যাধের গৃহে উপনীত হইলেন। ব্যাধ তাঁহাকে একটা আসন দিয়া বলিল, ‘মহাশয়, একটু অপেক্ষা করুন।’ তার পর বাটীর ভিতরে গিয়া—সেখানে তাহার বাপ মা ছিল—তাঁহাদের হাত পা ধুইয়া দিল, তাঁহাদিগকে খাওয়াইল, আর সর্ব্বপ্রকারে তাঁহাদের সন্তোষ বিধান করিল। তার পর তাঁহার নিকট আসিয়া একটা আসনে উপবেশন করিয়া বলিল,

“আপনি আমাকে দর্শন করতে আসিয়াছেন, বলুন, আমি আপনার কি করিতে পারি?” তখন সন্ন্যাসী তাহাকে আত্মা পরমাত্মা সম্বন্ধে কতকগুলি প্রশ্ন করিলেন; তাহাতে ব্যাধ যে উপদেশ দিল, তাহা ব্যাধগীতা নামে প্রসিদ্ধ। এই ব্যাধ-গীতা চূড়ান্ত বেদান্ত—দর্শনের চরম সীমা। আপনারা ভগ-বদগীতার নাম শুনিয়াছেন, উহা শ্রীকৃষ্ণের উপদেশ। ভগ-বদগীতা পাঠ শেষ করিয়া আপনাদের এই ব্যাধগীতা পাঠ করা উচিত। ইহা বেদান্ত দর্শনের চূড়ান্ত ভাব। ব্যাধের উপদেশ শেষ হইলে সন্ন্যাসী অতিশয় বিস্ময়াপন্ন হইলেন, বলিলেন, “আপনার এরূপ উচ্চজ্ঞান, তথাপি আপনি এই ব্যাধদেহ অবলম্বন করিয়া এরূপ কুৎসিত কৰ্ম করিতেছেন কেন?” তখন ব্যাধ উত্তর করিল, “বৎস, কোন কৰ্মই অসৎ নহে, কোন কৰ্মই অপবিত্র নহে। এই কার্য আমার জন্মগত, ইহা আমার প্রারন্ধ-লব্ধ। আমি বাল্যকালে এই ব্যবসায় শিক্ষা করি। আমি অনাসক্ত ভাবে আমার সমুদয় কর্তব্য উত্তমরূপে করিবার চেষ্টা করি; আমি গার্হস্থ্যধৰ্ম পালন ও পিতা মাতাকে যথাসাধ্য সুখী করিবার চেষ্টা করি। আমি তোমার যোগও জানি না এবং সন্ন্যাসীও হই নাই। আমি কখনও সংসার ত্যাগ করিয়া বনে যাই নাই। নিজ অবস্থা-সঙ্গত কর্তব্য করাতেই আমার এই জ্ঞান জন্মিয়াছে।”

ভারতে একজন খুব উচ্চাবস্থাপন্ন যোগী আছেন; *

* পণ্ডহারী বাবা; ইহার আশ্রম ছিল—গাজিপুরে। ইনি

আমি জীবনে যত অদ্ভুত লোক দেখিয়াছি, তন্মধ্যে ইনি একজন। ইনি এক অদ্ভুত রকমের লোক ; তিনি কখনও কাহাকেও উপদেশ দিবেন না ; কোন প্রশ্ন করিলে, তিনি তাহার উত্তর দিবেন না। তিনি আচার্য্যের পদ গ্রহণ করিতে অত্যন্ত সঙ্কুচিত। তিনি কখনই উহা গ্রহণ করিবেন না। তুমি তাঁহাকে কোন প্রশ্ন জিজ্ঞাসা করিয়া কিছুদিন অপেক্ষা কর, কথাবার্তা প্রসঙ্গে তিনি নিজেই সে বিষয় উত্থাপন করিবেন ও ঐ তত্ত্ব সম্বন্ধে অদ্ভুত আলোক প্রদান করিবেন। তিনি আমায় এক সময়ে কৰ্ম্মরহস্য এইরূপ বলেন যে, 'যন্ সাধন তন্ সিদ্ধি,'* যখন তুমি কোন কার্য্য করিতেছে, তখন আর অন্য কিছু ভাবিও না। পূজাস্বরূপে—সর্বোচ্চ পূজাস্বরূপে—উহার অনুষ্ঠান কর। সেই সময়ের জ্ঞান সমুদয় মন প্রাণ অর্পণ করিয়া উহার অনুষ্ঠান কর। দেখ, এই গল্পে ব্যাধ আর ঐ রমণী সন্তোষ, আগ্রহ এবং সর্বান্তঃকরণের সহিত আপন আপন কর্তব্য করিয়াছিল। উহার ফলস্বরূপ তাহারা দিব্যজ্ঞান লাভ করিয়াছিল। সকল কর্তব্যই পবিত্র এবং কর্তব্যনিষ্ঠাই সর্ববিশেষ ঈশ্বরোপাসনা। উহা যে বদ্ধ জন-

এক্ষণে দেহরক্ষা করিয়াছেন। স্বামীজি কৃত ইহার একখানি সংক্ষিপ্ত জীবনচরিত আছে।

* যাহা সাধন, তাহাই সিদ্ধি অর্থাৎ সাধনকালে সাধন বিষয়েই মনপ্রাণ সমর্পণ করিয়া কার্য্য করিবে, উহারই চরম অবস্থার নাম সিদ্ধি।

গণের অজ্ঞানভারাক্রান্ত আত্মাকে উদ্ধার ও উহাকে দিব্যজ্ঞান প্রদান করিতে সমর্থ, তদ্বিষয়ে কিছুমাত্র সন্দেহ নাই। এই গল্পে স্পষ্টই দেখাইতেছে, যে কোন অবস্থারই কর্তব্য হউক না কেন, ঠিক ঠিক রূপে অনাসক্ত ভাবে অনুষ্ঠিত হইলে উহা আমাদের পক্ষে পরম পদ প্রাপ্তি করাইয়া দেয়।

আমাদের কর্তব্যসকল প্রধানতঃ আমাদের আনুষঙ্গিক অবস্থাচক্র দ্বারা নির্দ্ধারিত হয়। কর্তব্যের ভিতর কিছু বড় ছোট থাকিতে পারে না। সকাম কর্ম্মই তাহার অদৃষ্টে যে কর্তব্য পড়িয়াছে, তাহাতে বিরক্তি প্রকাশ করে। নিষ্কাম কর্ম্মের পক্ষে সকল কর্তব্যই সমান এবং সকলগুলিই উপ-যুক্ত সহায়স্বরূপে তাহার স্বার্থপরতা ও ইন্দ্রিয়পরায়ণতাকে সম্পূর্ণরূপে নাশ করিয়া দিয়া তাহাকে নিশ্চিত মুক্তির পথে অগ্রসর করিয়া দিতে পারে। আমরা সকলেই আপনাদের খুব বড় ভাবিয়া থাকি। যখন আমি বালক ছিলাম, তখন আমার অনেক খেয়াল ছিল—কখন ভাবিতাম, আমি একটা সম্রাট, কখন আপনাকে অশ্বরূপ কোন বড়লোক ভাবিতাম। বোধ হয়, তোমরাও বাল্যকালে এরূপ খেয়াল দেখিয়াছ। কিন্তু এগুলি সবই খেয়ালমাত্র, আর প্রকৃতি সর্বদাই কঠোর-ভাবে প্রত্যেকের কর্ম্মানুযায়ী ন্যায়ানুগতভাবে ফল বিধান করিয়া থাকেন। এক চুলও এদিক্ ওদিক্ করেন না। সেই জন্য আমরা স্বীকার করিতে ইচ্ছুক না হইলেও প্রকৃতপক্ষে আমাদের কর্ম্মফল অনুসারেই আমাদের কর্তব্য নির্দিষ্ট হইয়া থাকে।

আমাদের অতি নিকটেই যে কর্তব্য রহিয়াছে, যাহা আমাদের হাতের গোড়ায় রহিয়াছে, তাহা উত্তমরূপে নির্বাহ করিয়াই আমরা ক্রমশঃ শক্তিনাভ করিয়া থাকি—এইরূপে ধীরে ধীরে বল বাড়াইতে বাড়াইতে ক্রমে আমরা এমন অবস্থায়ও পৌঁছিতে পারি, যে সময়ে আমরা সমাজের সর্বাপেক্ষা প্রার্থনীয় ও সম্মানজনক কর্তব্যসাধনের সৌভাগ্যলাভ করিব। প্রতিযোগিতা হইতে ঈর্ষ্যার উৎপত্তি হয় এবং উহা হৃদয়ের সমুদয় সৎ ও কোমল ভাবগুলিকে নষ্ট করিয়া ফেলে। যে ক্রমাগত সকল বিষয়ে বিরক্তি প্রকাশ করে, তাহার পক্ষে সকল কর্তব্যই অরুচিকর বলিয়া বোধ হয়। কিছুতেই তাহাকে কখন সন্তুষ্ট করিতে পারিবে না, আর সে তাহার সারা জীবনটা নিশ্চিতই কোন কার্যে সফলকাম হইতে পারিবে না। এস, আমরা কায করিয়া যাই—আমাদের কর্তব্য যাহাই হউক না কেন, তাহাই যেন করিয়া যাইতে পারি, আর সর্বদাই যেন ঘাড় পাতিবার জন্য প্রস্তুত থাকিতে পারি। তবেই আমরা নিশ্চিত আলোক দেখিতে পাইব।

Gurukula Library

Kangri

পঞ্চম অধ্যায়।

পরোপকারে কাহার উপকার ?

কর্তব্যনিষ্ঠা দ্বারা আমাদের আধ্যাত্মিক উন্নতির বিরূপ সহায়তা হয়, তদ্বিষয়ে আরো অধিক আলোচনা করিবার পূর্বের কৰ্ম বলিতে ভারতে আমরা যাহা বুঝিয়া থাকি, তাহার আর এক দিক যত সংক্ষেপে সম্ভব, তোমাদের নিকট বিবৃত করিতে চেষ্টা করিব। প্রত্যেক ধর্মেরই তিনটি করিয়া বিভাগ আছে। ১ম, দার্শনিক ভাগ, ২য়, পৌরাণিক ভাগ, ৩য়, আনুষ্ঠানিক ভাগ বা ক্রিয়া-কৰ্ম। অবশ্য, দার্শনিক ভাগই সকল ধর্মের সার-স্বরূপ। পৌরাণিক ভাগ—ঐ দার্শনিক ভাগেরই বিবৃতিমাত্র; উহাতে মহাপুরুষগণের অল্প বিস্তর কাল্পনিক জীবনী ও অলৌকিক বিষয় সংক্রান্ত উপাখ্যান ও গল্পসমূহ দ্বারা ঐ দর্শনকেই উত্তমরূপে বিবৃত করিবার চেষ্টা করা হইয়াছে। আর আনুষ্ঠানিক ভাগ ঐ দর্শনেরই আরও অধিক স্থূলতর রূপ—যাহাতে সকলেই উহা ধারণা করিতে পারে। আনুষ্ঠান প্রকৃত পক্ষে দর্শনেরই স্থূলতর ভাবমাত্র। এই আনুষ্ঠানই কৰ্ম। প্রত্যেক ধর্মেরই ইহা প্রয়োজনীয়, কারণ, আমাদের মধ্যে অনেকেই যত দিন না আধ্যাত্মিক বিষয়ে খুব উন্নতিলাভ করিতেছি ততদিন আমরা সূক্ষ্ম আধ্যাত্মিক তত্ত্ব ধারণায় অসমর্থ। লোকে সহজেই ভাবিয়া থাকে যে, তাহাদের পক্ষে সকল বিষয় বুঝাই সহজ, কিন্তু হাতে হেতেড়ে করিয়া

দেখিলে দেখিতে পাইবে, সূক্ষ্ম বিষয়সমূহ ধারণা করা বড়ই কঠিন। এই কারণে প্রতীকের দ্বারা বিশেষ সাহায্য হইয়া থাকে, আর ইহার সাহায্যে সমুদয় বিষয় ধারণার প্রণালী আমরা ছাড়িয়া দিতে পারি না। স্মরণাতীত কাল হইতেই সকল ধর্ম্মেই প্রতীকের ব্যবহার দেখিতে পাওয়া যায়। এক হিসাবে আমরা প্রতীক ব্যতীত চিন্তাই করিতে পারি না, শব্দসমূহ চিন্তার প্রতীক মাত্র। অন্য হিসাবে জগতের সমুদয় পদার্থকেই প্রতীক বলা যাইতে পারে। সমুদয় জগতই প্রতীকস্বরূপ, আর ঈশ্বর মূল-তত্ত্বরূপে উহাদের পশ্চাতে রহিয়াছেন। এইরূপ প্রতীক কেবল মানবসৃষ্টি নহে। কোন বিশেষধর্ম্মাবলম্বী কতকগুলি ব্যক্তি যে একস্থানে বসিয়া ভাবিয়া চিন্তিয়া স্বকপোলকল্পিত কতকগুলি প্রতীকের সৃষ্টি করিলেন, তাহা নহে। উহারা স্বভাবতঃ উৎপন্ন হইয়া থাকে। তাহা না হইলে কতকগুলি প্রতীক প্রায় সকল ব্যক্তির মনেই কতকগুলি বিশেষ ভাবের সহিত জড়িত কেন? কতকগুলি প্রতীক সার্বজনীন দেখিতে পাওয়া যায়। তোমাদের অনেকের ধারণা—খ্রীষ্টান ধর্ম্মের সঙ্গে সঙ্গে ক্রুশ আসিয়াছে, কিন্তু প্রকৃত পক্ষে খ্রীষ্ট ধর্ম্মের বহু পূর্ব হইতেই, মুশা জন্মিবার পূর্ব হইতেই, বেদের আবির্ভাব হইবার পূর্ব হইতেই, এমন কি, মানবজাতি কর্তৃক মানবীয় কার্যকলাপের কোন প্রকার ইতিহাস রক্ষিত হইবার পূর্ব হইতেই ইহা বর্ত্তমান ছিল। আজটেক ও ফিনিসিয় জাতির মধ্যে যে ক্রুশ ছিল, তাহার প্রমাণ পাওয়া যায়। খুব সম্ভব যে, সকল জাতিই এই ক্রুশ ব্যবহার করিতেন।

আবার ক্রুশবিদ্ধ পরিব্রাতার—একটি লোক ক্রুশবিদ্ধ হইয়া রহিয়াছে এরূপ মানুষের—প্রতীক প্রায় সকল জাতির মধ্যে ছিল বলিয়া বোধ হয় । বৃত্ত সমগ্র জগতের মধ্যে একটি উৎকৃষ্ট প্রতীকের স্থান অধিকার করিয়াছে । তার পর সর্ববাপেক্ষা সার্বজনীন প্রতীক স্বস্তিক  রহিয়াছে । এক সময়ে লোকে ভাবিত, বৌদ্ধগণ সমুদয় জগতে উহা বিস্তার করিয়াছে, কিন্তু এক্ষণে জানিতে পারা গিয়াছে যে, বৌদ্ধধর্মের অভ্যুদয়ের অনেক পূর্ব হইতেই বিভিন্নজাতিতে উহা প্রচলিত ছিল । প্রাচীন বাবিলন ও ইজিপ্টেও ইহা পাওয়া যাইত । ইহাতে কি দেখাইতেছে ? ইহাই দেখাইতেছে যে, এই প্রতীকগুলি কেবল কতকগুলি ব্যক্তির স্বেচ্ছাকৃত বা কল্পনাপ্রসূত নহে । উহাদের নিশ্চিত কোন যুক্তি আছে, উহাদের সহিত মনুষ্যমনের কোনরূপ স্বাভাবিক সম্বন্ধ আছে । ভাষাও এইরূপ একটা কৃত্রিম বস্তু নহে । কতকগুলি লোক একত্রিত হইয়া কতকগুলি ভাবেকে বিশেষ বিশেষ শব্দ দ্বারা প্রকাশ করিবে এইরূপ চুক্তি করাতে ভাষার উৎপত্তি হইয়াছে, ইহা সত্য নহে । কোন ভাবই তাহার আনুষঙ্গিক শব্দ ব্যতিরেকে অথবা কোন শব্দই তাহার আনুষঙ্গিক ভাব ব্যতিরেকে থাকিতে পারে না । শব্দ ও ভাব স্বভাবতঃই অবিচ্ছেদ্য । ভাবসমূহ বুঝাইবার জন্য শব্দ বা বর্ণপ্রতীক উভয়ই ব্যবহৃত হইতে পারে । বধির ও মূক ব্যক্তিগণের শব্দপ্রতীকের দ্বারা কোনরূপ সাহায্য হয় না, তাহাদিগকে অণু প্রতীকের সহায়তা লইতে হয় । মনের প্রত্যেক চিন্তাটির অপরাংশস্বরূপ একটি

করিয়া আকৃতিবিশেষ আছে । সংস্কৃত দর্শনে উহাদিগকে নাম-
রূপ বলিয়া থাকে । যেমন কৃত্রিম উপায়ে ভাষা সৃষ্টি করা
অসম্ভব, তদ্রূপ কৃত্রিম উপায়ে প্রতীক সৃষ্টি করাও অসম্ভব ।
জগতে অনুষ্ঠানের সহকারী যে সকল প্রতীক দেখা যায়, তাহারা
মানবজাতির ধর্মচিন্তার এক এক প্রকাশবিশেষমাত্র । অনুষ্ঠান,
মন্দিরাদি ও অন্যান্য বাহ্য আড়ম্বরে কোন প্রয়োজন নাই, একথা
বলা খুব সহজ ; আজকাল কচি ছেলেরাও এ কথা বলিয়া থাকে ।
কিন্তু সকলে ইহাও অতি সহজে দেখিতে পাইবেন যে, যাহারা
মন্দিরে যাইয়া উপাসনা করে, তাহারা অনেক বিষয়ে—যাহারা
মন্দিরে গিয়া উপাসনা করে না—তাহাদের হইতে বিভিন্ন । এই
कारणे विशेष বিশেষ ধর্মের সহিত যে বিশেষ বিশেষ মন্দির, অনু-
ষ্ঠান ও অগ্ন্যাগ্নি স্থূল ক্রিয়াকলাপ জড়িত আছে, তাহা তত্ত্বদ্বন্দ্ব্যবল-
ম্বীর মনে—সেই সেই স্থূল বস্তুগুলি যাহাদের প্রতীকরূপে ব্যব-
হৃত—তাহাদের চিন্তা উদ্বেক করিয়া দেয় । আর একেবারে অনু-
ষ্ঠান ও প্রতীক উড়াইয়া দেওয়া সুবিধাজনক নহে । এই সকল বিষ-
য়ের চর্চা ও অভ্যাসও স্বভাবতঃই কর্মযোগের এক অংশস্বরূপ ।

এই কর্মযোগের আরও অগ্ন্যাগ্নি দিক্ আছে । তাহাদের
মধ্যে একটী এই,—ভাব ও শব্দের মধ্যে যে সম্বন্ধ আছে, এবং
শব্দশক্তিতে কি হইতে পারে, তাহা জানা । সকল ধর্মোই শব্দ-
শক্তি স্বীকৃত হইয়াছে, এমন কি, কোন কোন ধর্মো সৃষ্টিটাই শব্দ
হইতে উৎপন্ন বলিয়া কথিত হইয়াছে । ঈশ্বরের সঙ্কল্পের বাহ্য
ভাব—শব্দ, আর যেহেতু ঈশ্বর সৃষ্টির পূর্বের সঙ্কল্প ও ইচ্ছা

করিয়াছিলেন, সেই হেতু সৃষ্টি 'শব্দ' হইতেই আসিয়াছে । এই জড়বাদময় জীবনের পেঘণেও ত্বরায় আমাদের স্নায়ুরও জড়তা উপস্থিত হইয়াছে । যতই আমরা বৃদ্ধ হইতে থাকি, যতই আমরা এই জগতে ঘা খাইতে থাকি, ততই আমাদের স্নায়ুর যেন জড়ত্ব উপস্থিত হয়, আর যে সকল ঘটনা ক্রমাগত আমাদের চতুর্দিকে ঘটিতেছে, এবং আমাদের দৃষ্টি আকর্ষণ করিবার চেষ্টা করিতেছে, সেই গুলিকেও আমরা অবহেলা করিতে প্রবৃত্ত হই । যাহা হউক, সময়ে সময়ে মানবের স্বাভাবিক ভাব প্রাধান্য লাভ করিয়া থাকে এবং আমরা এই সকল সাধারণ ঘটনার অনেকগুলির তত্ত্বানুসন্ধান প্রবৃত্ত হই ও উহাতে বিস্ময় প্রকাশ করিয়া থাকি । আর এইরূপ বিস্ময়ই জ্ঞানালোকপ্রাপ্তির প্রথম সোপান । উচ্চ দর্শন ও ধর্মতত্ত্ব বিষয়ে শব্দতত্ত্বের মূল্য ছাড়িয়া দিলেও আমরা দেখিতে পাই, শব্দপ্রতীক মানবজীবন-রঙ্গক্ষেত্রে এক প্রধান অংশ অভিনয় করিয়া থাকে । আমি তোমার সহিত কথা কহিতেছি, আমি তোমাকে স্পর্শ করিতেছি না । আমার কথা দ্বারা যে বায়ুর কম্পন হইতেছে, তাহা তোমার কর্ণে গিয়া তোমার স্নায়ু স্পর্শ করিতেছে এবং তোমার মনের উপর প্রভাব বিস্তার করিতেছে । ইহা হইতে আশ্চর্য্য আর কি হইতে পারে ? একজন আর এক ব্যক্তিকে মূর্খ বলিল—অমনি সে দাঁড়াইয়া উঠিয়া মুষ্টি বদ্ধ করিয়া তাহার নাকে এক ঘুষি মারিল । দেখ—শব্দের কি শক্তি ! জনৈক মহিলা শোকার্ত্তা হইয়া কাঁদিতেছে ; আর একজন মহিলা আসিয়া তাঁহাকে দুই চারিটা মিষ্ট কথা শুনাইলেন, অমনি সেই রোদন-

পরায়ণা রমণীর বক্ত্র দেহ সোজা হইল, তাঁহার শোক চলিয়া গেল, তাঁহার মুখে হাস্য দেখা দিল । দেখ, শব্দের কি শক্তি ! উচ্চ দর্শনে যেমন, এইরূপ সাধারণ জীবনেও তদ্রূপ শব্দশক্তির পরিচয় পাওয়া যায় । আমরা এই শক্তির সম্বন্ধে বিশেষ প্রাণিধান ও অনুসন্ধান না করিলেও দিবারাত্র এই শক্তি লইয়া নাড়াচাড়া করিতেছি । এই শক্তির স্বরূপ অবগত হওয়া ও উহার উত্তমরূপে পরিচালনাও কৰ্ম্মযোগের অংশবিশেষ ।

অপরের প্রতি আমাদের কর্তব্য অর্থে, অপরের সাহায্য করা, জগতের উপকার করা । কেন আমরা জগতের উপকার করিব ? আপাততঃ বোধ হয় যে, আমরা জগতের উপকার করিতেছি, বাস্তবিক কিন্তু আমরা নিজেরাই উপকৃত হইয়া থাকি । আমাদের সর্বদাই জগতের উপকার করিবার চেষ্টা করা আবশ্যক, ইহাই যেন আমাদের কার্যপ্রবৃত্তির সর্ববশ্রেষ্ঠ নিয়ামক অভিসন্ধি হয় ; কিন্তু যদি আমরা বিশেষ বিচার করিয়া দেখি, তবে দেখিব, এই জগৎ আমাদের নিকট হইতে কোন উপকার প্রার্থনা করে না । তুমি আমি জগতের উপকার করিব বলিয়া এই জগৎ স্মৃষ্ট হয় নাই । আমি একবার একটী ধর্ম্মবক্তৃতায় পাঠ করি, “এই সুন্দর জগৎ অতি সুন্দর, কারণ, ইহাতে আমাদিগকে অপরকে সাহায্য করিবার সময় ও সুবিধা দেয় ।” আপাততঃ শুনিতে ইহা অতি সুন্দর ভাব বটে, কিন্তু এক হিসাবে ইহা একটী অমঙ্গল-সূচক কথা ; কারণ, জগৎ আমার নিকট হইতে সাহায্য চাহে, ইহা কি ঘোর ভগবমিন্দা নহে ? জগতে যে যথেষ্ট দুঃখ আছে, ইহা আমরা

অস্বীকার করিতে পারি না ; সুতরাং অপরকে যাইয়া সাহায্য করাই আমাদের সর্বোচ্চ নিয়ামক শক্তি, কিন্তু আমরা আখেরে দেখিব যে, উহা হইতে আমরাই উপকার পাইতেছি । বালক-কালে আমার কতকগুলি শ্বেত ইন্দুর ছিল । একটী ছোট বাস্কর ভিতরে সেইগুলিকে রাখা হইয়াছিল, আর তাহাদের জন্য ছোট ছোট চাকা করিয়া দেওয়া হইয়াছিল । ইঁদুরগুলি সেই চাকা পার হইতে চেষ্টা করিত, অমনি চাকাগুলি ক্রমাগত ঘুরিতে থাকিত ; ইঁদুরগুলি আর কোথাও যাইতে পারিত না । জগৎ এবং উহাকে সাহায্য করাও তদ্রূপ । এইটুকু উপকার হয় যে, তোমার শিক্ষা হইয়া থাকে । এই জগৎ ভালও নহে, মন্দও নহে ; প্রত্যেক ব্যক্তিই নিজের জন্য এক একটী জগৎ সৃজন করে । অন্ধব্যক্তি যদি জগৎ সম্বন্ধে ভাবিতে আরম্ভ করে, তবে সে দেখিবে, জগৎ হয় নরম বা শক্ত, ঠাণ্ডা বা গরম । আমরা এক রাশ সুখ বা দুঃখের সমষ্টিমাত্র । আমরা জীবনে শত শত বার ইহা প্রত্যক্ষ করিতেছি । যুবারা প্রায় সুখবাদী (Optimist) আর বৃদ্ধেরা দুঃখবাদী (Pessimist) হইয়া থাকে । যুবাদের সম্মুখে সারা জীবনটা পড়িয়া রহিয়াছে, বৃদ্ধেরা কেবল নিজ অবস্থার অনুশোচনা করিতেছে ; তাহাদের দিন ফুরাইয়াছে । শত শত বাসনা তাহাদের মস্তিষ্কে আলোড়িত করিতেছে । এক্ষণে তাহা পূরণের সামর্থ্য তাহাদের নাই । জীবন তাহাদের পক্ষে ফুরাইয়া গিয়াছে । এই উভয় সম্প্রদায়ই মূর্থ । এই জীবন ভালও নহে, মন্দও নহে ; আমরা যেরূপ মন লইয়া জগৎকে

দেখি, উহা সেইরূপই প্রতীয়মান হইয়া থাকে। সর্ব্বাপেক্ষা কাযের লোক যাঁহারা, তাঁহারা জগৎকে ভাল বা মন্দ কিছুই বলিবেন না। অগ্নি জিনিষটা ভালও নয়, মন্দও নয়। যখন উহা আমাদিগকে বেশ গরমে রাখে, আমরা বলি অগ্নি কি সুন্দর ! আবার যখন উহা আমাদের অঙ্গুলিকে দগ্ধ করে, তখন আমরা অগ্নিকে নিন্দা করিয়া থাকি। কিন্তু অগ্নি বাস্তবিক ভালও নয়, মন্দও নয়। আমরা যেমন উহার ব্যবহার করি, উহাও সেইরূপ ভাল বা মন্দ ভাব উদ্দীপনা করিয়া দেয় ; জগৎ সম্বন্ধেও এইরূপ। জগৎ স্বয়ং-সিদ্ধ। স্বয়ংসিদ্ধ অর্থে উহা উহার সমুদয় আবশ্যক সম্পূর্ণরূপে পূরণ করিতে সম্পূর্ণ সক্ষম। আমরা সম্পূর্ণরূপেই নিশ্চিন্ত থাকিতে পারি যে, জগৎ বেশ চলিয়া যাইবে, আমাদিগকে উহার উপকারের জন্ত মাথা ঘামাইতে হইবে না।

তাহা হইলেও আমাদিগকে পরোপকার করিতে হইবে; ইহাই আমাদের সর্ব্বাপেক্ষা উচ্চ কার্য্য-প্রবৃত্তির নিয়ামক, কিন্তু সর্ব্বদাই আমাদের জানা উচিত যে, পরোপকার করিতে যাওয়া এক সৌভাগ্যের কার্য্য। উচ্চ মঞ্চের উপর দাঁড়াইয়া, দুটো পয়সা নে রে বেটা বলিয়া, গরীবকে উহা দিও না, বরং তাহার প্রতি কৃতজ্ঞ হও যে, সে গরীব হওয়াতে তাহাকে সাহায্য করিয়া তুমি নিজের উপকার করিতে সমর্থ হইতেছ। যে প্রতিগ্রহ করে, সে ধন্য হয় না, দাতাই ধন্য হয়। তুমি যে তোমার দয়াশক্তি জগতে প্রয়োগ করিয়া আপনাকে পবিত্র ও সিদ্ধ করিতে সমর্থ হইতেছ,

তজ্জন্য তুমি কৃতজ্ঞ হও । সব ভাল কাজেই আমাদিগকে পবিত্র ও সিদ্ধ হইতে সহায়তা করে । আমরা খুব জোর কি করিতে পারি ? না, একটা হাঁসপাতাল নিৰ্ম্মাণ করিলাম, রাস্তা করিয়া দিলাম বা দাতব্য আশ্রম নিৰ্ম্মাণ করিয়া দিলাম । আমরা একটা চাঁদার খাতা খুলিয়া হয়ত বিশ ত্রিশ লক্ষ টাকা সংগ্রহ করিলাম । তার দশ লক্ষ টাকায় একটা হাঁসপাতাল খুলিলাম, আর দশ লক্ষ নাচ তামাসা মদে গেল আর বাকি দশ লক্ষের অর্ধেক কৰ্ম্মচারীরা চুরি করিল, বাকিটা হয়ত গরীবদের কাছে পঁহছিল । কিন্তু তাতেই বা হইল কি ? এক ঝটকায় পাঁচ মিনিটে সব উড়িয়া যাইতে পারে । তবে করিব কি ? এক আগ্নেয়গিরির অগ্ন্যুৎপাত রাস্তা, হাঁসপাতাল, নগর, বাড়ী—সব উড়াইয়া লইয়া যাইতে পারে । জগতের উপকার করিব, এই অজ্ঞানের কথা একেবারে পরিত্যাগ করি এস । জগৎ তোমার বা আমার সাহায্যের জন্য অপেক্ষা করিতেছে না । তথাপি আমাদিগকে কার্য্য করিতে হইবে ; সর্বদাই লোকের উপকার করিতে হইবে, কারণ, উহা আমাদের পক্ষে মহা সৌভাগ্যস্বরূপ । কেবল এই উপায়েই আমরা পূর্ণ হইতে পারি । কোন দরিদ্রই আমাদের এক পয়সা ধারে না, আমরাই তাহার সব ধারি, কারণ, সে আমাদের সমুদয় দয়াশক্তি তাহার উপর ব্যবহার করিতে দিয়াছে । আমরা জগতের কিছু উপকার করিয়াছি বা করিতে পারি, অথবা অমুক অমুক লোককে সাহায্য করিয়াছি, ইহা চিন্তা করা সম্পূর্ণ ভুল । ইহা বৃথা চিন্তা মাত্র, আর বৃথা চিন্তাতে কষ্টই

আনয়ন করে। আমরা মনে করি, আমরা কাহাকেও সাহায্য করিয়াছি আর আশা করি, সে আমাকে ধন্যবাদ দিবে, আর সে ধন্যবাদ দেয় না বলিয়াই আমাদের অশান্তি আইসে। কিছু আশা কর কেন? যাহাকে তুমি সাহায্য করিতেছ, তাহার প্রতি কৃতজ্ঞ হও, তাহাতে ঈশ্বরবুদ্ধি কর। মানবকে সাহায্যরূপ ঈশ্বরোপাসনা করিতে পাওয়া কি আমাদের মহা সৌভাগ্য নহে? যদি আমরা বাস্তবিক অনাসক্ত হইতাম, তবে আমরা এই বৃথা-আশা-জনিত কষ্ট অতিক্রম করিতে পারিতাম এবং তাহা হইলেই জগতে কিছু সংকার্য্য করিতে পারিতাম। আসক্তিশূন্য হইয়া কার্য্য করিলে অশান্তি বা কষ্ট কখনই আসিবে না। এই জগৎ অনন্তকাল সুখদুঃখে কাটিয়া যাইবে।

একজন গরীব লোক ছিল, তাহার কিছু অর্থের আবশ্যক ছিল। সে কোনরূপে শুনিয়াছিল যে, যদি সে কোনরূপে একটা ভূত যোগাড় করিতে পারে, তবে সে তাহাকে আজ্ঞা করিয়া অর্থ বা যাহা কিছু চায়, সবই পাইতে পারে। ইহা শুনিয়া সে একটা ভূত সংগ্রহ করিবার জন্য বড় ব্যস্ত হইয়াছিল। সে, তাহাকে ভূত দিতে পারে, এমন একটা লোক খুঁজিয়া বেড়াইতে লাগিল, অবশেষে তাহার সহিত একজন মহাযোগৈশ্বর্য্যসম্পন্ন সাধুর সাক্ষাৎ হইল। সে ঐ সাধুরই নিকট একটা ভূতের প্রার্থনা করিল। সাধু বলিলেন, “ভূত লইয়া তুমি কি করিবে?” সে বলিল, “আমার একটা ভূতের আবশ্যক এইজন্য যে, সে আমার হইয়া কার্য্য করিবে। মহাশয়, কিরূপে আমি ভূত পাইব,

উপদেশ করুন। আমার ভূতের বিশেষ আবশ্যক।” সাধু বলিলেন, “যাও, অত মাথা বকাইও না, বাড়ী যাও।” তার পরদিন সে ফের সাধুর নিকট বাইয়া কাঁদিয়া কাটিয়া বলিতে লাগিল, “প্রভো, আমাকে একটা ভূত দিতেই হইবে; আমার কাষে সাহায্যের জন্য আমার একটা ভূতের বিশেষ প্রয়োজন।”

অবশেষে সাধুটি বিরক্ত হইয়া বলিলেন, “এই মন্ত্র লও; এই মন্ত্র জপ করিতে হইবে, তবে একটা ভূত আসিবে—তাহাকে যাহা বলিবে, সে তাহাই করিবে। কিন্তু সাবধান ভূত বড় ভয়ানক প্রাণী—উহাদিগকে সর্বদাই ব্যস্ত রাখিতে হয়; তাহাকে কাষ দিতে না পারিলেই সে তোমার প্রাণ লইবে।” সেই লোকটি বলিল, “ইহা ত অতি সহজ ব্যাপার; আমি তাহাকে তাহার সারা জীবনের জন্য কস্ম দিতে পারি।” এই বলিয়া সে এক বনে গিয়া অনেক দিন ধরিয়া ঐ মন্ত্রটি জপ করিতে লাগিল—জপ করিতে করিতে তাহার সম্মুখে বড় বড় দাঁত এক ভীষণাকৃতি ভূত আসিয়া উপস্থিত হইল, সে বলিল, “আমি ভূত; আমি তোমার মন্ত্রবলে বশীভূত হইয়াছি। কিন্তু তোমার আমাকে সর্বদা কাষ দিতে হইবে। যে মুহূর্তে কাষ দিতে না পাবিবে, সেই মুহূর্তেই তোমায় সংহার করিব।” সেই লোকটি বলিল, “আমার জন্য একটা প্রাসাদ নিৰ্ম্মাণ করিয়া দাও।” ভূত বলিল,—“হাঁ হইয়াছে; প্রাসাদ নিৰ্ম্মিত হইয়াছে; লোকটি বলিল, “টাকা লইয়া আইস।” ভূত বলিল, “এই টাকা লও।” লোকটি বলিল, “এই বন কাটিয়া এখানে একটা সহর বানাও।”

ভূত বলিল, “তাহাও হইয়াছে, আর কিছু চাই?” তখন সে লোকটা ভয় পাইতে লাগিল, বলিল “ইহাকে আর কি কাষ দিব, এ ত দেখিতেছি এক মুহূর্ত্তেই সব সম্পন্ন করে!” ভূত বলিল, “আমায় কিছু কাষ দাও, না হইলে তোমায় খাইয়া ফেলিব।” তখন সে বেচারী, ভূতকে আর কি কাষ দিবে, ভাবিয়া না পাইয়া অতিশয় ভয় পাইল। ভয় পাইয়া দৌড় মারিল—দৌড়—দৌড়—শেষে সাধুর নিকট পঁহুছিল, বলিল, “প্রভো, আমাকে রক্ষা করুন।” সাধু জিজ্ঞাসিলেন, “ব্যাপার কি?” লোকটা বলিল, “ভূতকে আমি আর কিছু কাষ দিতে পারিতেছি না। আমি যা বলি, তাই সে মুহূর্ত্তের মধ্যে সম্পন্ন করিয়া ফেলিতেছে, যদি তাহাকে কাষ না দিই, তাহা হইলে খাইয়া ফেলিবে বলিয়া ভয় দেখাইতেছে।” এমন সময়ে ভূত আসিয়া হাজির—বলিতেছে—“তোমায় খাইয়া ফেলিব—খাইয়া ফেলিব।” খায় আর কি! লোকটা ভয়ে থর থর করিয়া কাঁপিতে লাগিল আর সাধুর নিকট আপনার জীবন রক্ষার জন্য প্রার্থনা করিতে লাগিল। সাধু বলিলেন, “আচ্ছা, তোমার এক উপায় করিতেছি—ঐ কুকুরটিকে দেখিতেছ—কোকড়ান লেজ। তোমার তরবারিটা শীঘ্র বাহির করিয়া উহার লেজটা কাটিয়া ভূতটিকে উহা সোজা করিতে দাও।” লোকটা কুকুরটীর লেজ কাটিয়া লইয়া ভূতকে দিয়া বলিল, “ইহা সোজা করিয়া দাও।” ভূত উহা লইয়া ধীরে ধীরে অতি সন্তুর্পণে উহা সোজা করিল, কিন্তু যাই সে ছাড়িয়া দিল, অমনি উহা গুটাইয়া গেল। ফের সে অতি

কফে সোজা করিল—আবার ছাড়িয়া দিতেই গুটাইয়া গেল। এইরূপে দিনের পর দিন সে পরিশ্রম করিতে লাগিল। অবশেষে সে ক্লান্ত হইয়া বলিতে লাগিল, “আমার জীবনে কখন আমি এমন যন্ত্রণায় পড়ি নাই। আমি একজন পুরাতন পাকা ভূত, কিন্তু জীবনে কখনও এমন কফে পড়ি নাই। এস, তোমার সঙ্গে রফা করি। তুমি আমাকে ছাড়িয়া দাও, আমিও তোমাকে যাহা যাহা দিয়াছি, সবই রাখিতে দিব, আর প্রতিজ্ঞা করিব, কখন তোমার অনিষ্ট করিব না।” লোকটা খুব সন্তুষ্ট হইয়া আনন্দের সহিত এই চুক্তিতে স্বীকার পাইল।

এই জগৎই সেই কুকুরের কোঁকড়ান লেজ; লোকে শত শত বৎসর ধরিয়া উহা সোজা করিবার চেষ্টা করিতেছে। কিন্তু যখনই তাহারা উহা ছাড়িয়া দেয়, উহা আবার গুটাইয়া যায়। ইহা ব্যতীত আর কি হইবে? প্রথমে লোকের জানা উচিত, আসক্তি-শূন্য হইয়া কি করিয়া কায করিতে হয়। তাহা হইলে তাহার আর গোঁড়ামি আসিবে না। যখন আমরা জানিতে পারি, এই জগৎ কুকুরের লেজ, আর উহা কখনই সোজা হইবে না, তখনই আমরা আর গোঁড়া হইব না।

অনেক প্রকারের গোঁড়া আছে—মত্তপান-নিবারক, চুরুট-নিবারক প্রভৃতি। এক সময়ে এই ক্লাসে একজন যুবতী মহিলা আসিতেন। তিনি এবং আর কয়েকজন মহিলা মিলিয়া চিকাগোয় একটা বাড়ী করিয়াছেন, তথায় শ্রমজীবীদের জন্য

কিছু কিছু সঙ্গীত ও ব্যায়াম শিখিবার বন্দোবস্ত আছে। একদিন তিনি আমাকে মদ্যপান ও ধূমপান প্রভৃতিতে যে অনিষ্ট হয়, তাহা বলিতেছিলেন। তিনি বলিলেন, এই সকল দোষের প্রত্যেকের উপায় তিনি জানেন। আমি সেই উপায়টি কি জানিতে চাহিলে তিনি বলিলেন, “আপনি কি ‘হল্ বাড়ীটীর’ কথা জানেন না?” ইহার কথা শুনিয়া মনে হয়, যেন ইহার মতে মানবজাতির যাহা কিছু অশুভ, ঐ ‘হলবাড়ী’টী তাহার অব্যর্থ মহৌষধ। ভারতে কতকগুলি গোঁড়া আছেন, তাঁহারা মনে করেন, যদি স্ত্রীলোককে একাধিক বিবাহের অনুমতি দেওয়া যায়, তবেই সব দুঃখ যুচিবে। এই সকলই গোঁড়ামী, আর জ্ঞানী ব্যক্তি কখন গোঁড়া হইতে পারেন না।

গোঁড়ারা প্রকৃত কার্য্য করিতে পারে না। জগতে যদি গোঁড়ামী না থাকিত, তবে জগৎ এখন যেৰূপ উন্নতি করিতেছে, তদপেক্ষা অধিক উন্নতি করিত। গোঁড়ামিতে জগতের উন্নতি হয় ভাবা কেবল খাঁটি অজ্ঞতামাত্র। উহাতে বরং জগতের উন্নতির বিঘ্ন হয়, কারণ, উহাতে ঘৃণা ক্রোধাদির উৎপত্তি হয়, আর লোকে পরস্পর বিরোধ করিয়া থাকে। গোঁড়ামী তাহাদিগকে লোকের প্রতি সহানুভূতিসম্পন্ন হইতে দেয় না। আমরা যাহা করি বা আমাদের যাহা আছে, তাহাই আমরা জগতে সর্ব্বশ্রেষ্ঠ বলিয়া বোধ করি আর যেগুলি আমাদের নাই সেগুলি কোন কাষেরই নয় বলিয়া অগ্রাহ করি।

অতএব, যখনই তোমার গোঁড়া হইবার ভাব আসিবে, তখন

সর্বদাই সেই কুকুরের লেজের কথা মনে করিও । জগতের জন্ত তোমার ব্যস্ত হইবার অথবা নিদ্রাশূন্য হইবার আবশ্যক নাই ; উহা ঠিক চলিয়া যাইবে । প্রভু পরমেশ্বর এই জগতের শাসনকর্তা ও রক্ষাকর্তা । সুতরাং এই সকল বিভিন্নপ্রকার গোঁড়ারা যাহাই বলুক না কেন, তিনিই ইহার সুপরিচালনার দিকে দৃষ্টি রাখিবেন । যখন তোমার এই গোঁড়ামী চলিয়া যাইবে, তখনই তুমি প্রকৃত কার্য্য করিতে পারিবে । যাহার মাথা খুব ঠাণ্ডা, যে শান্ত, সর্বদা উত্তমরূপে বিচার করিয়া কার্য্য করে, যাহার স্নায়ু সহজে উত্তেজিত হয় না, এবং যে অতিশয় প্রেম ও সহানুভূতি-সম্পন্ন, সেই লোকই ভাল কার্য্য করিতে পারে । গোঁড়ার কোন সহানুভূতি নাই ।

তোমাদের নিজেদের ইতিহাসে ‘মে-ফ্লাউয়ার’ জাহাজ হইতে আগত ব্যক্তিদিগের কথা কি স্মরণ নাই ? যখন তাঁহারা প্রথমে এদেশে আসেন, তখন তাঁহারা পিউরিট্যান এবং খুব পবিত্র ও সাধু-প্রকৃতি ছিলেন । কিন্তু অতি শীঘ্রই তাঁহারা অপর ব্যক্তিদিগের প্রতি অত্যাচার আরম্ভ করিলেন । মানবজাতির ইতিহাসে সর্বত্রই এইরূপ দেখা যায় । যাহারা নিজেরা অত্যাচারের ভয়ে পলাইয়া আসিলেন, তাঁহারাই আবার সুবিধা পাইলে অপরের উপর অত্যাচার আরম্ভ করেন । আমি দুইটি অদ্ভুত জাহাজের কথা শুনিয়াছি—প্রথম ‘নোয়ার আর্ক’ ও দ্বিতীয় ‘মে-ফ্লাউয়ার’ । যাহুদীরা বলেন, ‘সমুদয় সৃষ্টি নোয়ার আর্ক হইতে আসিয়াছে আর মার্কিনেরা বলেন, জগতের প্রায় অর্দ্ধেক লোক ‘মে-

ফ্লাউয়ার' জাহাজ হইতে আসিয়াছে। এদেশে বাহার সহিত দেখা হয়, এমন খুব কম লোকই দেখিতে পাই, যে না বলে, আমার পিতামহ বা প্রপিতামহ মে-ফ্লাউয়ার জাহাজ হইতে আসেন নাই। এ আর এক রকমের গোঁড়ামী। গোঁড়াদের মধ্যে শত করা নবরই জনের অন্ততঃ যকুৎ দূষিত, অথবা তাহারা অজীর্ণ-রোগগ্রস্ত অথবা তাহাদের কোন না কোন প্রকার ব্যাধি আছে। ক্রমশঃ চিকিৎসকেরাও বুঝিবেন যে, গোঁড়ামী একপ্রকার রোগবিশেষ—আমি ইহা যথেষ্ট দেখিয়াছি। প্রভু আমাকে ইহা হইতে রক্ষা করুন।

এই গোঁড়ামী সম্বন্ধে আমার যতটুকু অভিজ্ঞতা আছে, তাহাতে মোটামুটি আমি এই সিদ্ধান্তে উপনীত হইয়াছি যে, আমাদের কোনপ্রকার গোঁড়া বা একঘেয়ে সংস্কারকার্যের সহিত মিশিবার প্রয়োজন নাই। তোমরা কি বলিতে চাও যে, মদ্য-পান-নিবারক গোঁড়ারা মাতাল বেচারাদের বাস্তবিক ভালবাসে? গোঁড়াদের গোঁড়ামীর কারণ এই যে, তাহারা এই গোঁড়ামী করিয়া নিজেরা কিছু লাভের প্রত্যাশা করে। যুদ্ধ শেষ হইয়া যাইবামাত্র ইহারা লুণ্ঠনে অগ্রসর হয়। এই গোঁড়ার দল হইতে বাহির হইয়া আসিতে পারিলেই প্রকৃতপক্ষে কিরূপে ভালবাসিতে হয় ও সহানুভূতি করিতে হয়, তাহা শিখিবে। তখনই তোমাদের পক্ষে মাতালের সহিত সহানুভূতি করা সম্ভব হইবে, তখনই বুঝিবে, সেও তোমাদের মত একজন মানুষ। তখনই তোমরা বুঝিতে চেষ্টা করিবে যে, নানা অবস্থাচক্রে পড়িয়া

সে ক্রমশঃ অবনত হইয়াছে, আর বুঝিবে, যদি তুমি তাহার ন্যায় অবস্থায় পড়িতে, তুমি হয়ত আত্মহত্যা করিতে । আমার একটা স্ত্রীলোকের কথা মনে হইতেছে—তাহার স্বামী ছিল ঘোর মাতাল—স্ত্রীলোকটা আমার নিকট তাহার স্বামীর অতিরিক্ত পানদোষ সম্বন্ধে অভিযোগ করিত । আমার কিন্তু নিশ্চিত ধারণা—অধিকাংশ লোকে তাহাদের স্ত্রীর দোষে মাতাল হইয়া থাকে । তোষামোদ করা আমার কার্য্য নহে, আমাকে সত্য বলিতে হইবে । যে সকল অবাধ্য রমণীগণের মন হইতে সহ-গুণ একেবারে চলিয়া গিয়াছে, এবং যাহারা স্বাধীনতা সম্বন্ধে ভ্রান্ত ধারণার বশবর্তী হইয়া বলিয়া থাকে যে, তাহারা পুরুষ-দিগকে নিজেদের মুষ্টির ভিতর রাখিবে, আর যখনই পুরুষেরা সাহস করিয়া তাহাদের অরুচিকর কথা বলিয়া থাকে, তখনই চীৎকার করিতে থাকে—এরূপ রমণীগণ জগতের মহা অকল্যাণ-স্বরূপ হইয়া দাঁড়াইতেছে আর ইহাদের অত্যাচারে জগতের অর্দ্ধেক লোক যে এখনও কেন আত্মহত্যা করিতেছে না, ইহাই আশ্চর্য্যের বিষয় । এই রমণীগণ তাহাদের অর্দ্ধাশন-পীড়িত প্রচারকগণকে তাহাদের দিকে টানিয়া লইতেছে—আর তাঁহারা বলিতেছেন, “মহিলাগণ, আপনারাই জগতের মধ্যে সর্ব্বাপেক্ষা অদ্বুত জীব ।” তখন আবার ঐ রমণীগণ এই প্রচারকগণ সম্বন্ধে বলিতে থাকে, ইনিই আমাদের পক্ষের প্রচারক আর তাঁহাকে টাকাকড়ি ও অগ্ন্যান্ব আবশ্যকীয় বস্তুজাত দিতে থাকে । এই রূপেই জগৎ চলিতেছে । কিন্তু জীবনটা ত এরূপ একটা

তামাসা নহে ; উহার মধ্যে গভীরভাবে প্রাণিধান ও আলোচনার বস্তু অনেক আছে ।

এক্ষণে তোমাদিগকে অঙ্ককার বক্তৃতার মুখ্য মুখ্য বিষয়-গুলি স্মরণ করিতে বলিতেছি । প্রথমতঃ, আমাদিগকে মনে রাখিতে হইবে যে, আমরা সকলেই জগতের নিকট ঋণী, জগৎ আমাদের নিকট কোনরূপে ঋণী নহে । আমাদের সকলেরই ইহা মহা সৌভাগ্য যে, আমরা জগতের জন্ত কিছু করিবার সুযোগ পাইয়াছি । জগৎকে সাহায্য করিতে গিয়া আমরা প্রকৃত পক্ষে নিজেদেরই কল্যাণ করিয়া থাকি । দ্বিতীয় কথা, এইটী স্মরণ রাখা আবশ্যক যে জগদ্রক্ষাণ্ডের একজন ঈশ্বর আছেন । ইহা সত্য নহে যে, এই জগৎ তোমার আমার সাহায্যের অপেক্ষায় রহিয়াছে । ঈশ্বর এখানে সর্ববদাই বর্তমান আছেন । তিনি অবিনাশী, নিয়ত ক্রিয়াশীল, সদা জাগ্রত ও সাবহিত । যখন সমগ্র জগৎ নিদ্রা যায়, তখন তিনি জাগ্রত থাকেন । তিনি প্রতিনিয়ত কার্য্য করিতেছেন । জগতে যে কিছু পরিবর্তন ও বিকাশ দেখা যায়, সবই তাঁহার কার্য্য । তৃতীয়তঃ, আমাদের কাহাকেও ঘৃণা করা উচিত নহে । এই জগৎ চিরকালই শুভাশুভের মিশ্রণস্বরূপ থাকিবে । আমাদের কর্তব্য—দুর্ব্বলের প্রতি সহানুভূতি প্রকাশ, অত্যাযকর্ম্ম-কারীকেও ভালবাসা । এই জগৎ একটী প্রকাণ্ড নৈতিক ব্যায়াম-ক্ষেত্র—এখানে আমাদিগের সকলকেই অভ্যাসরূপ ব্যায়াম করিতে হয় ; যাহাতে দিন দিন আমরা আধ্যাত্মিক বল

লাভ করিতে পারি। চতুর্থতঃ, আমাদের কোন প্রকারের গোঁড়া হওয়া উচিত নহে, কারণ, গোঁড়ামী প্রেমের বিরোধী। গোঁড়ারা কস্ করিয়া বলিয়া বসে, আমি পাপীকে ঘৃণা করি না, পাপকে ঘৃণা করি। কিন্তু প্রকৃত পক্ষে পাপ ও পাপীর মধ্যে প্রভেদ করিতে পারে, এমন লোককে দেখিবার জন্য আমি দূর দূরান্তরে যাইতে প্রস্তুত আছি। কথা ত বলা খুব সোজা। যদি আমরা উত্তমরূপে দ্রব্য ও গুণের মধ্যে পার্থক্য করিতে পারি, তবে ত আমরা সিদ্ধ হইয়া যাইব। ইহা কার্য্যে পরিণত করা বড় সোজা নহে। আরও, যতই আমরা শাস্তুচিত্ত হইব এবং আমাদের স্নায়ুসমূহও যত শাস্ত হইবে, ততই আমরা অধিকতর প্রেমসম্পন্ন হইব এবং ততই আমরা ভাল ভাল কার্য্য করিতে পারিব।

ষষ্ঠ অধ্যায় ।

অনাসক্তিই পূর্ণ আত্মত্যাগ ।

যেমন আমাদের ভিতর হইতে বহির্গত অর্থাৎ আমাদের কায়মনোবাক্য দ্বারা কৃত প্রত্যেক কার্যই আবার ফলরূপে আমাদের নিকট ফিরিয়া আসে, সেইরূপ আমাদের কার্য্য অপরা ব্যক্তির উপর এবং তাহাদের কার্য্য আমাদের উপর তাহার প্রভাব বিস্তার করিতে পারে । আপনারা হয়ত সকলেই লক্ষ্য করিয়া থাকিবেন যে, যখন লোকে কোন অশ্রদ্ধ কার্য্য করে, তখন সে ক্রমশঃ খারাপের পর খারাপ হইতে থাকে এবং সংকার্য্য করিতে আরম্ভ করিলে তাহার অন্তরাত্মা দিন দিন সবল হইতে সবলতর হইতে থাকে—সর্বদাই তাহার ভাল কায করিবার প্রবৃত্তি হইতে থাকে । এইরূপ কর্ম্মের শক্তিবৃদ্ধি আর কোন উপায়ে ব্যাখ্যা করা যাইতে পারে না, কেবল এক মন আর এক মনের উপর কার্য্য করিতে পারে, এই তত্ত্বের দ্বারাই উহার ব্যাখ্যা করা যাইতে পারে । পদার্থ-বিজ্ঞান হইতে একটী উপমা গ্রহণ করিলে বলা যায় যে, আমি যখন কোন কার্য্য করিতেছি, তখন আমার মন একরূপ নির্দিষ্ট কম্পন-বিশিষ্ট রহিয়াছে ; এরূপ অবস্থাপন্ন সকল মনই আমার মন দ্বারা প্রভাবিত হইবার উপক্রম হয় । যদি কোন গৃহে এক সুরে বাঁধা বিভিন্নরূপ বাজ্যন্ত্র থাকে, আপনারা সকলেই লক্ষ্য করিয়াছেন যে, যদি একটীতে আঘাত করা যায়, তবে

অপরগুলিরও সেই সূত্রে বাজিবার উপক্রম হইয়া থাকে । এইটাকে উদাহরণস্বরূপ ধরিলে বুঝিতে পারা যায় যে, ঐ যন্ত্রগুলি একসূত্রে বাঁধা ছিল, সূতরাং একরূপ শক্তি উহাদের উপর একরূপ কার্য্য করিয়াছিল । এইরূপ যে সকল মন একসূত্রে বাঁধা, একরূপ চিন্তা তাহাদের উপর একরূপ কার্য্য করিবে । অবশ্য, দূরত্ব অনুসারে কার্য্যের তারতম্য হইবে, কিন্তু কার্য্য হইবার সর্ব্বদা সম্ভাবনা থাকিবে । মনে করুন, আমি কোন অসৎ কার্য্য করিতেছি, আমার মন কোন বিশেষ-প্রকার কম্পন-বিশিষ্ট রহিয়াছে ; তাহা হইলে জগতের সেইরূপ কম্পন-বিশিষ্ট সকল মনগুলি আমার মনের দ্বারা প্রভাবিত হইবার সম্ভাবনা হইবে । এইরূপ, যখন আমি কোন সৎকার্য্য করিতেছি, তখন আমার মন আর এক সূত্রে বাঁধা বুঝিতে হইবে, আর এইরূপ সূত্রে বাঁধা সকল মনগুলি ঐরূপ প্রভাবিত হইবার সম্ভাবনা হইবে, আর যেমন যেমন সূত্রে বাঁধা থাকিবে, উহার উপর তেমনি তেমনি কার্য্য হইবার সম্ভাবনা হইবে ।

পূর্ব্বোক্ত উপমাটী লইয়া আরও একটু অগ্রসর হইলে বুঝা যাইবে, খুব সম্ভব যে, আলোক-তরঙ্গগুলি যেমন তাহাদের গন্তব্য বস্তুর নিকট পঁছছিবার পূর্ব্ব লক্ষ লক্ষ বৎসর শূন্যমার্গে ভ্রমণ করিতে পারে, এইরূপ এই চিন্তাতরঙ্গগুলিও যতদিন না এমন এক পদার্থকে লাভ করে, যাহার সহিত একযোগে কার্য্য করিতে পারে, ততদিন হয়ত শত শত বর্ষ শূন্যে ভ্রমণ করিবে । সূতরাং খুব সম্ভব যে, আমাদের এই

বায়ুমণ্ডল এইরূপ ভালমন্দ নানাপ্রকার চিন্তাতরঙ্গে পরিপূর্ণ
 রহিয়াছে । প্রত্যেক মস্তিষ্কের প্রত্যেক চিন্তাই যেন এইরূপ
 ভ্রমণ করিতেছে, যতদিন না উহা একটী আধার প্রাপ্ত হয় ।
 যে কোন চিত্ত এইরূপ চিন্তাসমূহকে প্রাপ্ত হইবার জন্য আপ-
 নাকে উন্মুক্ত করিয়াছে, সে চিত্ত শীঘ্রই উহা প্রাপ্ত হইবে ।
 সুতরাং যখন কেহ কোন অসৎকার্য্য করে, সে তখন তাহার
 মনকে এক বিশেষপ্রকার সুরে লইয়া যায়, আর সেই সুরের
 যতগুলি তরঙ্গ পূর্ব্ব হইতেই আকাশে অবস্থিত রহিয়াছে, তাহারা
 তাহার মনে প্রবেশ করিবার চেষ্টা করে ; এই জগ্গই কোন
 অসৎকার্য্যকারী সাধারণতঃ, দিন দিন অসৎ কার্য্যই করিতে
 থাকে । তাহার কার্য্য ক্রমশঃ প্রবল হইতে প্রবলতর হইতে
 থাকে । এইরূপ শুভকর্মাীদের পক্ষেও বৃদ্ধিতে হইবে ।
 তাঁহারও আকাশস্থ সমুদয় শুভতরঙ্গগুলি দ্বারা প্রভাবিত হই-
 বার সম্ভাবনা হইবে, সুতরাং তাঁহার শুভকর্ম্মগুলিও অধিক
 শক্তি লাভ করিবে । অসৎকার্য্য করিতে গেলে, সুতরাং দুই
 প্রকার বিপদ আমরা ডাকিয়া আনি :—প্রথম—আমাদের চতু-
 র্দ্দিকস্থ সমুদয় অসৎ প্রভাবগুলিতে আমরা যেন গা ঢালিয়া
 দিই ; দ্বিতীয়তঃ, আমরা নিজেরা অশুভ তরঙ্গসকল সৃজন
 করিয়া থাকি, বাহা অপরকে আক্রমণ করিতে পারে । হইতে
 পারে যে, আমাদের অশুভ কার্য্য শত শত বৎসর পরে অপরকে
 আক্রমণ করিবে । অসৎকার্য্য করিলে আমরা আমাদের নিজেদের
 এবং অপরেরও অনিষ্ট করি । সৎকার্য্য করিলে আমরা আমা-

দের নিজেদের এবং অপরেরও উপকার করি, এবং মনুষ্যের অভ্যন্তরস্থ অন্যান্য শক্তির ন্যায় এই সদসৎশক্তিদ্বয়ই বাহির হইতে বল সঞ্চয় করে ।

কর্ম-যোগ মতে কর্ম ফলপ্রসব না করিয়া কখনই নষ্ট হইতে পারে না ; প্রকৃতির কোন শক্তিই উহার ফলপ্রসব রোধ করিতে পারে না । আমি কোন অসৎ কার্য্য করিলে আমি তাহার জন্য ভুগিব ; জগতে এমন কোন শক্তি নাই, যাহা উহাকে রোধ করিতে পারে । এইরূপ কোন ভাল কায করিলেও জগতের কোন শক্তিই উহার শুভফলপ্রসব রোধ করিতে পারে না । কারণের কার্য্য হইবেই ; কিছুতেই উহা রোধ করিতে পারে না । এক্ষণে কর্মযোগ-সম্বন্ধে একটা সূক্ষ্ম ও গুরুতর চিন্তার বিষয় আসিতেছে—আমাদের এই সদসৎ কর্ম পরস্পরের সহিত বিশেষ ঘনিষ্ঠ-ভাবে সম্বন্ধ । আমরা একটা প্রভেদ রেখা দিয়া বলিতে পারি না, এই কাযটা সম্পূর্ণ ভাল আর এইটা সম্পূর্ণ মন্দ । এমন কোন কায নাই, যাহা এককালে শুভ অশুভ উভয় ফলই প্রসব না করে । খুব নিকটবর্তী উদাহরণ লউন :—আমি আপনাদের সঙ্গে কথা কহিতেছি ; আপনাদের মধ্যে হয়ত কেহ কেহ ভাবিতেছেন, আমি ভাল কায করিতেছি, কিন্তু ঐ সময়েই হয়ত আমি বায়ুস্থ সহস্র সহস্র কীটাত্মক ধ্বংসের কারণ হইতেছি । সুতরাং আমি কতক প্রাণী সম্বন্ধে অনিষ্ট করিতেছি । আমাদের নিকটস্থ কতকগুলি ব্যক্তি, যাহাদিগকে আমরা জানি, তাহাদের প্রতি যখন উহা শুভ প্রভাব বিস্তার করে, তখন আমরা উহাকে ভাল কায বলি । উদাহরণ-

স্বরূপ আপনাদের নিকট আমার বক্তৃতা আপনারা ভাল বলিবেন, কীটগুণগণ কিন্তু তাহা বলিবে না। কীটগুণগুলিকে আপনারা দেখিতে পাইতেছেন না, কিন্তু আপনাদিগকে আপনারা দেখিতেছেন। আপনাদের উপর আমার বক্তৃতার প্রভাব প্রত্যক্ষ, কিন্তু কীটগুণগণের প্রতি নহে। একরূপই যদি আমরা আমাদের অসৎ কার্যগুলি বিশ্লেষণ করিয়া দেখি, তবে দেখিব, উহাতেও কোথাও না কোথাও কিছু না কিছু শুভফল হইয়াছে। “যিনি শুভকর্মের মধ্যে কিছু অশুভ, আবার অশুভের মধ্যে কিঞ্চিৎ শুভ দেখেন, তিনিই প্রকৃত কর্মরহস্য বুঝিয়াছেন।”

ইহা হইতে আমরা পাইলাম কি? পাইলাম এই,—আমরা যতই চেষ্টা করি না কেন, এমন কোন কার্য হইতে পারে না, যাহা সম্পূর্ণ পবিত্র অথবা সম্পূর্ণ অপবিত্র—এখানে ‘পবিত্রতা, অপবিত্রতা,’ হিংসা বা অহিংসা এই অর্থে গ্রহণ করিতে হইবে। আমরা অপরের অনিষ্ট না করিয়া শ্বাসপ্রশ্বাস ত্যাগ বা জীবন ধারণ করিতে পারি না। আমাদের প্রত্যেক মুষ্টি অন্ন অপরের মুখ হইতে কাড়িয়া লওয়া। আমরা বাঁচিয়া জগৎ জুড়িয়া থাকার দরুণ অপর কতকগুলি প্রাণীর কর্ম হইতেছে। হইতে পারে, মানুষ অথবা অপর প্রাণী অথবা কীটগুণ, কিন্তু যাহারই হউক না, আমরা কোন না কোন প্রাণীর স্থান মারিবার কারণ হইয়াছি। তাহাই যদি হইল, তবে স্বভাবতঃই ইহা বুঝা যাইতেছে যে, কর্ম দ্বারা পূর্ণতা কখন লাভ হয় না। আমরা অনন্ত কাল কায করিয়া যাইতে পারি, কিন্তু এই জটিল সংসারযন্ত্র হইতে বাহির হইবার

পথ পাই না ; তুমি ক্রমাগত কাঁচ করিয়া বাইতে পার, কাঁচের অন্ত পাইবে না ।

দ্বিতীয় বিবেচ্য বিষয় এই, কৰ্মের উদ্দেশ্য কি ? আমরা দেখিতে পাই, প্রত্যেক দেশেরই অধিকাংশ লোকের এই বিশ্বাস, এক সময় এই জগৎ পূর্ণতা লাভ করিবে, তখন ব্যাধি, মৃত্যু, অসুখ বা অসাধুতা থাকিবে না । ইহা খুব ভাল কথা বটে, অজ্ঞেরা ইহা দ্বারা কার্য্যে প্রণোদিত হইতে পারে বটে, কিন্তু এক মুহূর্ত্ত যদি আমরা ভাবিয়া দেখি, তাহা হইলে স্পর্শই দেখিব, এরূপ অবস্থা কখন হইতেই পারে না । কিরূপে ইহা হইতে পারে ? ভালমন্দ যে একই মুদ্রার এপিট ওপিট । ভাল লইতে গেলেই মন্দ না লইয়া কিরূপে চলিবে ? পূর্ণতার অর্থ কি ? সম্পূর্ণ জীবন একটা স্ববিরুদ্ধ বাক্যমাত্র । জীবন প্রত্যেক বহির্ববস্তুর সহিত আমাদের নিয়ত যুদ্ধের অবস্থা । আমরা প্রতি মুহূর্ত্তে বহিঃ-প্রকৃতির সহিত যুদ্ধ করিতেছি । যদি আমরা উহাতে পরাস্ত হই, আমাদের জীবন বাইবে । ভোজ্যদ্রব্যের জন্ম প্রতিনিয়ত চেষ্টার নাম জীবন । খাবার না পাইলেই আমরা মরিব । জীবন একটা অমিশ্র ব্যাপার নহে, উহা একটা মিশ্র ব্যাপার । এই বহির্জগৎ ও অন্তর্জগতের মধ্যে যে ক্রমাগত যুদ্ধ, তাহাকেই আমরা জীবন বলি । অতএব স্পর্শই দেখা বাইতেছে, এই যুদ্ধ শেষ হইলেই জীবন শেষ হইবে ।

পূর্বের যে আদর্শ সুখের কথা বলা হইয়াছে, তাহার অর্থ এই যে, এই সংগ্রাম একেবারে শেষ হইয়া যাইবে । কিন্তু তাহা

হইলে জীবনও শেষ হইবে । জীবনের অন্ত হইলেই কেবল সংগ্রামের শেষ হইবার সম্ভাবনা । আবার এই অবস্থার সহস্র-ভাগের একভাগ উপস্থিত হইবার পূর্বেই এই জগৎ শীতল হইয়া যাইবে । তখন আমরা থাকিব না । অতএব অন্য কোন লোকে হয় হউক, এই জগতে এই সত্যযুগ—এই আদর্শ যুগ—কখনই আসিতে পারে না ।

আমরা পূর্বেই দেখিয়াছি, জগতের উপকার করিতে গিয়া প্রকৃতপক্ষে আমরা নিজেদেরই উপকার করিয়া থাকি । অপরের জন্য আমরা যে কার্য্য করি, তাহার মুখ্য ফল—আমাদের আত্ম-শুদ্ধি । সর্বদা অপরের কল্যাণের চেষ্টা করিতে যাইয়া আমরা আপনাদিগকে ভুলিবার চেষ্টা করিতেছি । আমাদের জীবনে এই এক প্রধান শিক্ষার বিষয়—আত্মবিস্মৃতি । মানুষ অজ্ঞের ন্যায় মনে করে, সাধারণ উপায়ে সে নিজেকে সুখী করিতে পারে । বহুবর্ষ চেষ্টার পর সে অবশেষে দেখিতে পায়, প্রকৃত সুখ স্বার্থপরতার নাশে ; আর সে নিজে আপনাকে সুখী না করিলে কেহই তাহাকে সুখী করিতে পারে না ।

প্রত্যেক পরোপকার-কার্য্য, অপরের প্রতি সহানুভূতির প্রত্যেক চিন্তা, অপরকে আমরা যাহা কিছু সাহায্য করি, সমুদয় সৎকার্য্য আমাদের ক্ষুদ্র আমিকে কমাইতেছে । ঐ গুলিতে আমাদের আপনার ভাবনা খুব কমাইয়া দেয়, সুতরাং উহারা সৎকার্য্য । এই স্থানে জ্ঞানী, ভক্ত ও কর্ম্মী অভেদ । সর্বোচ্চ আদর্শ—অনন্ত কালের জন্য পূর্ণ আত্মত্যাগ, যেখানে কোন

‘আমি’ নাই, সব ‘তুমি’, আর জ্ঞাতসারে বা অজ্ঞাতভাবে কন্ম-যোগ আমাদিগকে ঐ স্থানেই লইয়া যায় ।

একজন ধর্মপ্রচারক নিগুণ ঈশ্বরের কথা শুনিয়া ভয় পাইতে পারে । সে জোর করিয়া বলিতে পারে, ঈশ্বর সগুণ—ব্যক্তিবিশেষস্বরূপ, আর সে নিজের নিজত্ব, নিজের ব্যক্তিত্ব (এইগুলির তাৎপর্য্য সে যাহাই বুঝুক) অনুধ্বা রাখিবার ইচ্ছা করিতে পারে, কিন্তু সে যে ধর্মনীতি অবলম্বন করিয়াছে, তাহা যদি বার্থ্য্যই ভাল হয়, তবে উহা সর্ব্বোচ্চ আত্মত্যাগ ব্যতীত আর কোন ভিত্তির উপর প্রতিষ্ঠিত হইতে পারে না ।

ইহাই সমুদয় নীতির ভিত্তি । আপনারা মনুষ্যে, পশুতে বা দেবতায় ঐ ভাব বিস্তার করিতে পারেন, কিন্তু সমুদয় নীতি-প্রণালীর মধ্যে উহাই মূল তত্ত্ব—উহাই প্রধান ভাব ।

এই জগতে অনেক শ্রেণীর লোক দেখিতে পাইবেন । প্রথম, দেব-প্রকৃতির লোক । ইঁহারা পূর্ণ আত্মত্যাগী, ইঁহারা নিজেদের প্রাণ পর্য্যন্ত পণ করিয়া অপরের উপকার করিতেছেন । ইঁহারাই সর্ব্বশ্রেষ্ঠ মনুষ্য । যদি কোন দেশে এইরূপ একশত লোক থাকেন, সেই দেশের কোন ভাবনা নাই । দ্বিতীয়তঃ—সাধু-লোক, ইঁহারা ততক্ষণ লোকের উপকার করেন, যতক্ষণ না উহাতে তাঁহাদের কোন ক্ষতি হয় । তার পর তৃতীয় শ্রেণীর লোক—আত্ম-প্রকৃতি । ইঁহারা নিজেদের হিতের জন্য অপরের অনিষ্ট করিয়া থাকেন । আর কথিত আছে যে, আর এক শ্রেণীর লোক আছেন, তাঁহারা অনিষ্টের জন্যই অনিষ্ট করিয়া

থাকেন। সর্বোচ্চ স্তরে যেমন দেখা যায়, সাধু মহাত্মাগণ
ভালর জন্যই ভাল করিয়া থাকেন, তদ্রূপ সর্বনিম্ন স্তরে এমন
কতকগুলি লোক আছেন, যাঁহারা কেবল অনিষ্টের জন্যই অনিষ্ট
করিয়া থাকেন। তাঁহারা উহা হইতে কিছু লাভ করিতে পারেন
না, কিন্তু ঐ অনিষ্ট করাই তাঁহাদের স্বভাব। সুতরাং আমরা
দেখিতেছি, যে ব্যক্তি অপরের উপকারের জন্য নিজস্বার্থ
বিসর্জন করেন, যিনি সম্পূর্ণ আত্মত্যাগী, তিনিই সর্ববশ্রেষ্ঠ
পুরুষ।

নিম্নলিখিত সংস্কৃত শব্দ দুইটি লইয়া বিচার করুন। একটি—
'প্রবৃত্তি'—অর্থ, সেই দিকে বর্ত্তিত হওয়া অর্থাৎ ঘুরিয়া যাওয়া আর
একটি 'নিবৃত্তি'—তথা হইতে বর্ত্তিত হওয়া অর্থাৎ ঘুরিয়া আসা।
'সেই দিকে বর্ত্তিত হওয়া'—অর্থাৎ যাহাকে আমরা সংসার বলি,
এই 'আমি আমার;' এই 'আমি'কে টাকা কড়ি, ক্ষমতা নাম বশ
দ্বারা সর্বদাই বাড়াইবার চেষ্টা—যাহা পাওয়া যায়, তাহাই
ধরা—গ্রহণ করা—সর্বদাই সব জিনিষই এই 'আমি'—রূপ
কেন্দ্রের দিকে জড় করা ইহাই প্রবৃত্তি—ইহাই প্রত্যেক মনুষ্যের
স্বাভাবিক ভাব, চারিদিক্ হইতে প্রত্যেক জিনিষ লওয়া এবং
এক কেন্দ্রের চতুর্দিকে জড় করা। সেই কেন্দ্র তাঁহার নিজের
মধুর 'আমি'। যখন ইহা ভাঙ্গিতে থাকে, যখন নিবৃত্তির (সেই
দিক্ হইতে চলিয়া যাওয়ার) উদয় হয়, তখনই নীতি এবং ধর্ম্ম
আরম্ভ হয়। 'প্রবৃত্তি,' 'নিবৃত্তি' উভয়ই কার্য্য; একটা অসৎ,
অপরটা সৎ। এই নিবৃত্তিই সমুদয় নীতি এবং সমুদয় ধর্ম্মের

ভিত্তি । আর উহার পূর্ণতাই সম্পূর্ণ ‘আত্মত্যাগ’,—অপরের জন্য মন, শরীর এমন কি সমুদয়ই ত্যাগ করিতে সর্বদা প্রস্তুত থাকা । যখন মানুষ এই অবস্থা লাভ করে, তখনই মানুষ কর্মযোগে সিদ্ধি লাভ করে । সৎকার্যের ইহাই সর্বোচ্চ ফল । একজন ব্যক্তি সমুদয় জীবন হয়ত একখানি দর্শনও পাঠ করেন নাই, তিনি হয়ত কোনরূপ ঈশ্বরে বিশ্বাস করেন নাই, এবং এখনও করেন না, তিনি হয়ত সারাজীবনের মধ্যে একবারও প্রার্থনা করেন নাই, কিন্তু যদি কেবল সৎকর্মের শক্তিতে তাঁহাকে এমন অবস্থায় লইয়া যায়, যেখানে তিনি অপরের জন্য তাঁহার জীবন এবং অন্য যাহা কিছু, সবই ত্যাগ করিতে উদ্বৃত্ত হন, তাহা হইলে বুঝিতে হইবে, জ্ঞানী যেখানে জ্ঞানের দ্বারা এবং ভক্ত যেখানে উপাসনা দ্বারা উপনীত হইয়াছেন, তিনিও সেইখানেই পঁছছিরাছেন । সুতরাং আপনারা দেখিলেন, জ্ঞানী, কর্মী ও ভক্ত সকলেই এক স্থানে উপনীত হইলেন ; একই স্থানে মিলিত হইলেন । এই এক স্থান আত্মত্যাগ । ভিন্ন ভিন্ন দর্শন ও ধর্মের মধ্যে যতই মত-ভেদ থাক্ না কেন, যে ব্যক্তি অপরের জন্য আত্ম-বিসর্জন দিতে প্রস্তুত হয়, তাহার সমক্ষে সকল মনুষ্যই ভয়-ভক্তিসহকারে দণ্ডায়মান হয় । এখানে কোন প্রকার মতামতের কথা নাই—এমন কি, যাহারা সর্বপ্রকার ধর্মভাবের বিরোধী, তাহারা পর্যন্ত যখন এইরূপ সম্পূর্ণ আত্মবিসর্জনের কার্য দেখিতে পায়, তাহারাও উহার উপর শ্রদ্ধাসম্পন্ন না হইয়া থাকিতে পারে না । আপনারা কি দেখেন নাই, খুব গৌড়া খ্রীষ্টিয়ান যখন এডুইন আর্গল্ডের

‘আসিয়ার আলোক’ (Light of Asia) পাঠ করেন, তিনিও কেমন বুদ্ধের প্রতি শ্রদ্ধাসম্পন্ন হন, যে বুদ্ধ ঈশ্বর প্রচার করেন নাই, আত্ম-ত্যাগ ব্যতীত যিনি আর কিছুই প্রচার করেন নাই। গোঁড়া কেবল একটা জিনিষ জানে না। তাহা এই যে,—তাহার নিজের জীবনের উদ্দেশ্য ও গতিও ঐ একই। উপাসক সর্বদা মনে ঈশ্বরের ভাব এবং সাধুভাব রক্ষা করিয়া অবশেষে সেই একই স্থানে উপনীত হন—‘তোমার ইচ্ছা পূর্ণ হউক।’ তিনি নিজের জন্ত কিছুই রাখেন না। ইহা আর কি?—আত্ম-ত্যাগ। জ্ঞানী জ্ঞানের দ্বারা দেখেন, এই আপাত-প্রতীয়মান ‘আমি’ ভ্রমমাত্র, সূতরাং তিনি সহজেই উহা পরিত্যাগ করেন। যাহা হউক, ইহাও সেই আত্মত্যাগ বই আর কিছুই নহে। অতএব, কর্ম, ভক্তি ও জ্ঞানের এখানে সমন্বয় হইল। আর প্রাচীন কালের বড় বড় ধর্মপ্রচারকেরা ভগবান্ জগৎ নহেন, এই যে উপদেশ করিয়া গিয়াছেন, তাহার মর্ম এই। জগৎ এক জিনিষ আর ভগবান্ এক জিনিষ; ইহা খুব সত্য। জগৎ অর্থে তাঁহারা স্বার্থকে লক্ষ্য করিয়া থাকেন। নিঃস্বার্থতাই ভগবান্। একজন ব্যক্তি স্বর্ণময় প্রাসাদে সিংহাসনে উপবিষ্ট থাকিয়াও সম্পূর্ণ নিঃস্বার্থপর হইতে পারেন। এইরূপ নিঃস্বার্থ হইলেই তাঁহাকে ব্রহ্মে স্থিত বলিয়া বুঝিতে হইবে। অপরের হয়ত কুটীরে বাস, ছিন্ন বসন পরিধান, এবং তাহার সংসারের কিছুই নাই; তথাপি সে যদি স্বার্থপর হয়, তবে সে বিশেষরূপে সংসারে মগ্ন হইয়াছে, বুঝিতে হইবে।

এক্ষণে আমাদের বক্তব্য বিষয়টির পুনরাবৃত্তি করা যাউক।

আমরা বলিতেছি, ভাল করিতে গেলেই আমরা কিছু মন্দ এবং মন্দ করিতে গেলেই তৎসঙ্গে কিছু ভাল না করিয়া থাকিতে পারি না। ইহা জানিয়া আমরা কার্য করিব কিরূপে ? এই তত্ত্বের মীমাংসার চেষ্টায় এই জগতে অনেকগুলি সম্প্রদায়ের অভ্যুদয় হইয়াছিল, যাহারা বেপরোয়া হইয়া প্রচার করিয়া গিয়াছেন যে, ধীরে ধীরে আত্মহত্যা ই সংসার হইতে বাহির হইবার একমাত্র উপায়। কারণ, জীবনধারণ করিলেই তাহাকে ক্ষুদ্র ক্ষুদ্র জন্তু ও বৃক্ষলতাকে নষ্ট করিতে হইবে অথবা কাহারও না কাহারও অনিষ্ট করিতে হইবে। সুতরাং তাঁহাদের মতে সংসারচক্রে হইতে বাহির হইবার একমাত্র উপায়—মৃত্যু। জৈনগণ ইহাই তাঁহাদের সর্বোচ্চ আদর্শ বলিয়া প্রচার করিয়াছেন। আপাততঃ এই উপদেশ খুব যুক্তি ও ন্যায়সঙ্গত বলিয়া বোধ হয়। কিন্তু গীতাতে ইহার প্রকৃত মীমাংসা পাওয়া যাইবে,—নির্লিপ্ততা—কিছুতে লিপ্ত হইও না। জানিয়া রাখ যে, তুমি জগৎ হইতে সম্পূর্ণ পৃথক্ ; তুমি জগতে রহিয়াছ বটে, কিন্তু যাহাই কর না কেন, তাহা নিজের জন্ত করিতেছ না। নিজের জন্ত যে কার্য করিবে, তাহার ফল তোমার নিজের উপর বর্তিবে। যদি সৎ কার্য হয়, তোমাকে উহার শুভ ফল ভোগ করিতে হইবে, অসৎ হইলে উহার অশুভ ফল ভোগ করিতে হইবে। কিন্তু যে কোন কার্যই হউক, তাহা যদি তোমার নিজের জন্ত কৃত না হয়, তাহাতে তোমার উপর কোন প্রভাব বিস্তার করিতে পারিবে না। “যদি কাহারও জ্ঞান থাকে যে, আমি ইহা

নিজের জন্ম করিতেছি না, তবে তিনি সমুদয় জগৎকে হত্যা করিয়াও বা নিজে হত হইয়াও হত্যা করেন না বা হত হন না ।” এই জন্মই কৰ্ম্মযোগ আমাদেরকে বিশেষভাবে শিক্ষা দেন যে, সংসার ত্যাগ করিও না ; সংসারে বাস কর ; সংসারের ভাব যত ইচ্ছা গ্রহণ কর, কিন্তু ভোগের জন্য কি ? না, একেবারেই নহে । ভোগ যেন তোমার চরম লক্ষ্য না হয় । প্রথমে নিজেকে মারিয়া ফেল, তার পর সমুদয় জগৎকে আপনার মত দেখ । যেমন প্রাচীন খ্রীষ্টিয়ানেরা বলিতেন, ‘প্রাচীন মনুষ্য-টাকে মারিয়া ফেলিতে হইবে ।’ ‘প্রাচীন মনুষ্য’, অর্থে আমাদের মনের এই স্বার্থপর ভাব যে, জগৎ আমাদের ভোগের জন্য নিৰ্ম্মিত হইয়াছে । অজ্ঞ পিতামাতারা তাহাদের বালক-বালিকাদিগকে শিক্ষা দেয়, “হে প্রভো, তুমি এই সূর্য্য এই চন্দ্র আমার জন্য সৃজন করিয়াছ,” যেন প্রভুর এই সকল শিশুর জন্য সব সৃজন করা ছাড়া আর কোন কায ছিল না । ইহা আমাদের কামনারূপ অগ্নিতে ঘৃত নিক্ষেপ মাত্র । ছেলে-দিগকে এমন বাজে কথা শিখাইও না । তার পর আর এক-দল লোক আছেন, তাঁহারা আবার অন্য ধরনের আহাম্মক ; তাঁহারা আমাদেরকে শিক্ষা দেন যে, এই সকল জন্তুর সৃষ্টি কেবল আমরা তাহাদিগকে মারিয়া খাইতে পারি, তজ্জন্য, আর এই জগৎ মানুষের ভোগের জন্য । এও একটা প্রকাণ্ড আহাম্মকি ! ব্যাত্রও বলিতে পারে, “মানুষ আমার জন্য সৃষ্ট হইয়াছে,” এবং প্রার্থনা করিতে পারে, “হে প্রভো, মানুষগুলি

কি দুর্ঘটনা, তাহারা আমাদের সম্মুখে ভুল হইবার জন্য আইসে না, উহারা তোমার আত্মা লঙ্ঘন করিতেছে।” যদি জগৎ আমাদের জন্য সৃষ্ট হইয়া থাকে, আমরাও জগতের জন্য সৃষ্ট হইয়াছি। এই জগৎ আমাদের জন্য সৃষ্ট হইয়াছে, এই ভাবেই আমরাগকে বদ্ধ রাখিয়াছে। এই জগৎ আমাদের জন্য নহে। লক্ষ লক্ষ লোক প্রতি বৎসর জগৎ হইতে চলিয়া যাইতেছে, জগতের সে দিকে খেয়ালই নাই। আবার লক্ষ লক্ষ লোক আসিতেছে। যেমন জগৎ আমাদের জন্য, আমরাও তেমনি জগতের জন্য।

অতএব কার্য্য করিবার সময় আসক্তির ভাব ত্যাগ কর। দ্বিতীয়তঃ, কর্ম্মের ভিতর নিজেকে জড়াইও না; নিজে সাক্ষি-রূপে অবস্থিত হও এবং কর্ম্ম করিয়া যাও। কোন সাধু বলিয়াছেন, “আপনার ছেলের উপরে ধাত্রীর ভাব অবলম্বন কর।” ধাত্রী তোমার শিশুকে লইয়া আদর করিবে, তাহার সহিত খেলা করিবে, আর তাহাকে নিজের ছেলের মত অতি যত্নের সহিত লালন পালন করিবে, কিন্তু তাহাকে খবর দিবামাত্র সে গাঁট গাঁটরি বাঁধিয়া তোমার বাটী হইতে চলিয়া যাইতে প্রস্তুত হয়। তোমার ছেলের প্রতি তাহার যে এত ভালবাসা ছিল, সে সবই ভুলিয়া যায়। সাধারণ ধাত্রীর তোমার ছেলে ছাড়িয়া পরের ছেলে লইতে কিছুমাত্র কষ্ট হইবে না। তুমিও তোমার নিজের ছেলের প্রতি এইরূপ ভাব ধারণ কর। তুমিই উহাদের ধাত্রী, আর তুমি যদি ঈশ্বরে বিশ্বাসী

হও, তবে বিশ্বাস কর যে, সবই তাঁহার। অত্যধিক দুর্বল-
তাই অনেক সময়ে খুব সাধুতা ও সরলতার আকার ধারণ
করে। আমার উপর একজন নির্ভর করে এবং আমি এক-
জনের উপকার করিতে পারি, ইহা ভাবাই অত্যন্ত দুর্বলতা।
এই অহঙ্কার হইতেই সর্বপ্রকার আসক্তি এবং আসক্তি হইতেই
সমুদয় দুঃখের উদ্ভব। আমাদের মনকে আমাদের জানান
উচিত, এই জগতের মধ্যে কেহই আমাদের উপর নির্ভর করে
না; একটা গরিবও আমাদের দানের উপর নির্ভর করে না,
একটা আত্মাও আমাদের দয়ার উপর নির্ভর করে না, কেহই
আমাদের সাহায্যের উপর নির্ভর করে না। আমরা কোটি
কোটি লোক যদি না থাকি, তথাপি তাহারা সাহায্য পাইয়া
থাকে, পাইবেও। তোমার আমার জন্য প্রকৃতির গতি বন্ধ
থাকিবে না। আমরা যে অপরকে সাহায্য করিয়া নিজেরা
শিক্ষা লাভ করিতে পারিতেছি, ইহাই তোমার আমার পক্ষে
পরম সৌভাগ্য। সমস্ত জীবন এই এক শিক্ষাই আমাদের
শিক্ষা করিতে হইবে। যখন আমরা উহা পূর্ণরূপে শিক্ষা
করিতে পারিব, তখন আমরা আর অস্বস্তি থাকিব না; তখন
আমরা যাইয়া যেখানে সেখানে মিশিতে পারিব। তোমার পতি
থাকিতে পারে, পত্নী থাকিতে পারে, এক পালচাকর থাকিতে পারে,
তোমার রাজ্য থাকিতে পারে। কিন্তু যদি তুমি এই তত্ত্বটী হৃদয়ে
রাখিয়া কায কর যে, জগৎ তোমার ভোগের জন্য নহে আর উহা
সাহায্যের জন্য তোমার কিছুমাত্র অপেক্ষা করে না, তবে ও

সকল থাকিলেও তোমার কোন ক্ষতি হইবে না। এই বৎসরেই হয়ত আমাদের কতকগুলি বন্ধু মরিয়া গিয়াছে। জগৎ কি তাহাদের জন্য অপেক্ষা করিতেছে? ইহার স্রোত কি বন্ধ হইয়া আছে? ইহা চলিয়াছে। অতএব তোমার মন হইতে এইভাবে একেবারে তাড়াইয়া দাও যে, তুমি জগতের কিছু উপকার করিতে পার; জগৎ তোমার নিকট হইতে কোন সাহায্য চাহে না। জগতের সাহায্যের জন্যই আমার জন্ম—এটা ভাবা খাঁটি অজ্ঞতামাত্র। উহা অহঙ্কার বই আর কিছুই নহে। উহা স্বার্থপরতা বই আর কিছুই নহে—ধর্মের রূপধারণ করিয়া মানবকে প্রতারণা করে মাত্র। যখন তুমি এই ভাবে তোমার স্নায়ু ও পেশীগুলিকে পর্য্যন্ত গঠন করিবে, তখন তোমার কৰ্মরূপ কোন প্রতিক্রিয়া আসিবে না। যখন তুমি কোন লোককে কিছু দিয়া তৎপরিবর্তে কিছু আশা না কর, কৃতজ্ঞতার প্রতিদান পর্য্যন্ত যখন না চাও, তখন উহা তোমার উপর কোন কার্য্য করিবে না, কারণ, তুমি কিছুই আশা কর নাই; তুমি কখনই চিন্তা কর নাই যে, তোমার প্রতিদান পাইবার কোনও অধিকার আছে। তাহার যাহা প্রাপ্য ছিল, তাহাই তুমি দিয়াছিলে। তাহার নিজের কৰ্মের ফলে সে ইহা পাইল, তোমার কৰ্ম তোমাকে উহার বাহক করিয়াছিল মাত্র। কিছু দিয়া তুমি অহঙ্কৃত হও কেন? তুমি ঐ অর্থের বাহক-স্বরূপ-মাত্র। জগৎ নিজ কৰ্মের দ্বারা উহা পাইবার উপযুক্ত হইয়াছিল। অহঙ্কারের কারণ কি?

জগৎকে তুমি যাহা দিতেছ, তাহা এমনই বা কি ? অনাসক্তির ভাব লাভ করিলেই তোমার ভাল বা মন্দ কায কিছুই থাকিবে না। স্বার্থই কেবল ভালমন্দের প্রভেদ করিয়া থাকে। এ একটা বোঝা বড় কঠিন জিনিষ, কিন্তু তুমি সময়ে বুঝিবে, জগতে এমন কোন জিনিষ নাই, যাহা তোমার উপর তাহার শক্তি প্রকাশ করিতে পারে, যতক্ষণ না তুমি তাহাকে তাহার শক্তি প্রকাশ করিতে দাও। মানুষের আত্মার উপর কোন শক্তিই কার্য্য করিতে পারে না, যতক্ষণ না আত্মা বোকা হইয়া ঐ শক্তির আজ্ঞাপালন করে। অতএব, অনাসক্তির দ্বারা তুমি সকল জিনিষের তোমার উপর কার্য্য করিবার শক্তি অস্বীকার করিতেছ। ইহা বলা খুব সহজ যে, কোন জিনিষের তোমার উপর কার্য্য করিবার অধিকার নাই, কিন্তু যিনি বাস্তবিকই কোন শক্তিকে তাঁহার উপর কার্য্য করিতে দেন না, বহির্জগৎ যাঁহার উপর কার্য্য করিলে যিনি সুখীও হন না, দুঃখিতও হন না, তাঁহার চিহ্ন কি ? চিহ্ন এই যে, একটা পাহাড়ও যদি তাঁহার উপর ভাঙ্গিয়া পড়ে এবং তাঁহাকে চূর্ণ বিচূর্ণ করে অথবা যদি তাঁহার সম্মুখে দিব্য দৃশ্যরাজি আবির্ভূত হয় বা দিব্য সুখ সমুদয় উপস্থিত হয়, কিছুতেই তাঁহার মনে কোন পরিবর্তন সাধন করিতে পারে না ; শুভাশুভ উভয় অবস্থাতেই তিনি একরূপ থাকেন।

ব্যাস নামধেয় মহাপুরুষের নাম সকলেই অবগত আছেন।

তিনি বেদান্ত-দর্শনের লেখক—একজন ঋষি। ইঁহার পিতা
 সিদ্ধ হইবার চেষ্টা করিয়াছিলেন, কিন্তু কৃতকার্য্য হইতে পারেন
 নাই, তাঁহার পিতামহও চেষ্টা করিয়াছিলেন, তিনি অকৃত-
 কার্য্য হন, এইরূপ তাঁহার প্রপিতামহও অকৃতকার্য্য হন।
 তিনিও সম্পূর্ণরূপে কৃতকার্য্য হইতে পারেন নাই, কিন্তু তাঁহার
 পুত্র শুকদেব সিদ্ধ হইয়া জন্মগ্রহণ করিলেন। ব্যাস সেই
 পুত্রকে তত্ত্বজ্ঞান উপদেশ দিতে লাগিলেন। নিজে যতদূর
 শিক্ষা দিতে পারেন, দিবার পর তিনি শুকদেবকে জনক
 রাজার সভায় প্রেরণ করিলেন। জনক বিদেহ নামে এক
 মহারাজা ছিলেন, বিদেহ অর্থে “শরীরের বাহিরে।” যদিও
 রাজা, তথাপি তিনি যে দেহ, তাহা সম্পূর্ণ বিস্মৃত হইয়াছিলেন।
 তিনি আপনাকে কেবল আত্মা বলিয়াই জানিতেন। এই
 বালকটীকে তাঁহার নিকট শিক্ষার জন্ম পাঠান হইল। রাজা
 জানিতেন যে, ব্যাসের ছেলে তাঁহার নিকট তত্ত্বজ্ঞান শিক্ষার
 জন্ম আসিতেছে, সুতরাং তিনি পূর্ব হইতে কতকগুলি
 বন্দোবস্ত করিয়াছিলেন। যখন এই বালক গিয়া রাজপ্রাসাদের
 দ্বারদেশে উপস্থিত হইলেন, তখন প্রহরিগণ তাঁহার কোন খবরই
 লইল না। তাহারা কেবল তাঁহাকে বসিবার একটা আসন দিল।
 তিনি তথায় তিন দিন তিন রাত্রি বসিয়া রহিলেন, কেহ তাঁহার
 সঙ্গে কথাই কহিতেছে না, কেহই তাঁহাকে তিনি কে বা কোথায়
 তাঁহার নিবাস, কিছুই জিজ্ঞাসিতেছে না। তিনি এত বড় একজন
 মহাপুরুষের পুত্র, তাঁহার পিতা সমুদয় দেশের একজন সম্মানাস্পদ

ব্যক্তি, তিনি নিজেও একজন মাননীয় ব্যক্তি, তথাপি সামান্য নীচ প্রহরিগণ পর্য্যন্ত তাঁহার খোঁজখবরও লইতেছে না। তার পর হঠাৎ রাজার মন্ত্রিগণ এবং বড় বড় কর্মচারীরা আসিয়া তাঁহাকে মহা-সম্মান-পূর্ব্বক অভ্যর্থনা করিলেন। তাঁহারা তাঁহাকে ভিতরে এক সুশোভিত গৃহে লইয়া গেলেন, সুগন্ধি জলে স্নান করাইলেন, খুব ভাল ভাল পোষাক পরিতে দিলেন, আর আটদিন ধরিয়া তাঁহাকে সর্ব্বপ্রকার বিলাসের ভিতর রাখিয়া দিলেন। কিন্তু তাঁহার মুখের কোন বিকৃতি ঘটিল না। দ্বারে অপেক্ষার সময়ও তিনি যেরূপ ছিলেন, এই সকল বিলাসের মধ্যেও তিনি ঠিক সেইরূপ রহিলেন। তখন তাঁহাকে রাজার নিকট লইয়া যাওয়া হইল। রাজা সিংহাসনে উপবিষ্ট ছিলেন, নৃত্যগীত বাজ ও অন্যান্য আমোদ-প্রমোদ হইতেছিল। রাজা তাঁহাকে এক পেয়ালা দুগ্ধ দিলেন, দুগ্ধটী পাত্রের ধার পর্য্যন্ত পূর্ণ ছিল। তিনি বলিলেন, এই দুগ্ধের পেয়ালাটী লইয়া সাতবার এই রাজসভা প্রদক্ষিণ করিয়া আইস, সাবধান যেন এক ফোঁটা দুগ্ধ না পড়ে। বালক সেই পেয়ালা লইয়া এই সব গীতবাজ ও সুন্দরী রমণীগণের মধ্য দিয়া সাত বার সভা প্রদক্ষিণ করিলেন। এক ফোঁটা দুগ্ধও পড়িল না। সেই বালকের মনের উপর এমন ক্ষমতা ছিল যে, যতক্ষণ না তিনি ইচ্ছা করিবেন, ততক্ষণ তাঁহার মন কিছুই দ্বারা আকৃষ্ট হইবে না। যখন তিনি সেই পাত্রটী রাজার নিকট আনয়ন করিলেন, তখন রাজা তাঁহাকে কহিলেন, “তোমার পিতা তোমাকে যাহা শিখাইয়াছেন এবং তুমি নিজে যাহা শিখিয়াছ,

আমি তাহাই পুনরাবৃত্তি করিতে পারি মাত্র—তুমি সত্য জানিয়াছ ;
যাও গৃহে গমন কর ।”

অতএব দেখা গেল, যে ব্যক্তি আপনাকে বশ করিয়াছে, বাহিরের কোন বস্তু আর তাহার উপর কার্য্য করিতে পারে না । তাহাকে আর কাহারও দাসত্ব করিতে হয় না । তাহার মন স্বাধীনতা-পদবী লাভ করিয়াছে । একরূপ ব্যক্তিই কেবল জগতে বাস করিবার উপযুক্ত । আমরা সচরাচর দুই মতের লোক পাইয়া থাকি । কেহ কেহ দুঃখবাদী—তাহারা বলেন,—এই পৃথিবী কি ভয়ানক, কি অসৎ ! অপর কতকগুলি ব্যক্তি আবার সুখবাদী—তাহারা বলেন—এই জগৎ কি সুন্দর, কি অদ্ভুত ! যাহারা নিজেদের মন জয় করে নাই, তাহাদের পক্ষে এই জগৎ হয় দুঃখে পূর্ণ অথবা সুখদুঃখ-মিশ্রিত বলিয়া প্রতিভাত হয় । আমরা যখন আমাদের মনের উপর প্রভুত্ব করিতে পারিব, তখন ইহাই আবার সুখের সংসার-রূপে পরিণত হইবে । তখন কোন কিছুই আমাদের উপর ভাল বা মন্দভাবে কার্য্য করিতে পারিবে না । আমরা সবই বেশ সামঞ্জস্য-পূর্ণ দেখিতে পাইব । অনেক লোক আছে, তাহারা প্রথমে সংসারকে নরককুণ্ড বলে, পরিণামে তাহারা ইহাকেই স্বর্গ বলিবে । আমরা যদি প্রকৃত কৰ্ম্মযোগী হই, এবং আপনাদিগকে এই অবস্থায় লইয়া যাইবার জন্য শিক্ষিত করিতে ইচ্ছা করি, তবে আমরা যেখানেই আরম্ভ করি না কেন, পরিশেষে পূর্ণ আত্মত্যাগের অবস্থায় পঁহুছিব । আর যখনই এই কল্লিত অহং চলিয়া যায়, তখনই এই সমুদয় জগৎ, যাহা আপাততঃ অমঙ্গলপূর্ণ বলিয়া

বোধ হইতেছে, তাহাকে স্বর্গ এবং পরমানন্দে পূর্ণ বোধ হইবে । ইহার হাওয়া পর্য্যন্ত বদলাইয়া ভাল হইয়া যাইবে, প্রত্যেক মানুষের মুখই ভাল বলিয়া বোধ হইবে । ইহাই কর্ম্মযোগের চরমগতি এবং ইহাই পূর্ণতা বা সিদ্ধি । অতএব দেখিতেছ, এই ভিন্ন ভিন্ন যোগগুলি পরস্পর পরস্পরের বিরোধী নহে । প্রত্যেকটাই আমাদিগকে চরমে একই স্থানে লইয়া যায় এবং পূর্ণত্ব-প্রাপ্তি করাইয়া থাকে । কিন্তু প্রত্যেকটিরই দৃঢ় অভ্যাস আবশ্যিক । অভ্যাসই ইহাদের সমুদয় রহস্য । প্রথমে শ্রবণ, তার পর মনন, তার পর অভ্যাস । প্রত্যেক যোগ-সম্বন্ধেই ইহা খাটে । প্রথমে ইহার বিষয় শুনিতে হইবে, তার পর বুঝিতে হইবে ; অনেক বিষয় যাহা বুঝিতে পার না, তাহা পুনঃপুনঃ শ্রবণে ও মননে অর্থাৎ চিন্তায় স্পষ্টীকৃত হইয়া যাইবে । সব বিষয় একেবারে বুঝা বড় কঠিন । প্রত্যেক বিষয়ের ব্যাখ্যা তোমার নিজের ভিতরে । কেহই কখনও অপরের দ্বারা শিক্ষিত হয় নাই । প্রত্যেককেই নিজেকে নিজে শিক্ষা দিতে হইবে । বাহিরের আচার্য্য কেবল উদ্দীপক কারণমাত্র । সেই উদ্দীপনা দ্বারা আমাদের অন্তর্যামী আচার্য্য আমাদিগকে সমুদয় বিষয় বুঝাইয়া দিবার জন্ম উদ্বোধিত হন । তখন সমুদয় আমাদের প্রত্যক্ষ অনুভব হয়, সুতরাং সমুদয়ই স্পষ্ট হইয়া আসে । আমরা নিজেদের আত্মার ভিতরে ঐ তত্ত্বসকল অনুভব করিব । এই অনুভূতিই প্রবল ইচ্ছাশক্তিরূপে পরিণত হইবে । প্রথমে ভাব, তার পর ইচ্ছা । এই ইচ্ছা হইতে এমন প্রবল কর্ম্মের শক্তি আসিবে যে, তাহা

প্রতি শিরায় প্রতি স্নায়ুতে প্রতি পেশীতে কার্য্য করিতে থাকিবে, যতক্ষণ না তোমার সমুদয় শরীরটি পর্য্যন্ত এই নিষ্কাম কর্ম্মযোগের একটী যন্ত্ররূপে পরিণত হয়। ইহার ফল সম্পূর্ণ আত্মত্যাগ—পূর্ণ নিঃস্বার্থতা। ইহা কোন মতামত বা বিশ্বাসের উপর নির্ভর করে না। কেহ খ্রীষ্টিয়ানই হউক, য়াহুদীই হউক, আর জেণ্টিলই হউক, তাহাতে কিছু আসিয়া যায় না। একমাত্র জিজ্ঞাস্য এই, তুমি কি স্বার্থশূন্য? তাহা যদি তুমি হও, তবে তুমি একখানি ধর্ম্মপুস্তকও না পড়িয়া এবং কোন গির্জা বা মন্দিরে না যাইয়াও সিদ্ধ হইবে। আমাদের বিভিন্ন যোগপ্রণালীর প্রত্যেকটাই অপর প্রণালীর কিছুমাত্র সহায়তা না লইয়া মানুষকে পূর্ণ করিতে সমর্থ, কারণ, এই সকলগুলির একই লক্ষ্য। কর্ম্মযোগ, জ্ঞানযোগ, ভক্তিযোগ—সকল যোগই মুক্তিলাভের সাক্ষাৎ ও অন্যানিরপেক্ষ উপায় হইতে পারে। “সাংখ্যযোগো পৃথগ্বালাঃ প্রবদন্তি ন পণ্ডিতাঃ”, অজ্ঞেয়াই কর্ম্ম ও জ্ঞানকে পৃথক্ বলিয়া থাকে, পণ্ডিতেরা নয়। জ্ঞানীরা জানেন, আপাততঃ পৃথক্ বলিয়া প্রতীয়মান হইলেও চরমে তাহারা এক লক্ষ্যে পঁছিয়া দেয়—পূর্ণতাই এই চরম গতি।

সপ্তম অধ্যায়।

মুক্তি ।

আমরা পূর্বেই বলিয়াছি, ‘কার্য্য’ এই অর্থ ব্যতীত, ‘কর্ম্ম’ শব্দ দ্বারা কার্য্যাকারণভাবও সূচিত হইয়া থাকে। যে কোন কার্য্য, যে কোন চিন্তাতে কোন ফল উৎপাদন করে, তাহাকে ‘কর্ম্ম’ বলে। সুতরাং ‘কর্ম্মবিধানের’ অর্থ কার্য্যাকারণ-সম্বন্ধের নিয়ম—কারণ থাকিলেই তাহার ফল হইবেই হইবে। কোনরূপে উহার অন্যথা হইতে পারে না। আর ভারতীয় দর্শন-মতে, এই ‘কর্ম্ম-বিধান’ সমস্ত জগতেই রাজত্ব করিতেছে। আমরা যাহা কিছু দেখি, অনুভব করি, অথবা যে কোন কার্য্য করি, একদিকে, তাহার পূর্ব-কর্ম্মের ফলমাত্র, আবার অপর দিকে, তাহারাই কারণ হইয়া অন্য ফল উৎপাদন করে। এই বিষয়ের আলোচনার সহিত ‘বিধান’ বা ‘নিয়ম’ শব্দের অর্থ কি, তাহা বিচার করা আবশ্যিক। মনো-বিজ্ঞানের দৃষ্টিতে দেখিলে বলিতে হয়, ঘটনাক্রমের পুনরাবর্তনের প্রবণতার নাম নিয়ম বা বিধি। যখন আমরা দেখি, একটা ঘটনার পরেই আর একটা ঘটনা হইতেছে, অথবা কখন কখন যুগপৎ ঘটিতেছে, তখন আমরা আশা করি, এইরূপ সর্বদাই ঘটিবে। আমাদের দেশের প্রাচীন নৈয়ায়িকগণ ইহাকে ব্যাপ্তি বলিতেন। তাঁহাদের মতে নিয়ম-সম্বন্ধে আমাদের সমুদয় ধারণা এই ব্যাপ্তি হইতেই আসিয়া থাকে। কতকগুলি ঘটনাক্রম

আমাদের মনে অপরিবর্তনীয় ক্রমে জড়িত হইয়া থাকে । সেই জন্য কোন সময়ে কোন বিষয় অনুভব করিবামাত্র তাহা তৎক্ষণাৎ মনের অন্তর্গত অন্যান্য কতকগুলি বিষয়কেও অমনি লক্ষ্য করিয়া থাকে । একটা ভাব অথবা আমাদের মনোবিজ্ঞান অনুসারে, চিত্তে উৎপন্ন একটা তরঙ্গ সর্বদাই অনেক সদৃশ তরঙ্গপরম্পরা উৎপাদন করে । ইহাকেই ভাব-যোগ-বিধান বলে, আর ‘কার্য-কারণসম্বন্ধ’ এই ‘ব্যাপ্তি’-নামধেয় যোগ-বিধানের একটা অংশ-মাত্র । অন্তর্জগতে যেমন বহির্জগতে তেমন ‘বিধানতত্ত্ব’ (নিয়ম-তত্ত্ব) একই প্রকার । উহা এই,—নিয়ম অর্থে মনের এই আকাজক্ষা যে, এক ঘটনার পর আর একটা ঘটনা ঘটিবে, আমাদের দৃষ্টি যতদূর চলে, তাহাতে ঐ ক্রমপরম্পরা পুনঃ পুনঃ ঘটিতে থাকিবে । প্রকৃতপক্ষে, তাহা হইলে, প্রকৃতিতে কোন নিয়ম নাই । কার্যতঃ ইহা বলা ভুল যে, পৃথিবীতে মাধ্যাকর্ষণ আছে অথবা প্রকৃতির কোন স্থলে কোন নিয়ম আছে । আমাদের মন যে প্রণালীতে কতকগুলি ঘটনাক্রমকে ধারণ করে, সেই প্রণালীকেই নিয়ম বলে, ইহা আমাদের মনে অবস্থিত । কতকগুলি ঘটনা একটীর পর আর একটা অথবা একত্র সংঘটিত হইল ; আমাদের মনে দৃঢ় ধারণা হইল, ভবিষ্যতে নিয়মিত ভাবে পুনঃ পুনঃ ইহা ঘটিবে ; এইরূপে মন, সমুদয় ঘটনাক্রমকে যে ভাবে সংঘটিত হইতেছে, তাহা ধরিতে পারে । ইহাকেই বলা যায়—নিয়ম ।

এক্ষণে জিজ্ঞাস্য এই,—নিয়ম সর্বব্যাপী বলিলে আমরা

কি বুঝি । আমাদের জগৎ সমুদয় সত্তার সেই অংশটুকু, যাহা, অস্মদেশীয় মনোবিজ্ঞানবিদগণ যাহাকে দেশকালনিমিত্ত বলেন, তাহার দ্বারা সীমাবদ্ধ । এই জগৎ সেই অনন্ত সত্তার এক অংশ-মাত্র, এক নির্দিষ্ট ছাঁচে ঢালা, অর্থাৎ দেশকালনিমিত্তে গঠিত । আর ঐরূপ ছাঁচে ঢালা অস্তিত্ব-সমষ্টির নামই আমাদের জগৎ । তাহা হইলেই ইহা নিশ্চিত যে, নিয়ম কেবল এই জগতের মধ্যেই সম্ভব, ইহার বাহিরে কোন নিয়ম থাকিতে পারে না । যখন আমরা এই জগতের কথা বলি, তখন আমরা বুঝি, অস্তিত্বের যে অংশটুকু আমাদের মনের দ্বারা সীমাবদ্ধ, ইন্দ্রিয়গোচর জগৎ যাহা আমরা দেখি, অনুভব করি, স্পর্শ করি, দর্শন করি, চিন্তা করি, কল্পনা করি । জগতের ঐ অংশটুকুই কেবল নিয়মাধীন কিন্তু উহার বাহিরে আর নিয়মের প্রসার নাই, যেহেতু কার্য্য-কারণ-ভাব উহার অধিক আর যাইতে পারে না । আমাদের মন এবং ইন্দ্রিয়ের অতীত কোন বস্তুই এই কার্য্য-কারণ-নিয়ম দ্বারা বদ্ধ নহে । কারণ, ইন্দ্রিয়াতীত পদার্থে মানসিক সম্বন্ধ বা যোগ থাকিতে পারে না এবং ভাব-যোগ বা ভাব-সম্বন্ধ ব্যতীত কার্য্যাকারণসম্বন্ধ থাকিতে পারে না । যখন ইহা নামরূপের ছাঁচের মধ্যে পড়িয়া যায়, তখন ইহা কার্য্যাকারণনিয়মের বাধ্য হইয়া থাকে এবং তখনই বলা হয় যে, উহা নিয়মের অধীন, কারণ, কার্য্যাকারণসম্বন্ধই নিয়মের মূল । এক্ষণে আমরা সহজেই বুঝিতে পারিব, স্বাধীন ইচ্ছা বলিয়া কিছু থাকিতে পারে না । ঐ বাক্যটুকুই স্ববিরুদ্ধ । কারণ, ইচ্ছা কি, তাহা আমরা জানি । আর যাহা কিছু আমরা

জানি, সমুদয়ই জগতের অন্তর্গত । আবার জগতের অন্তর্গত সমুদয়ই দেশকালনিমিত্তের ছাঁচে ঢালা । আর যে কোন জিনিষ আমরা জানি, অথবা যাহা কিছু জানা আমাদের পক্ষে সম্ভব, সমুদয়ই কার্য-কারণ-বিধির অধীন । আর যাহা কিছু কার্য-কারণ-বিধির অধীন, তাহা কখন স্বাধীন হইতে পারে না । অপরাপর বস্তু ইহার উপর কার্য করিয়া থাকে । উহাও আবার এক সময়ে কারণ হইয়া থাকে । এইরূপ চলিতেছে । কিন্তু যাহা ইচ্ছারূপে পরিণত হয়, যাহা পূর্বের ইচ্ছারূপী ছিল না, কিন্তু এই ছাঁচে পড়িয়া মনুষ্য-ইচ্ছা-রূপে পরিণত হইয়াছে তাহা স্বাধীন, আর যখন এই ইচ্ছা এই কার্য-কারণ-চক্রের ছাঁচ হইতে বাহির হইয়া যাইবে, তখন ইহা পুনঃ স্বাধীন হইবে । স্বাধীনতা বা মুক্তি হইতেই উহা আসিতেছে, আসিয়া এই বন্ধনের ছাঁচে পড়িতেছে এবং ফিরিয়া পুনর্ববার স্বাধীনতায় চলিয়া যাইতেছে ।

প্রশ্ন হইয়াছিল, জগৎ কোথা হইতে আসে, কাহাতে অবস্থিতি করে এবং কাহাতেই বা লয় হয় ? ইহার উত্তর প্রদত্ত হইল, মুক্তি হইতে ইহার উৎপত্তি, বন্ধনে ইহার বিশ্রাম এবং অবশেষে মুক্তিতে ইহার পুনর্গতি । স্মৃতরাং যখন আমরা বলি, মানুষ সেই অনন্ত সত্তার প্রকাশমাত্র, তখন বুঝিতে হইবে, উহা তাহার অতি ক্ষুদ্র অংশমাত্র । এই দেহ ও এই মন যাহা আমরা দেখিতেছি, তাহার সমগ্র প্রকৃত মানবের এক অংশমাত্র, সেই অনন্ত পুরুষের এক ক্ষুদ্র অংশমাত্র । সমুদয় ব্রহ্মাণ্ডই সেই অনন্ত পুরুষের এক অংশমাত্র । আর আমাদের সমুদয় বিধি, আমাদের

সমুদয় বন্ধন, আমাদের আনন্দ, আমাদের বিষাদ, আমাদের সুখ আশা ভরসা সবই কেবল এই ক্ষুদ্র জগতের ভিতরে। আমাদের উন্নতি অবনতি সবই এই ক্ষুদ্র জগতের ভিতরে। অতএব আপনারা দেখিতেছেন, এই জগৎ চিরকাল থাকিবে, ইহা আশা করা এবং স্বর্গে বাইবার আশা করা কি ছেলেমানুষী ! স্বর্গের অর্থ—এই জগতের পুনরাবর্তন। আপনারা স্পষ্টই দেখিতেছেন, সমুদয় অনন্ত জগৎকে আমাদের সীমাবদ্ধ জগতের মত করিতে চেষ্টা করা কি ছেলেমানুষী ও অসম্ভব ব্যাপার ! অতএব যখন মানুষ বলে, সে এইরূপ ভাবেই চিরদিন থাকিবে, এখন বাহা লইয়া আছে, তাহা লইয়াই চিরদিন থাকিবে অথবা আমি যেমন কখন কখন বলি, যখন মানুষ আয়েসের ধর্ম চায়, আপনারা নিশ্চয় করিয়া রাখিতে পারেন যে, সে এতদূর অবনত হইয়া পড়িয়াছে যে, সে এক্ষণে নিজে বাহা, তাহার অতীত কিছু—সে বর্তমানে যে সকল অবস্থার ভিতর রহিয়াছে, তাহার অতিরিক্ত কিছু ধারণা করিতে পারে না। সে নিজের অনন্ত স্বরূপ ভুলিয়াছে ; তাহার সমুদয় ভাবই এই সব ক্ষুদ্র সুখ দুঃখে এবং সাময়িক ঈর্ষাদিতে আবদ্ধ। সে এই সান্ত জগৎকেই অনন্ত বলিয়া মনে করে। শুদ্ধ তাহাই নহে, সে এই অজ্ঞান কোন মতে ছাড়িবে না। সে প্রাণপণে তৃষ্ণাকে অবলম্বন করিয়া থাকে। আমাদের জ্ঞাত বস্তুর অতিরিক্ত অসংখ্যপ্রকার সুখদুঃখ, অসংখ্যপ্রকার প্রাণী, অসংখ্যপ্রকার বিধি, অসংখ্যপ্রকার উন্নতির নিয়ম, এবং অসংখ্যপ্রকার কার্য-কারণ-সম্বন্ধ

থাকিতে পারে। কিন্তু এই সমুদয়ই প্রকৃতির একদেশ মাত্র।

মুক্তিলাভ করিতে হইলে এই জগতের বাহিরে যাইতে হইবে; উহা ত এখানে পাওয়া যাইতে পারে না। সম্পূর্ণ সাম্যাবস্থালভ বা শ্রীষ্টিয়ানের বাহাকে বুদ্ধির অতীত শাস্তি বলিয়া থাকেন, তাহা এই জগতে হইতে পারে না, স্বর্গেও নহে, অথবা এমন কোন স্থানেও নহে, যেখানে আমাদের চিন্তা-শক্তি অথবা মন যাইতে পারে, অথবা ইন্দ্রিয়গণ যেখানে কোনরূপ অনুভব করিতে পারে, অথবা কল্পনাশক্তি যথায় অগ্রসর হইতে পারে। ঐরূপ কোন স্থানেই উহা পাওয়া যাইতে পারে না, কারণ উহারা অবশ্যই আমাদের জগতের অন্তর্গত হইবে আর সেই জগৎও অবশ্য দেশকালনিমিত্তে সীমাবদ্ধ। অবশ্য ঐ সকল স্থান এই পৃথিবী অপেক্ষা সূক্ষ্মতর হইতে পারে—এমন অনেক স্থান আছে, যাহা এই পৃথিবী অপেক্ষা সূক্ষ্মতর, যেখানে ভোগ এখানকার অপেক্ষা তীব্রতর, কিন্তু উহারাও জগতের অন্তর্গত, স্তত্রাং নিয়মের বন্ধনের ভিতর। অতএব আমাদিগকে উহাদের বাহিরে যাইতে হইবে। আর যেখানে এই ক্ষুদ্র জগতের শেষ, সেই স্থানেই প্রকৃত ধর্মের আরম্ভ। এই ক্ষুদ্র ক্ষুদ্র আনন্দ, বিষাদ এবং জ্ঞান সবই সেখানে শেষ হইয়া যায় এবং প্রকৃত সত্য আরম্ভ হয়। যতদিন না আমরা জীবনের জন্য এই তৃষ্ণা বিসর্জন দিতে পারি, যত দিন না এই ক্ষণস্থায়ী সত্তার প্রতি প্রবল আসক্তিকে ত্যাগ করিতে পারি, ততদিন সেই জগতের অতীত অনন্ত মুক্তির

একবিন্দু আভাস পাইবারও আমাদের আশা নাই। অতএব ইহা সিদ্ধান্ত হইল যে, মনুষ্যজাতির চরম গতি মুক্তিলভ করিবার একমাত্র উপায় আছে—সেই উপায় এই যে,—এই ক্ষুদ্র জীবনকে ত্যাগ করিতে হইবে, এই ক্ষুদ্র জগৎকে ত্যাগ করিতে হইবে—এই পৃথিবীকে ত্যাগ করিতে হইবে, স্বর্গকে ত্যাগ করিতে হইবে, শরীরকে ত্যাগ করিতে হইবে, মনকে ত্যাগ করিতে হইবে, সর্বস্ব ত্যাগ করিতে হইবে।

যদি আমরা ইন্দ্রিয় ও মনের দ্বারা সীমাবদ্ধ এই ক্ষুদ্র জগৎকে ত্যাগ করিতে পারি, তবে আমরা তৎক্ষণাৎ মুক্ত হইব। বন্ধন হইতে মুক্ত হইবার একমাত্র উপায়—সমুদয় নিয়মের বাহিরে যাওয়া—কার্য্যকারণশৃঙ্খলের বাহিরে যাওয়া, আর যেখানেই এই জগৎ আছে, সেখানেই কার্য্যকারণশৃঙ্খল বর্তমান। কিন্তু এই জগৎকে ত্যাগ করা বড় কঠিন ব্যাপার। অতি অল্প লোকেই সংসার ত্যাগ করিতে পারে। আমাদের শাস্ত্রে সংসারত্যাগের দুইটি উপায় কথিত হইয়াছে। একটিকে নিবৃত্তিমার্গ বলে, উহাতে নেতি নেতি (ইহা নহে, ইহা নহে,) এইরূপে সমুদয় ত্যাগ করিতে হয়, আর একটিকে প্রবৃত্তিমার্গ বলে, উহাতে ইতি ইতি করিয়া সকল বস্তু ভোগ করিয়া তার পর ত্যাগ করা হয়। নিবৃত্তি-মার্গ অতি কঠিন। উহা কেবল বিশেষ উন্নতমনা প্রবল ইচ্ছাশক্তি-সম্পন্ন মহাপুরুষদের সাধ্য। তাঁহারা কেবল বলেন, আমি ইহা চাই না, বলিবামাত্র তাঁহাদের শরীর মন তাঁহাদের আজ্ঞানুবর্তী হয়, আর তাঁহারা সংসারের বাহিরে চলিয়া যান। কিন্তু এরূপ

লোক অতি দুর্লভ। অধিকাংশ লোকে তাই প্রবৃত্তিমার্গ গ্রহণ করে। তাহাতে এই জগতের ভিতর দিয়াই যাইতে হয়, এই বন্ধনগুলিকেই বন্ধন ভঙ্গ করিবার সহায়তারূপে গ্রহণ করা হয়। উহাও ত্যাগ, তবে ধীরে ধীরে, ক্রমশঃ ক্রমশঃ। উহাতে সমস্ত পদার্থকে জানিতে হয়, ভোগ করিতে হয়; এইরূপে উহাদের সম্বন্ধে অভিজ্ঞতা লাভ হইলে, উহাদের স্বরূপ বেশ করিয়া জানিতে পারিলে মন তবে উহাদিগকে ছাড়িতে পারিবে এবং অনাসক্ত হইয়া যাইবে। প্রথমোক্ত মার্গের সাধন বিচার আর শেখোক্তির কার্য। প্রথমটি জ্ঞানীর জন্ম, তিনি কর্ম ত্যাগ করেন, এবং দ্বিতীয়টি কর্মযোগ—ইহাতে কর্ম করিতে হয়। প্রত্যেক ব্যক্তিকেই এই জগতে কার্য্য করিতে হইবে। কেবল যাহারা সম্পূর্ণরূপে আত্মতৃপ্ত, যাহারা আত্মাব্যতীত আর কিছু কামনা করেন না, যাহাদের মন আত্মা হইতে অন্যত্র কুত্রাপি গমন করে না, আত্মাই যাহাদের সর্ববশ্ব, তাহাদের কর্ম না করিলে চলে। অবশিষ্ট ব্যক্তিগণকে কর্ম অবশ্য করিতে হইবে। একটি জল-স্রোত স্বভাবতঃ কোন নদীর মুখাভিমুখে স্বাধীনভাবে গমন করিতে করিতে একটি গর্তের ভিতরে পড়িয়া ঘূর্ণিরূপে পরিণত হইল; সেই ঘূর্ণিরূপে কিছুকাল ঘুরিবার পর উহা আবার সেই উন্মুক্ত স্রোতের আকারে বহির্গত হয়। প্রত্যেক মনুষ্যজীবনও এই স্রোততুল্য। উহাও ঘূর্ণির মধ্যে পড়িয়াছে—নামরূপাত্মক জগতের ভিতর পড়িয়া হাবুডুবু খাইতেছে, কিছু ক্ষণ আমার বাপ, আমার মা, আমার নাম, আমার যশ প্রভৃতি বলিয়া চীৎকার করিতেছে,

অবশেষে বাহির হইয়া উহা আপনার মুক্ততাব পুনঃ প্রাপ্ত হইতেছে। সমুদয় জগৎ, জানুক বা নাই জানুক, জ্ঞাতসারে বা অজ্ঞাতভাবে ইহা করিতেছে। প্রত্যেকেই এই সুখ দুঃখ ভোগ করিতেছে, এবং অবশেষে এই ঘূর্ণির বাহিরে চলিয়া যাইতেছে।

তবে কৰ্ম্মযোগ কি? কৰ্ম্মরহস্য অবগত হওয়া। আমরা দেখিতেছি, সমুদয় জগৎ কার্য্য করিতেছে। কিসের জন্ত? মুক্তির জন্ত, স্বাধীনতালাভের জন্য, পরমাণু হইতে মহোচ্চ প্রাণী পর্য্যন্ত সকলেই জ্ঞাতসারে বা অজ্ঞাতসারে সেই এক উদ্দেশ্যে কার্য্য করিয়া চলিয়াছে—মনের স্বাধীনতা, দেহের স্বাধীনতা, আত্মার স্বাধীনতা, সমুদয় বিষয়ের স্বাধীনতা মানুষ চাহিতেছে—সর্ব্বদাই মুক্তি লাভ করিতে এবং বন্ধন হইতে পলাইতে, জ্ঞাতসারে বা অজ্ঞাতভাবে চেষ্টা করিতেছে। সূর্য্য, চন্দ্র, পৃথিবী, গ্রহ সকলেই বন্ধন হইতে পলায়ন করিতে চেষ্টা করিতেছে। সমগ্র জগৎটাকেই এই কেন্দ্রানুগা ও কেন্দ্রাতিগা শক্তিদ্বয়ের ক্রীড়াভূমি বলা যাইতে পারে। কৰ্ম্মযোগ আমাদের কাছে কার্য্যের রহস্য—কৰ্ম্মের প্রণালী—বলিয়া দেন। এই জগতে চতুর্দিকে কেবল ধাক্কা না খাইয়া দীর্ঘকাল বিলম্বে অনেক টানাপড়েনের পর প্রত্যেক জিনিষের স্বরূপ না দেখিয়া যাহাতে লোকে শীঘ্র প্রকৃততত্ত্ব জানিতে পারে, এই জন্য কৰ্ম্মযোগ আমাদের কাছে কৰ্ম্মের রহস্য, কৰ্ম্মের প্রণালী শিখান; অল্প পরিশ্রমে কিরূপে অধিক কার্য্য পাওয়া যায়, তাহা শিখান। ব্যবহার করিতে না জানিলে অনেকটা শক্তি বৃথা নষ্ট হইতে পারে। কৰ্ম্মযোগ কৰ্ম্মের একটা রীতিমত বিদ্যা করিয়া তুলেন। এই বিজ্ঞা

দ্বারা তুমি জানিতে পারিবে, জগতের সমুদয় কার্যগুলির সদ্যবহার কিরূপে করিতে হইবে। কৰ্ম অবশ্যস্বাবী—করিতেই হইবে, কিন্তু কার্য কর, খুব উচ্চতম উদ্দেশ্য রাখিয়া। কৰ্মযোগ আমাদিগকে স্বীকার করাইয়া লন যে,—এই জগৎ পাঁচ মিনিটের জন্য, কিন্তু উহার মধ্য দিয়া চলা ব্যতীতও কোন উপায় নাই; এখানে মুক্তি নাই, মুক্তি পাইতে হইলে আমাদিগকে জগতের বাহিরে যাইতে হইবে। জগতের বাহিরে যাইবার এই পথ পাইতে হইলে আমাদিগকে ধীরে ধীরে অথচ দৃঢ়পদবিক্ষেপে যাইতে হইবে। এমন বিশেষ বিশেষ মহাপুরুষ থাকিতে পারেন, যাঁহাদের বিষয় আমি এইমাত্র বলিলাম, যাঁহারা একেবারে জগতের বাহিরে আসিয়া দাঁড়াইয়া উহাকে ত্যাগ করিতে পারেন, যেমন সর্প উহার ত্বক্ পরিত্যাগ করিয়া বাহিরে থাকিয়া উহা দেখিয়া থাকে। এরূপ বিশেষ বিশেষ ব্যক্তি কতকগুলি আছেন বটে, কিন্তু অবশিষ্ট মানবগণকে ধীরে ধীরে ইহারই ভিতর দিয়া যাইতে হইবে, আর কৰ্মযোগ এই কার্য হইতে খুব সফল লাভ করিবার প্রণালী, রহস্য, উপায় জগৎকে দেখাইয়া দেন।

কৰ্মযোগ কি বলেন? কৰ্মযোগ বলেন, তুমি নিরন্তর কৰ্ম কর, কিন্তু কৰ্মে আসক্তি ত্যাগ কর। কোন বিষয়ের সহিত আপনাকে জড়াইও না। মনকে স্বাধীন করিয়া রাখ। যাহা কিছু দেখিতেছ, কষ্টদুঃখ সমস্তই জগতের অবশ্যস্বাবী ব্যাপার মাত্র, দারিদ্র্য, ধন ও সুখ সাময়িক মাত্র, উহারা আমাদের স্বভাবগত একেবারে নহে। আমাদের স্বরূপ দুঃখের অথবা সুখের অথবা

প্রত্যক্ষ বা কল্পনার একেবারে অতীত প্রদেশে, তথাপি আমাদের সর্বদাই কার্য্য করিয়া যাইতে হইবে। ‘আসক্তি হইতে দুঃখ আইসে, কৰ্ম্ম হইতে নয়।’

যখনই আমরা কার্য্যের সহিত আপনাকে মিশাইয়া ফেলি, তখনই আমরা নিজেকে অতি দুঃখী বলিয়া বোধ করি, কিন্তু উহার সহিত না মিশিলে আমরা আর কষ্ট অনুভব করি না। অপরের অধিকৃত একখানি সুন্দর ছবি পুড়িয়া গেলে আপনার দুঃখ হয় না, কিন্তু আপনার নিজের একখানি পুড়িয়া গেলে আপনার কষ্টের সীমা থাকে না! কেন? উভয়খানিই সুন্দর ছবি, হয়ত দুইখানিই একই মূল ছবির নকল, কিন্তু একস্থলে কষ্ট অনুভব হয়, অপর স্থলে কিছুই হয় না, ইহার কারণ— এক স্থলে তিনি ছবির সহিত আপনাকে মিশাইয়া ফেলিয়াছেন, অপর স্থলে তাহা করেন নাই। এই ‘আমি আমারই’ সমুদয় দুঃখের জননী। অধিকারের ভাব হইতেই স্বার্থ আসিয়াছিল এবং ঐ স্বার্থপরতা দুঃখ আনয়ন করিয়াছিল। প্রত্যেক স্বার্থপর কার্য্য বা স্বার্থচিন্তা আমাদের কোন না কোন বিষয়ে আসক্ত করায়, আর আমরা অমনি সেই বস্তুর দাস হইয়া যাই। চিন্তের যে কোন তরঙ্গ হইতে ‘আমি আমার’ উৎথিত হয়, তাহা তৎক্ষণাৎ আমাদের শৃঙ্খলবদ্ধ করিয়া ক্রীতদাস করিয়া তুলে। যতই আমরা ‘আমি আমার’ বলি, ততই দাসত্বের ভাব বর্দ্ধিত হয়, ততই দুঃখও বর্দ্ধিত হয়। এই হেতু কৰ্ম্মযোগ বলেন, জগতের যত ছবি আছে, সমুদয়ের সৌন্দর্য্য সম্ভোগ কর, কিন্তু

উহাদের সহিত আপনাকে মিশাইও না, ‘আমার’ কখনও বলিও না। যখনই আমরা বলি, ইহা আমার, তৎক্ষণাৎ দুঃখ আসিবে। মনে মনে আমার ছেলে ইহাও বলিও না ; ছেলেকে লইয়া আদর কর, তাহাকে লইয়া আনন্দ কর, কিন্তু আমার বলিও না। আমার বলিলেই দুঃখ আসিবে। আমার বাড়ী, আমার শরীর বলিও না। ঐ জায়গায় মুস্কিল। শরীর আপনারও নয়, আমারও নয়, কাহারও নয়। এই সকল, প্রকৃতির নিয়মে আসিতেছে, যাইতেছে, কিন্তু আমরা মুক্ত—সাক্ষিস্বরূপ। এক খানি ছবি বা দেওয়াল যেক্রপ স্বাধীন নহে, শরীরও তদ্রূপ স্বাধীন নহে। একটা দেহে আপনাকে আসক্ত করিবার কি আবশ্যক ? কোন লোক একখানি ছবি আঁকিল। সে ইহা আঁকিল, তার পর সে দেহ-ত্যাগ করিল। কেন উহাতে আসক্ত হয় ? উহাকে যাইতে দাও ; ‘আমি ঐ বস্তু অধিকার করিব’, এই বলিয়া স্বার্থের জাল বিস্তার করিও না। যখনই এই স্বার্থজাল বিস্তৃত হয়, তখনই দুঃখ আরম্ভ হয়।

অতএব কৰ্মযোগী বলেন, প্রথমে এই স্বার্থপরতার জাল বিস্তার করিবার প্রবৃত্তিকে নাশ কর। যখন তুমি উহা দমন করিবার শক্তি লাভ করিবে, তখন মনকে থামাইয়া আর এরূপ তরঙ্গাকারে পরিণত হইতে দিও না। তার পর সংসারে গিয়া যতদূর পার, কার্য্য কর। তখন সব স্থানে গিয়া মিশ, যেখানে ইচ্ছা যাও, তোমাকে কিছুতে স্পর্শ করিতে পারিবে না। পদ্ম-পত্রে যেমন জল লিপ্ত হয় না, তদ্রূপ তুমিও নিলিপ্তভাবে থাকিবে,

ইহাই বৈরাগ্য, ইহাই কৰ্মযোগের মূল ভিত্তি—অনাসক্তি । আমি এই মাত্র আপনাদিগকে বলিতেছি, অনাসক্তি ব্যতীত কোন যোগই হইতে পারে না । ইহাই সমুদয় যোগের ভিত্তি, আর পূর্বের যেরূপ ব্যাখ্যা করা হইল, তাহাই অনাসক্তি । গৃহে বাস, উত্তম বস্ত্র পরিধান এবং সুখাচ্ছ ভোজন ত্যাগী অরণ্যবাসী ব্যক্তি ঘোর বিষয়াসক্ত হইতে পারে । তাহার একমাত্র সম্বল নিজের শরীর তাহার সর্ববস্তু হইতে পারে, সে সেই দেহেরই সুখের জন্য হয়ত চেষ্টা করিতেছে । অনাসক্তি বাহিরের শরীরকে লইয়া নহে, অনাসক্তি মনে । ‘আমি আমার’ ইহাই শরীরের সহিত সংযোগের শৃঙ্খল-স্বরূপ । যদি শরীরের সহিত এবং ইন্দ্রিয়-বিষয়-সমূহের সহিত এই যোগ না থাকে, তবে আমরা যেখানেই থাকি না কেন, আমরা অনাসক্ত । একজন সিংহাসনে উপবিষ্ট হইয়াও সম্পূর্ণরূপে অনাসক্ত হইতে পারে, আর এক জন হয়ত চীরপরিহিত, কিন্তু সে ভয়ানক আসক্ত । আমরা আপনাদিগকে প্রথমে এই অনাসক্তি লাভ করিতে হইবে, তার পর নিরন্তর কার্য্য করিতে হইবে । কৰ্মযোগী এই আসক্তি ত্যাগ করিবার প্রণালী আমরা আপনাদিগকে দেখাইয়া দেন । অবশ্য এই আসক্তি ত্যাগ করা অতি কঠিন ।

সমুদয় আসক্তি ত্যাগ করিবার দুইটি উপায় আছে । প্রথম উপায় তাহাদের জন্ম, যাহারা ঈশ্বরে অথবা বাহিরের কোন সহায়তায় বিশ্বাস করে না । তাহারা তাহাদের নিজ নিজ কৌশল বা উপায় অবলম্বন করুক । তাহাদিগকে নিজেদেরই

ইচ্ছাশক্তি, মনঃশক্তি এবং বিচার অবলম্বন করিয়া কার্য্য করিতে হইবে—তাহাদিগকে জোর করিয়া বলিতে হইবে, আমি অনাসক্ত হইব। যাহারা ঈশ্বরে বিশ্বাস করেন, তাঁহাদের পক্ষে কর্ম্মযোগ-সাধন অপেক্ষাকৃত সহজ। তাঁহারা কর্ম্মের সমুদয় ফল ভগবানে অর্পণ করিয়া কার্য্য করিতে যান, স্ততরাং কর্ম্মফলে আসক্ত হন না। তাঁহারা যাহা কিছু দেখেন, অনুভব করেন, শুনে বা করেন, সবই তাঁহার জ্ঞান। আমরা যে কোন সংকার্য্য করি না কেন, তাহার জ্ঞান যেন আমরা মোটেই প্রশংসা না চাই। উহা প্রভুর প্রাপ্য, স্ততরাং সমুদয় ফল তাঁহাকেই অর্পণ কর। আমরা আমাদের জীবনের সর্ব্বোচ্চ কার্য্যেরও কোন ফল কামনা যেন না করি, মনে না করি যে, আমরা একটা খুব ভাল কায করিয়াছি।

সকল কার্য্যই তাঁহার। আমরা একধারে সরিয়া দাঁড়াইয়া ভাবিতে হইবে যে, আমরা আমাদের প্রভুর আজ্ঞাবহ ভৃত্যমাত্র, আর আমাদের প্রত্যেক কার্য্যপ্রবৃত্তি প্রতি মুহূর্ত্তে তাঁহা হইতে আসিতেছে।

যৎ করোষি যদশ্বাসি যজ্জুহোসি দদাসি যৎ ।

যত্তপশ্বসি কৌন্তেয় তৎ কুরুষ মদর্পণং ॥

যাহা কিছু কর, যাহা কিছু ভোজন কর, যাহা কিছু হোম কর, যাহা কিছু দান কর, যাহা কিছু তপস্বী কর, সমুদয়ই আমাতে অর্থাৎ ভগবানে অর্পণ করিয়া শান্তভাবে অবস্থান কর। নিজে সম্পূর্ণ শান্তভাবে থাকিয়া যেন আমাদের সমুদয় শরীর,

মন এবং সমুদয়ই ভগবানের নিকট অনন্ত বলিস্বরূপে প্রদত্ত হয়। অগ্নিতে ঘৃতাহুতির পরিবর্তে দিবারাত্র এই ক্ষুদ্র অহংকে আহুতিদানরূপ মহাযজ্ঞ কর।

“জগতে ধন অন্বেষণে গিয়া তোমাকেই একমাত্র ধন পাইয়াছি, আমি তোমাতে আত্মসমর্পণ করিলাম। জগতে একজন প্রেমাস্পদ খুঁজিতে গিয়া তোমাকেই একমাত্র প্রেমাস্পদ পাইয়াছি, আমি তোমাতে আত্মসমর্পণ করিলাম।” এইটী দিবারাত্র আৰুতি করিতে হইবে, আর বলিতে হইবে—“আমার জন্ম কিছুই নহে ; শুভ অশুভ বা উদাসীন যে কোন বিষয়ই হউক না কেন, কিছুই আমার জন্ম নহে ; আমি ও সকল চাই না, আমি সমুদয়ই তোমাকে সমর্পণ করিলাম।”

দিনরাত্রি এই আপাত-প্রতীয়মান অহংকে সঙ্কোচ করিতে থাক, যতদিন পর্য্যন্ত না উহা একটী অভ্যাসে পরিণত হয়, যতদিন পর্য্যন্ত না উহা শিরায় শিরায় মজ্জায় মজ্জায় প্রবেশ করে এবং সমুদয় শরীরটী পর্য্যন্ত ঐ ভাবের অধীন হইয়া যায়। তখন আমরা যেখানে ইচ্ছা বাইতে পারি, কিছুই আমাদের স্পর্শ করিতে পারিবে না। শব্দায়মান কামান ও ঘোর কোলাহলে পূর্ণ রণক্ষেত্রে গমন করিলেও আমরা মুক্ত ও স্বাধীন থাকিব।

কর্মযোগ আমাদেরকে শিক্ষা দেন, কর্তব্য নিম্নভূমিতেই কেবল করণীয়—তথাপি আমাদের প্রত্যেককেই কর্তব্য কর্ম করিতে হইবে। কিন্তু আমরা দেখিতেছি, এই কর্তব্যই আবার একমাত্র দুঃখের কারণ। ইহা আমাদের পক্ষে রোগবিশেষ

হইয়া পড়ে এবং আমাদিগকে সর্বদা সেই দিকে আকর্ষণ করিয়া লইয়া যায়। উহা আমাদিগকে ধরিয়া রাখে এবং আমাদের সমুদয় জীবনটাই দুঃখপূর্ণ করিয়া যায়। ইহা মনুষ্য-জীবনের মহা বিভীষিকাস্বরূপ। “এই কর্তব্যবুদ্ধি গ্রীষ্মকালের মধ্যাহ্ন সূর্য ; উহা মনুষ্যের অন্তরাত্মাকে দগ্ধ করিয়া থাকে।” এই সব কর্তব্যের ক্রীতদাসদের দিকে চাহিয়া দেখ। কর্তব্য বেচারাদের কিছু ভাবিবার সাবকাশ দেয় না, কর্তব্য তাহাদিগকে স্নানাহ্নিকের পর্য্যন্ত সময় দেয় না। কর্তব্য সর্বদাই যেন তাহাদের পেছনে লাগিয়া আছে। তাহারা বাটীর বাহিরে যায়, গিয়া কার্য্য করে, কর্তব্য তাহাদের পেছনে লাগিয়াই আছে। তাহারা বাটীতে ফিরিয়া আসিয়া তৎপরদিনের কর্তব্য চিন্তা করে, সেখানেও কর্তব্যের হাত হইতে ছাড়ান নাই। এ ত ক্রীতদাসের জীবন—অবশেষে অশ্বের ন্যায় লাগামে যোতা থাকিয়া মৃত্যু। লোকে কর্তব্য এইরূপই বুঝিয়া থাকে। বাস্তবিক একমাত্র কর্তব্য—অনাসক্ত হওয়া এবং স্বাধীন পুরুষের ন্যায় কার্য্য করা। সমুদয় কর্ম্ম ঈশ্বরে সমর্পণ—আমাদের কর্তব্য বলিয়া যাহা মনে করিতেছি, এ সবই তাঁহার। আমরা যে জগতে প্রেরিত হইয়াছি, ইহাতে আমরা ধন্য। আমরা আমাদের নির্দিষ্ট কার্য্য করিয়া যাইতেছি মাত্র। কে জানে, আমরা ভাল করিতেছি কি মন্দ করিতেছি ? উত্তমরূপে করিলেও আমরা ফল প্রার্থনা করিব না, মন্দভাবে করিলেও তাহার জন্য চিন্তাশ্রিত হইব না। স্বাধীনভাবে শান্তিপূর্ণ হইয়া থাক ও খাটিয়া যাও। এই অবস্থা লাভ করা বড় কঠিন।

দাসত্বকে কর্তব্য বলিয়া, চামড়ায় চামড়ায় ঘৃণিত আসক্তিকে কর্তব্য বলিয়া ব্যাখ্যা করা অতি সহজ ! লোকে সংসারে যাইয়া টাকার জন্ত চেফ্টা করিয়া থাকে । তাহাদিগকে জিজ্ঞাসা কর, কেন উহা করিতেছে । তাহারা বলিবে, উহা আমাদের কর্তব্য । বাস্তবিক উহা কাঞ্চনের জন্ত অস্বাভাবিক তৃষ্ণামাত্র । এই তৃষ্ণাকে তাহারা কতকগুলি ফুল চাপা দিয়া রাখিবার চেফ্টা করিতেছে ।

যাহাকে সচরাচর কর্তব্য বলা যায়, তাহা প্রকৃতপক্ষে আর কি ? উহা কেবল আসক্তি, চর্ম্মপরতন্ত্রতা মাত্র ; কোন আসক্তি বন্ধমূল হইয়া গেলেই আমরা তাহাকে কর্তব্য নাম দিয়া থাকি । যে সব দেশে বিবাহ নাই, সে সব দেশে স্বামীস্ত্রীর মধ্যে কোন কর্তব্যও নাই । ক্রমশঃ সমাজে যখন বিবাহ-প্রথা আসিয়া প্রবেশ করে এবং স্বামী-স্ত্রী একত্রে বাস করিতে আরম্ভ করে, তাহারা চামড়ার টান বশতঃ একত্রে বাস করে, ক্রমশঃ বংশানুক্রমে উহা প্রথা-স্বরূপ দাঁড়াইয়া যায়, তখনই উহা কর্তব্য হইয়া দাঁড়ায় । ইহা এক প্রকার চিরস্থায়ী ব্যাধিমাত্র । যখন এক আধবার প্রবলা-কারে দেখা দেয়, তখন আমরা উহাকে ব্যারাম বলি, আর যখন উহা সামান্যভাবে চিরস্থায়ী দাঁড়াইয়া যায়, আমরা উহাকে ‘প্রকৃতি’ আখ্যা দিয়া থাকি । যাহাই হউক, উহা রোগমাত্র । আসক্তিটা প্রকৃতিগত হইয়া গেলে আমরা উহাকে কর্তব্যরূপ লম্বাচোড়া নামে অভিহিত করিয়া থাকি, আমরা উহার উপর ফুল ছড়াইয়া দিই, চেট্টরা পিটিতে থাকি, উহাকে মত্তপূত করিয়া লই । তখন সমুদয় জগতই ঐ কর্তব্যের অনুরোধে পরস্পর

যুদ্ধ করিতে থাকে এবং একজন আর একজনের দ্রব্য অপহরণ করিয়া থাকে ।

কর্তব্য এই হিসাবে কতকটা ভাল যে, উহাতে পশুত্বভাব কতক পরিমাণে নিবারণ করে । যাহারা অতিশয় নিম্নাধিকারী, যাহারা অন্য কোনরূপ আদর্শ ধারণা করিতে পারে না, তাহাদের পক্ষে ইহা কতক পরিমাণে উপকারী বটে, কিন্তু যাহারা কৰ্মযোগী হইতে ইচ্ছা করেন, তাহাদিগকে কর্তব্যের ভাব একেবারে তাড়াইতে হইবে । তোমার আমার পক্ষে কোন কর্তব্যই নাই । যাহা তোমার জগৎকে দিবার থাকে, দাও, কিন্তু কর্তব্য বলিয়া নহে । উহার জন্য কিছু চিন্তা পর্যন্ত করিও না । বাধ্য হইয়া কিছু করিও না । কেন বাধ্য হইয়া করিবে ? বাধ্য হইয়া যাহা কিছু কর, তাহাতেই আসক্তি আসিয়া থাকে । তোমার আমার কর্তব্য বলিয়া কিছু থাকিবার আবশ্যকতা কি ?

“সমুদয়ই ঈশ্বরে সমর্পণ কর” “এই সংসার-রূপ ভয়ানক অগ্নিময় কটাহে—যেখানে কর্তব্যরূপ অনল সকলকে ঝলসাইয়া ফেলিতেছে—তথায় এই ঈশ্বরার্পণ-রূপ অমৃতপাত্র পান করিয়া সুখী হও ।” আমরা কেবল তাহার ইচ্ছানুযায়ী কার্য করিতেছি, পুরস্কার বা শাস্তির সহিত আমাদের কোন সম্পর্ক নাই । যদি তুমি পুরস্কার পাইতে ইচ্ছা কর, তবে তাহার সহিত তোমাকে শাস্তিও লইতে হইবে । শাস্তি এড়াইবার একমাত্র উপায়—পুরস্কার ত্যাগ করা । দুঃখ এড়াইবার একমাত্র উপায়—সুখের ভাবকে ছাড়িয়া দেওয়া, কারণ, উভয়ই একসূত্রে গ্রথিত । একদিকে সুখ, আর একদিকে

দুঃখ ; একদিকে জীবন, অপর দিকে মৃত্যু ! মৃত্যুকে অতিক্রম করিবার একমাত্র উপায়—জীবনের আশা পরিত্যাগ করা । জীবন ও মৃত্যু একই জিনিষ, এক জিনিষেরই বিভিন্ন দিক্ মাত্র । অতএব ‘দুঃখশূন্য’ সুখ এবং ‘মৃত্যুশূন্য’ জীবন কথাগুলি বিছালয়ের ছেলেদের পক্ষে শুনিতে খুব ভাল বটে, কিন্তু চিন্তাশীল ব্যক্তি দেখেন, এগুলি কতকগুলি স্ববিরোধী বাক্যাংশমাত্র, সুতরাং তিনি উভয়ই পরিত্যাগ করেন ; যাহা কিছু কর, তাহার জন্ম কোনরূপ প্রশংসা বা পুরস্কারের আশা করিও না । ইহা অতি কঠিন কার্য্য । আমরা যদি কোন সৎকার্য্য করি, অমনি তাহার জন্ম প্রশংসা চাহিতে আরম্ভ করিয়া থাকি । যাই আমরা কোন সৎকার্য্যে চাঁদা দিই, অমনি আমরা কাগজে আমাদের নাম দেখিতে ইচ্ছা করিয়া থাকি । এইরূপ বাসনার ফল অবশ্যই দুঃখ ! জগতের শ্রেষ্ঠতম লোকেরা লোকের অজ্ঞাত ভাবে চলিয়া গিয়াছেন । তাঁহাদিগের সহিত তুলনায় তোমাদের পরিচিত বুদ্ধগণ ও খ্রীষ্টগণ দ্বিতীয় শ্রেণীর ব্যক্তি মাত্র । এইরূপ শত শত ব্যক্তি প্রতিদেশে আবির্ভূত হইয়া নীরবে কার্য্য করিয়া গিয়াছেন । নীরবে তাঁহারা জীবন যাপন করেন ও নীরবে চলিয়া যান ; সময়ে তাঁহাদের চিন্তারাশি বুদ্ধগণ ও খ্রীষ্টগণে ব্যক্তভাব ধারণ করে । এই শেষোক্ত ব্যক্তিগণই তখন আমাদের পরিচিত হন । শ্রেষ্ঠতম পুরুষগণ তাঁহাদের জ্ঞান হইতে কোন নাম যশের অন্বেষণ করেন নাই ।—তাঁহারা জগতে তাঁহাদের ভাব দিয়া যান ; তাঁহারা নিজেদের জন্ম কোনরূপ দাবী করেন না অথবা নিজেদের নামে

কোন সম্প্রদায় বা ধর্ম প্রণালী স্থাপন করিয়া যান না। তাঁহাদের প্রকৃতিরই উহা বিরোধী। তাঁহারা শুদ্ধসাত্ত্বিক; তাঁহারা কোন চেষ্টা করিতে পারেন না, কেবল প্রেমে গলিয়া যান। আমি এইরূপ একজন যোগী * দেখিয়াছি তিনি ভারতের একটা পর্বতগুহায় বাস করেন। আমি যত অদ্ভুত লোক দেখিয়াছি, তন্মধ্যে ইনি একজন। তিনি তাঁহার আমিত্ব এতদূর হারাইয়াছেন যে, ইহা অনায়াসেই বলিতে পারা যায়, তাঁহার ভিতর যে মনুষ্য ভাব ছিল, তাহা সম্পূর্ণরূপে নষ্ট হইয়াছে, তৎপরিবর্তে কেবল ঐশ্বরিক ভাব তাঁহার হৃদয় অধিকার করিয়া বসিয়াছে। যদি কোন প্রাণী তাঁহার একটা হাত কামড়াইয়া দেয়, তিনি তাহাকে তাঁহার অপর হাতটাও দিতে প্রস্তুত হন এবং বলেন, ইহা প্রভুর ইচ্ছা। যাহা কিছু তাঁহার নিকট আসিয়া উপস্থিত হয়, সবই তিনি প্রভুর ইচ্ছা জ্ঞান করেন। তিনি লোকের কাছে দেখা দেন না, অথচ তিনি প্রেম এবং সত্য ও মধুর ভাবরাশির প্রস্রবন-স্বরূপ।

তার পর অপেক্ষাকৃত অধিক রজঃশক্তিশালী পুরুষগণ আসেন। তাঁহারা সিদ্ধ পুরুষগণের ভাব গ্রহণ করিয়া জগতে উহা প্রচার করেন। শ্রেষ্ঠতম পুরুষগণ ভাবরাশি সংগ্রহ করেন, আর বুদ্ধ গ্রীষ্টগণ আসিয়া সেই সব ভাব লইয়া স্থানে স্থানে প্রচার করিয়া বেড়ান।—গৌতম বুদ্ধের জীবন-চরিতে আমরা দেখিতে পাই, তিনি সর্বদাই আপনাকে পঞ্চবিংশ বুদ্ধ বলিয়া পরিচয় দিতেছেন। তাঁহার পূর্বের যে চব্বিশ জন বুদ্ধ হইয়া

* পণ্ডারী বাবা।

গিয়াছেন, ইতিহাসে তাঁহারা অপরিচিত, কিন্তু ইহা নিশ্চিত যে, ঐতিহাসিক বুদ্ধ অবশ্যই তাঁহাদের কৃত ভিত্তির উপরেই নিজ ধর্ম-প্রাসাদ নির্মাণ করিয়া গিয়াছেন। শ্রেষ্ঠতম পুরুষগণ শান্ত, নীরব ও অপরিচিত। তাঁহারা চিন্তার শক্তি কতদূর, তাহা জানেন। তাঁহারা নিশ্চয় জানেন যে, যদি তাঁহারা কোন গুহায় গমন করিয়া গুহার দ্বার বন্ধ করিয়া পাঁচটি বিষয় চিন্তা করেন, তাহা হইলে সেই পাঁচটি চিন্তাই অনন্তকাল ধরিয়া থাকিবে। সেই চিন্তাগুলি পর্বত ভেদ করিয়া সমুদ্র পার হইয়া সমুদয় জগৎ ভ্রমণ করিয়া আসিবে, তৎপরে কোন এক মস্তিষ্কে প্রবেশ করিবে এবং এমন কোন লোক উৎপন্ন করিবে, যে ব্যক্তি অবশেষে ঐ চিন্তাগুলিকে কার্যে পরিণত করিবে। পূর্বোক্ত সাদৃশ্য ব্যক্তিগণ ভগবানের এত নিকটে অবস্থান করেন যে, তাঁহারা কর্মশীল হইয়া জগতে পরোপকার, ধর্মপ্রচার প্রভৃতি কর্ম করিতে অপারগ। কর্মীরা যতই ভাল হন না কেন, তাঁহাদের কিছু না কিছু অজ্ঞান থাকিয়া যায়। যখন আমাদের স্বভাবে কিছু না কিছু অপবিত্রতা অবশিষ্ট থাকে তখনই আমরা কার্য করিতে পারি—কর্মের প্রকৃতিই এই,—সাধারণতঃ উহাতে অভিসন্ধি ও আসক্তি থাকে। কিন্তু সদা ক্রিয়াশীল বিধাতা ও ঈশ্বরের সমক্ষে—যিনি ক্ষুদ্র চটকপক্ষীর পতন পর্য্যন্ত লক্ষ্য করিতেছেন,—মানুষ তাহার নিজ কার্যের এতটা বড়াই কেন করে? যখন তিনি জগতের অতি ক্ষুদ্রতম প্রাণীর পর্য্যন্ত খবর রাখিতেছেন, তখন ঐরূপ ভাবা কি ঈশ্বর-নিন্দা নহে? আমাদের কেবল তাঁহার

সমক্ষে ভয়-ভক্তি-সমাহিতও হইয়া দণ্ডায়মান হইয়া বলা উচিত—
তোমার ইচ্ছা পূর্ণ হউক । শ্রেষ্ঠতম পুরুষেরা কার্য্য করিতে
পারেন না । “যিনি আত্মাতেই আনন্দ করেন, যিনি আত্মাতেই
তৃপ্ত, যিনি আত্মাতেই সন্তুষ্ট, তাঁহার কোন কার্য্য নাই ।”
ইঁহারাই সর্ব্বশ্রেষ্ঠ মানব । ইঁহারা কার্য্য করিতে পারেন না ;
কিন্তু এতদ্ব্যতীত, প্রত্যেককেই কার্য্য করিতে হইবে । তা বলিয়া
ভাবিও না যে, তুমি জগতের অতি ক্ষুদ্র প্রাণিকেও কিছু সাহায্য
করিতে পার ; তাহা তুমি পার না । এই জগৎরূপ শিফালয়ে
এই পরোপকার কার্য্যের দ্বারা তুমি নিজেই নিজের উপকার
করিয়া থাক । কার্য্য করিবার সময় এইরূপ ভাব অবলম্বন করাই
কর্তব্য । যদি তুমি এই ভাবে কার্য্য কর, যদি তুমি সর্ব্বদাই
মনে রাখ যে, কার্য্য করিতে পাওয়া তোমার পক্ষে মহা সৌভাগ্যের
বিষয়, তবে তুমি কখন উহাতে আসক্ত হইবে না । জগৎ
চলিয়াছেই । তোমার আমার মত লক্ষ লক্ষ লোকে মনে করে,
আমরা বড় লোক, কিন্তু আমরা যাই মরিয়া যাই, অমনি পাঁচ
মিনিটের ভিতর জগৎ আমাদিগকে ভুলিয়া যায় । কিন্তু ঈশ্বরের
জীবন অনন্ত । “কো বাগ্মাৎ কঃ প্রাণ্যাৎ যদেষ আকাশ
আনন্দো স্মাৎ ।” যদি সেই সর্ব্বশক্তিমান্ প্রভু ইচ্ছা না
করিতেন, তবে কে এক মুহূর্ত্তও বাঁচিতে পারিত, কে
এক মুহূর্ত্তও শ্বাস প্রশ্বাস ত্যাগ করিতে পারিত ? তিনিই নিয়ত
কৰ্ম্মশীল বিধাতা । সকল শক্তিই তাঁহার এবং তাঁহার আজ্ঞাধীন ।
“ভয়াদশ্মাগ্নিস্তপতি ভয়ান্তপতি সূর্য্যঃ । ভয়াদিন্দ্রশ্চ বায়ুশ্চ মৃত্যু-

ধাবতি পঞ্চম ।” তাঁহার আজ্ঞায় বায়ু বহিতেছে, সূর্য্য কিরণ দিতেছে, পৃথিবী বিধৃত রহিয়াছে এবং মৃত্যু জগতীতলে বিচরণ করিতেছে । তিনিই সব এবং তিনিই সকলে বিরাজিত । আমরা কেবল তাঁহার উপাসনা করিতে পারি মাত্র । কৰ্ম্মের সমুদয় ফল ত্যাগ কর, সৎকার্য্যের জগ্গই সৎকার্য্য কর, তবেই কেবল সম্পূর্ণ অনাসক্তি আসিবে । তখন হৃদয়-গ্রন্থি ছিন্ন হইয়া যাইবে ; আমরা পূর্ণ মুক্তি লাভ করিব । ইহাই কৰ্ম্মরহস্য ।

অষ্টম অধ্যায় ।

কর্মযোগের আদর্শ ।

কথা এই, আমরা বিভিন্ন উপায়ে সেই একই চরম অবস্থায় পঁহুঁছিতে পারি। এই উপায়গুলি আমি চারিটা বিভিন্ন উপায়-রূপে সংক্ষেপে বর্ণনা করিয়া থাকি :—কর্ম, ভক্তি, যোগ ও জ্ঞান। কিন্তু ইহা যেন তোমাদের অবশ্য মনে থাকে যে, এই ভাগগুলি একেবারে অত্যন্ত পৃথক্ বিভাগ নহে। প্রত্যেক-টাই অপরটার অন্তর্গত। কিন্তু প্রাধান্য অনুসারে এই বিভাগ। ইহা সত্য নহে যে, তুমি এমন লোক বাহির করিতে পারিবে না, যাহার ভিতরে কর্ম করা ব্যতীত অন্তরূপ শক্তিও আছে, অথবা যাহার শুধু ভক্তি ছাড়া আরও কিছু আছে, অথবা যাহার শুধু জ্ঞান ছাড়া আরও কিছু আছে। বিভাগ কেবল গুণ-প্রাধান্যে। আমরা দেখিয়াছি, অবশেষে সমস্ত পথই এক লক্ষ্য স্থলে পঁহুঁছিয়া দেয়। সকল ধর্ম এবং সকল সাধন প্রণালীই সেই এক চরম লক্ষ্যে লইয়া যাইতেছে।

প্রথমে আমি সেই চরম লক্ষ্যটি কি, তাহা বুঝাইবার চেষ্টা করিব। সমুদয় জগতের চরম গতি কি? মুক্তি। যাহা কিছু আমরা দেখি, অনুভব করি, অথবা শ্রবণ করি, পরমাণু হইতে মানুষ পর্য্যন্ত, অচেতন প্রাণহীন জড়বস্তু হইতে সর্বোচ্চ

মানবাত্মা পর্য্যন্ত সকলেই মুক্তির জন্য চেষ্টা করিতেছে । এই মুক্তির জন্য চেষ্টার ফল—এই জগৎ । এই জগৎরূপ মিশ্রণে প্রত্যেক পরমাণুই অপর পরমাণুসমূহের নিকট হইতে পলায়নের চেষ্টা করিতেছে এবং অপর গুলি উহাকে আবদ্ধ করিয়া রাখিতেছে । আমাদের পৃথিবী সূর্য্যের নিকট হইতে এবং আমাদের চন্দ্র পৃথিবীর নিকট হইতে পলায়নের চেষ্টা করিতেছে । প্রত্যেক জিনিষই অনন্তবিস্তারোন্মুখী । আমরা জগতে সৎ অসৎ বা উদাসীন যে কোন পদার্থ দেখিতেছি, এই জগতের ভিতর যত কার্য্য বা চিন্তা আছে, সকল গুলিরই ভিত্তি—এই মুক্তির জন্য একমাত্র চেষ্টা । ইহারই প্রেরণায় সাধু উপাসনা করে এবং চোর চুরি করে । যখন কার্য্যপ্রণালী অযথা হয়, তখন আমরা তাহাকে মন্দ বলি, আর যখন কার্য্যপ্রণালীর প্রকাশ যথাযথ ও উচ্চতর হয়, তখন তাহাকে ভাল বলি । কিন্তু প্রেরণা উভয় স্থলেই সমান—সেই মুক্তির জন্য চেষ্টা । সাধু নিজের বন্ধন ভাবিয়া কাতর, তিনি উহা হইতে উদ্ধার হইতে চাহেন, তজ্জন্য ঈশ্বরের উপাসনা করেন । চোরও এই ভাবিয়া কাতর যে, তাহার কতকগুলি বস্তুর অভাব, সে ঐ অভাব হইতে মুক্ত হইতে চায়, এই হেতু সে চুরি করিয়া থাকে । চেতন অচেতন সমুদয় প্রকৃতির লক্ষ্যই এই মুক্তি । জ্ঞাতসারে বা অজ্ঞাত ভাবে সমুদয় জগৎই ঐ মুক্তি প্রাপ্তির জন্য চেষ্টা করিয়া চলিয়াছে । অবশ্য সেই একই মুক্তির চেষ্টার প্রেরণায় সাধু ও চোর উভয়েই কার্য্য করিলেও উভয়ের ফল অত্যন্ত ভিন্নরূপ দাঁড়ায় । সাধু মুক্তির

চেষ্টায় কার্য্য করিয়া অনন্ত অনির্বচনীয় আনন্দ প্রাপ্ত হন, কিন্তু চোরের কেবল বন্ধনের উপর বন্ধন বাড়িতে থাকে ।

প্রত্যেক ধর্ম্মেই আমরা মুক্তির জন্ম প্রাপণ চেষ্টার বিকাশ দেখিতে পাই । ইহা সমুদয় নীতির—সমুদয় নিঃস্বার্থপরতার ভিত্তি । নিঃস্বার্থপরতা অর্থে ‘আমি এই ক্ষুদ্র শরীর’ এই ভাবের অতীত অবস্থায় যাওয়া । যখন আমরা দেখিতে পাই, কোন লোক সৎকার্য্য করিতেছে, পরোপকার করিতেছে, তখন ইহার অর্থ এই বুঝায় যে, সেই ব্যক্তি “আমি আমার” রূপ ক্ষুদ্র বৃত্তের ভিতর আবদ্ধ হইয়া থাকিতে চাহে না । এই স্বার্থপরতার গম্ভীর বাহিরে এই পর্য্যন্ত যাইতে পারা যায়, এইরূপ কোন নির্দিষ্ট সীমা নাই । সকল বড় বড় নীতি-প্রণালীতেই সম্পূর্ণ স্বার্থত্যাগকে চরমাদর্শ বলিয়া প্রচার করিয়া থাকেন । মনে কর, যেন লোকের এই সম্পূর্ণ স্বার্থত্যাগের অবস্থা লাভ করিবার শক্তি আছে ; ইহা লাভ করিলে তাহার কিরূপ অবস্থা দাঁড়াইবে ? সে আর তখন ছোটখাট একটি রামশ্যাম থাকে না ; সে তখন অনন্ত বিস্তার লাভ করে । পূর্বে তাহার যে ক্ষুদ্র ব্যক্তিত্ব ছিল, তাহা একেবারে চলিয়া যায় । সে তখন অনন্ত-স্বরূপ হইয়া যায় । এই অনন্ত বিকাশ-প্রাপ্তিই সমুদয় ধর্ম্মের এবং সমুদয় শিক্ষার লক্ষ্য । ব্যক্তিত্ববাদী যখন এই তত্ত্বটী দার্শনিক ভাবে বিন্যস্ত দেখেন, তখন তিনি শিহরিয়া উঠেন । কিন্তু নীতি প্রচার করিতে গিয়া তিনি নিজেই সেই একই তত্ত্ব প্রচার করিতেছেন । তিনিও মানুষের নিঃস্বার্থপরতার কোন সীমা নির্দেশ করেন না । মনে কর, এই

ব্যক্তিবাদ-মতে কোন ব্যক্তি সম্পূর্ণ অনাসক্ত হইল। তাহাকে তখন অপরাপর সম্প্রদায়ের পূর্ণ সিদ্ধ ব্যক্তি হইতে পৃথক রাখিবার উপায় কি ? সে তখন জগতের সহিত এক হইয়া যায় ; উহাই চরম লক্ষ্য। তবে ব্যক্তিবাদী বেচারী তাঁহার নিজের সিদ্ধান্তভিত্তিগুলিকে তাহাদের যথার্থ সিদ্ধান্ত পর্য্যন্ত অনুসরণ করিতে সাহস করেন না। নিঃস্বার্থ কর্ম্মদ্বারা মানব-জীবনের চরমাবস্থা এই মুক্তি লাভ করাই কর্ম্মযোগ। প্রত্যেক স্বার্থপূর্ণ কার্য্যই সূতরাং আমাদের সেই চরমাবস্থায় পঁছরিবার প্রতিবন্ধক-স্বরূপ, আর প্রত্যেক নিঃস্বার্থ কর্ম্মই আমাদের সেই চরম অবস্থার দিকে লইয়া যায় ; এই হেতু নীতিসঙ্গত ও নীতিবিরুদ্ধ ইহাদের এইমাত্র সংজ্ঞা করা যায় যে, যাহা স্বার্থপর, তাহা নীতিবিরুদ্ধ, যাহা নিঃস্বার্থপর, তাহাই নীতিসঙ্গত।

বিশেষ বিশেষ কর্তব্যের কথা বলিতে গেলে কিন্তু এত সোজা যুক্তি ভাবে বলা চলে না। অবস্থাভেদে কর্তব্য ভিন্ন ভিন্ন হইবে। একই কার্য্য এক ক্ষেত্রে নিঃস্বার্থপর এবং অপর ক্ষেত্রে স্বার্থপর হইতে পারে। সূতরাং আমরা কেবল কর্তব্যের একটা সাধারণ সংজ্ঞা প্রদান করিতে পারি ; বিশেষ বিশেষ কর্তব্যকার্য্য অবশ্য দেশ, কাল, পাত্রভেদে ভিন্ন ভিন্ন হইবে। একদেশে এক প্রকার আচরণ নীতিসঙ্গত বলিয়া বিবেচিত হইবে, অপর দেশে আবার তাহাই অতিশয় নীতিবিগর্হিত বলিয়া বিবেচিত হইবে। ইহার কারণ, ভিন্ন ভিন্ন দেশে অবস্থা ভিন্ন ভিন্ন। আমরা দেখিতে পাই, সমুদয় প্রকৃতির চরম লক্ষ্যই মুক্তি, আর এই মুক্তি কেবলমাত্র

পূর্ণ নিঃস্বার্থপরতা হইতে লাভ হয়। আর প্রত্যেক স্বার্থশূন্য কার্য্য, প্রত্যেক নিঃস্বার্থ চিন্তা, প্রত্যেক নিঃস্বার্থ বাক্য আমাদিগকে ঐ আদর্শের দিকে লইয়া যায়; এই জন্যই সেই কার্য্যকে নীতিসঙ্গত কার্য্য বলে। তুমি দেখিবে, এই সংজ্ঞাটি সকল ধর্ম্ম এবং সকল নৈতিক প্রণালী সম্বন্ধেই খাটিবে। নীতিতত্ত্বের মূল সম্বন্ধে অবশ্য বিভিন্ন দেশে বিভিন্ন ধারণা থাকিতে পারে। কোন কোন প্রণালীতে উহা কোন মহান পুরুষ অর্থাৎ ভগবান্ হইতে প্রাপ্ত বলিয়া উল্লিখিত। যদি তুমি সেই সকল সম্প্রদায়স্থ ব্যক্তিগণকে জিজ্ঞাসা কর, মানুষ এ কায করিবে কেন, মানুষ ও কায করিবে কেন, তাঁহারা উত্তর দিবেন, ইহা ঈশ্বরের আজ্ঞা; কিন্তু যে মূল তত্ত্ব হইতেই তাঁহারা ইহা পাইয়া থাকুন না কেন, তাঁহাদের নীতিতত্ত্বের মূল কথা—‘আমার’ চিন্তা না করা, ‘অহং’কে ত্যাগ করা। কিন্তু তথাপি নীতিতত্ত্ব সম্বন্ধে এইরূপ উচ্চ ধারণা থাকিলেও অনেকে তাঁহাদের ক্ষুদ্র ব্যক্তিত্ব ত্যাগ করিতে ভীত। যে ব্যক্তি এইরূপে ক্ষুদ্র ব্যক্তিত্বকে ধরিয়া থাকিতে চায়, তাহাকে আমি বলি, এমন এক ব্যক্তির চিন্তা কর, যে সম্পূর্ণ নিঃস্বার্থ; যাহার নিজের জন্ম কোন চিন্তা নাই, যে নিজের জন্ম কোন কার্য্য করে না, যে নিজের জন্য কোন কথা বলে না; এখন বল দেখি, তাহার ‘নিজ’ কোথায়? যতক্ষণ সে নিজের জন্য চিন্তা করে, কার্য্য করে বা জ্ঞানোপার্জন করে, ততক্ষণই তাহার ‘নিজের’ অস্তিত্ব। কিন্তু যদি কেবল তাঁহার অপর সম্বন্ধেই—জগতের সম্বন্ধেই জ্ঞান থাকে, তাহা হইলে সে

‘নিজে’ কোথায় ? তাহার ‘নিজত্ব’ তখন একেবারে লোপ পাইয়াছে।

অতএব কৰ্ম্মযোগ নিঃস্বার্থপরতা বা সৎকৰ্ম্ম দ্বারা মুক্তিলাভ করিবার এক প্রণালীবিশেষ। কৰ্ম্মযোগীর কোন প্রকার ধৰ্ম্মমত অবলম্বন করিবার আবশ্যকতা নাই। তিনি ঈশ্বর বিশ্বাস করুন বা না করুন, কিম্বা আত্মা সম্বন্ধে অনুসন্ধান করুন বা না করুন, অথবা কোন প্রকার দার্শনিক বিচার করুন বা না করুন, কিছুতেই আসিয়া যায় না। তাঁহার নিজের নিঃস্বার্থপরতা-লাভ-রূপ বিশেষ উদ্দেশ্য রহিয়াছে, আর তাহাকে নিজ চেষ্টায়ই উহা লাভ করিতে হইবে। তাঁহার জীবনের প্রতি মুহূর্ত্ত যেন প্রত্যক্ষানুভব হয়, কারণ জ্ঞানী বা ভক্ত মতামতের সহায়তা লইয়া যে সমস্যাসমাধানে নিযুক্ত রহিয়াছেন, তিনি কোন প্রকার মতামতের সহায়তা না লইয়া সেই সমস্যারই পূরণে নিযুক্ত।

এক্ষণে প্রশ্ন আসিতেছে, এই কার্য কি ? জগতের উপকার করা রূপ এই ব্যাপারটি কি ? আমরা কি জগতের কোন উপকার করিতে পারি ? উপকার অর্থে পূর্ণ উপকার বুঝিলে বলিতে হইবে, না, কিন্তু আপেক্ষিক ভাবে ধরিলে হাঁ বলিতে হইবে। জগতের কোনরূপ চিরস্থায়ী উপকার করা যাইতে পারে না ; তাহা যদি করা যাইত, তাহা হইলে ইহা আর এই জগৎ থাকিত না। আমরা পাঁচ মিনিটের জন্য কোন ব্যক্তির ক্ষুধা নিবারণ করিতে পারি, কিন্তু সে আবার ক্ষুধার্ত্ত হইবে। আমরা মানুষকে যাহা কিছু সুখ দিতে পারি, তাহা ক্ষণস্থায়ী মাত্র। কেহই এই নিত্য

আবর্তনশীল সুখদুঃখরাশিকে একবারে চিরকালের জন্য দূর
 করিতে পারে না। জগৎকে কি কোন সুখরাশি নিত্য কালের জন্য
 দেওয়া যাইতে পারে ? না, তাহা ত দেওয়া যাইতে পারে না।
 সমুদ্রের একস্থান নিম্নভাবাপন্ন না করিয়া তুমি একটা তরঙ্গও উত্থা-
 পিত করিতে পারিবে না। জগতের অন্তর্গত শক্তিরশির সমষ্টি বরা-
 বর সমান—সর্বদাই সমান। উহাকে বাড়ানও যায় না, কমানও
 যায় না। বর্তমান কাল পর্য্যন্ত জ্ঞাত মনুষ্যজাতির ইতিবৃত্ত দেখ।
 সেই পূর্বের ন্যায়ই সুখ দুঃখ, সেই পূর্বের ন্যায়ই পদের তার-
 তম্য—কেহ ধনী কেহ দরিদ্র, কেহ উচ্চপদস্থ কেহ নিম্নপদস্থ,
 কেহ সুস্থ কেহ বা অসুস্থ। প্রাচীন ইজিপ্টবাসী অথবা গ্রীক বা
 রোমানদের যে অবস্থা ছিল, আধুনিক আমেরিকানদের সেই
 অবস্থা। জগতের ইতিহাস আমাদের যতটা জানা আছে, তাহাতে
 দেখিতে পাই, মনুষ্যের অবস্থা বরাবর একই প্রকার। কিন্তু
 আবার ইহাও দেখিতে পাইতেছি যে, এই সুখ দুঃখের ভিন্নতার
 সঙ্গে সঙ্গে উহা কমাইবার চেষ্টাও বরাবর রহিয়াছে। ইতিহাসের
 প্রত্যেক যুগেই সহস্র সহস্র নরনারীর কথা পাওয়া যায়, যাহারা
 অপরের জীবনের পথ মসৃণ করিবার জন্য চেষ্টা করিতেছেন।
 ইহারা কিন্তু কখনই এ বিষয়ে কৃতকার্য হইতে পারেন নাই। আমরা
 বল্কে (Ball) একস্থান হইতে আর একস্থানে তাড়াইয়া লইয়া
 যাওয়ারূপ খেলাই করিতে পারি। আমরা শরীর হইতে কষ্ট
 তাড়াইলাম, উহা মনে গিয়া আশ্রয় লইল। ইহা ঠিক দান্তের
 (Dante) সেই নরকচিত্রের ন্যায়ঃ—রূপণদিগকে রাশিকৃত স্বর্ণ

দেওয়া হইয়াছে। তাহারা পাহাড়ের উপর উহা ঠেলিয়া তুলিতেছে, আবার উহা গড়াইয়া নীচে পড়িতেছে। এইরূপে এই চক্র ঘুরিতেছে। সত্যযুগ সম্বন্ধে যে সকল কথা বলা হয়, সে সমস্তই স্কুলের ছেলেদের জন্য সুন্দর গল্প হইতে পারে, কিন্তু উহা তাহা হইতে কোন অংশে উৎকৃষ্ট নহে। যে সকল জাতি এই সত্যযুগের স্বপ্ন দেখে, তাহারাই আরও ইহা ভাবিয়া থাকে যে, ঐ সময়ে তাহাদেরই সর্বাপেক্ষা ভাল হইবে। এই সত্যযুগ সম্বন্ধে ইহাই সর্বাপেক্ষা অদ্ভুত নিঃস্বার্থভাব।

তাহা হইলে এই সিদ্ধান্ত হইল যে, আমরা এই জগতের সুখ বৃদ্ধি করিতে পারি না, এইরূপ আমরা ইহার দুঃখও বাড়াইতে পারি না। জগতের ব্যক্ত শক্তিসমষ্টি সর্বদাই সমান। আমরা কেবল উহাকে এদিক্ হইতে ওদিকে এবং ওদিক্ হইতে এদিকে ঠেলিয়া দিতেছি মাত্র, কিন্তু উহা চিরকালই একরূপ থাকিবে, কারণ, এইরূপ থাকাই উহার স্বভাব। এই জোয়ার ভাঁটা, এই উঠা নামা ইহার স্বভাব। মৃত্যুশূন্য জীবন বলা যদি সম্ভব হয়, তবেই আমরা উত্থানকে পতন হইতে পৃথক্ করিতে পারি। মৃত্যুশূন্য জীবন বৃথা বাক্যমাত্র। কারণ, জীবন অর্থে নিয়ত মৃত্যু। এই আলোটি ক্রমাগত পুড়িতেছে; ইহাই উহার জীবন। যদি তুমি জীবন প্রার্থনা কর, তাহা হইলে তোমাকে প্রতি মুহূর্তে মরিতে হইবে। উহা কেবল একই জিনিষের দুইটা বিভিন্নরূপ, বিভিন্ন-দিক্ হইতে দৃষ্ট মাত্র; উহারা একই তরঙ্গের উত্থান ও পতন-

স্বরূপ এবং উহাদের দুইটাকে একত্র করিলেই তবে একটা অখণ্ড বস্তু হয়। একজন পতনের দিকটা দেখেন, দেখিয়া দুঃখবাদী হন। অপরে উত্থানের দিকটা দেখেন, দেখিয়া সুখবাদী হন। বালক বিড়ালয়ে বাইতেছে, বাপ মা তাহার সমুদয় ভার লইয়া আছেন; তখন সকলই তাহার পক্ষে সুখকর প্রতীয়মান হয়। তাহার অভাব খুব সামান্য, সে একজন খুব সুখবাদী হয়। কিন্তু বৃদ্ধ, যিনি অনেক ঠেকিয়াছেন, তিনি অপেক্ষাকৃত শান্ত হইয়াছেন। এইরূপে প্রাচীন জাতিরা, যাহারা চতুর্দিকে কেবল পূর্বব গৌরবের ধ্বংসাবশেষ দেখিতেছে, নূতন জাতি অপেক্ষা অপেক্ষাকৃত কম আশাসম্পন্ন। ভারতবর্ষে একটা চলিত কথা আছে, 'বাহা হাজার বছর সহর তাহাই আবার হাজার বছর বন।' এই পরিবর্তন চলিয়াছেই। লোকে এই চিত্রের যখন যে দিক্ দেখে, তখন সে সেইরূপ, হয় সুখবাদী নয় দুঃখবাদী হয়।

এক্ষণে আমরা সাম্যভাব সম্বন্ধে বিচার করিব। এই সত্যযুগের ধারণা অনেকের পক্ষে কার্য্য করিবার মহা প্ররোচক-স্বরূপ হইয়াছে। অনেক ধর্ম্মই ইহা তাঁহাদের ধর্ম্মের এক অঙ্গস্বরূপ প্রচার করিয়া থাকেন। তাঁহাদের ধারণা, ঈশ্বর জগতের শাসন করিতে আসিতেছেন, তিনি আসিলে তখন আর লোকের ভিতর কোন অবস্থার প্রভেদ থাকিবে না। যাহারা ইহা প্রচার করে, তাহারা অবশ্য গোঁড়া মাত্র, কিন্তু তাহারা যে খুব অকপট, তদ্বিষয়ে কোন সন্দেহ নাই। খ্রীষ্টধর্ম্মও এই গোঁড়ামী দ্বারাই প্রচারিত হইয়াছিল, তাহাতেই গ্রাক এবং

রোমক দাসগণ উহার প্রতি এত আকৃষ্ট হইয়াছিল। তাহারা বিশ্বাস করিয়াছিল, তাহাদিগকে আর দাসত্ব করিতে হইবে না, তাহারা যথেষ্ট পরিমাণ খাইতে পরিতে পাইবে; তাহাতেই তাহারা খ্রীষ্ট-ধর্মের ধ্বজার চতুর্দিকে সমবেত হইয়াছিল। যাহারা প্রথমে উহা প্রচার করিয়াছিল, তাহারা অবশ্য গোঁড়া অজ্ঞ ছিল, কিন্তু তাহারা প্রাণের সহিত উহা বিশ্বাস করিত। বর্তমান কালে উহাই সাম্য, স্বাধীনতা ও ভ্রাতৃত্বাবের আকার ধারণ করিয়াছে। ইহাও গোঁড়ামি। এই সাম্যভাব জগতে কখন হয় নাই এবং কখন হইতেও পারে না। কি করিয়া জগতে এই সাম্যভাব হইবে? তাহা হইলে যে জগতে মৃত্যু উপস্থিত হইবে। জগতের উৎপত্তি ও স্থিতির কারণ কি? বৈষম্যভাব। জগতের আদিম অবস্থা—প্রলয়াবস্থায়ই সম্পূর্ণ সাম্যভাব থাকে। এই সকল বিভিন্ন শক্তির তবে কিরূপে উদ্ভব হয়? বিরোধ, প্রতিযোগিতা, প্রতিদ্বন্দ্বিতাই এই সকল শক্তির উদ্ভব। মনে কর, যদি এই ভৌতিক পরমাণুগুলি সম্পূর্ণ সাম্যাবস্থায় থাকে, তাহা হইলে কি সৃষ্টি থাকিবে? আমরা বিজ্ঞানের দ্বারা জানিতে পারি, তাহা হইতে পারে না। জল নাড়িয়া দাও, তুমি দেখিবে, প্রত্যেক জলবিন্দু আবার স্থির হইবার চেষ্টা করিবে, একটা আর একটার দিকে দৌড়িয়া যাইবে। এইরূপেই এই জগৎপ্রপঞ্চ উৎপন্ন হইয়াছে। আর এতদন্তর্গত সকল পদার্থই তাহাদের নষ্ট সাম্যভাব পুনঃপ্রাপ্তির চেষ্টা করিতেছে। আবার বৈষম্যাবস্থা আসিবে; তাহা হইতেই আবার এই সৃষ্টিরূপ মিশ্রণের উৎপত্তি হইবে। বৈষম্যই জগতের ভিত্তি।

আবার সৃষ্টির পক্ষে যেমন সাম্যভাব-বিনাশকারী শক্তির প্রয়োজন, তদ্রূপ সাম্যভাবস্থাপনকারী শক্তিরও প্রয়োজন ।

সম্পূর্ণ সাম্যভাব—যাহার অর্থ সমুদয় প্রতিদ্বন্দী শক্তিগুলির সম্পূর্ণ সামঞ্জস্য, তাহা জগতে কখনই হইতে পারে না । এই অবস্থা উপস্থিত হইবার পূর্বেই জগৎ শীতল হইয়া একটা সুবৃহৎ হিম-রাশিতে পরিণত হইবে, আর এখানে কেহই থাকিবে না । অতএব আমরা দেখিতেছি, এই সত্যযুগ অথবা সম্পূর্ণ সাম্যভাব—এই সকল অবস্থা—শুধু যে এই জগতে অসম্ভব, তাহা নহে, কিন্তু যদি আমরা সম্পূর্ণরূপে ঐ অবস্থা আনয়নে কৃতকার্য হইতে পারি, তবে তাহা সেই প্রলয়ের দিন সন্নিহিত করিয়া দিবে । তার পর, আবার মানুষের মস্তিষ্কের মধ্যে, পরস্পর ভিন্নতা রহিয়াছে । মানুষে মানুষে প্রভেদ করে কিসে ? মস্তিষ্কের ভিন্নতা । আজকালকার দিনে পাগল ছাড়া আর কেহই বলিবে না যে, আমরা সকলে একরূপ মস্তিষ্কের শক্তি লইয়া জন্মগ্রহণ করিয়াছি । আমরা জগতে সকলেই বিভিন্ন শক্তি লইয়া আসিয়াছি । কেহ বড়, কেহ বা ছোট লোক হইয়া আসিয়াছি, ইহা অতিক্রম করিবার যো নাই । আমেরিকান ইণ্ডিয়ানগণ সহস্র সহস্র বৎসর ধরিয়া এই দেশে বাস করিতেছিল, আর তোমাদের পূর্ব পুরুষ বাঁহারা আসিয়াছিলেন, তাঁহারা অতি অল্পসংখ্যক ছিলেন । যদি আমরা সকলেই সমান হই, তবে এ প্রভেদ আসিল কোথা হইতে ? যদি আমরা সকলে সমান হই, তবে ইণ্ডিয়ানরা কেন নানা প্রকার উন্নতি করিল না ? কেনই বা নগরাদি নির্মাণ করিল না ; কেনই বা তাহারা চিরকাল

বনে বনে শিকার করিয়া বেড়াইল ? বিভিন্ন প্রকার মস্তিষ্ক ও বিভিন্ন প্রকারের পূর্ব সংস্কারসমষ্টি আসিয়া এবং কার্য করিয়াই এই ব্যাপার সাধন করিয়াছিল । সম্পূর্ণ সাম্যভাব অর্থে মৃত্যু । যতদিন এই জগৎ থাকিবে, ততদিন বৈষম্য ভাব থাকিবে ; যুগ-চক্র যখন শেষ হইয়া যাইবে, তখনই সত্যযুগ আসিবে । তাহার পূর্বের সাম্যভাব আসিতে পারে না । তাহা হইলেও এই সাম্য-ভাবের ধারণা আমাদের পক্ষে এক প্রবল কার্যে প্রবৃত্তিদায়িনী শক্তি । যেমন সৃষ্টির পক্ষে এই বৈষম্যের উপযোগিতা আছে, সেইরূপ উহাকে কমাইবার চেষ্টারও উপযোগিতা আছে । বৈষম্য না থাকিলে সৃষ্টি থাকিত না । আবার মুক্তিলাভের ও ঈশ্বরসন্নি-ধানে যাইবার চেষ্টা না থাকিলেও সৃষ্টি থাকিত না । এই দুই শক্তির তারতম্যেই মানবের মধ্যে বিভিন্ন প্রকার অভিসন্ধি আসিয়া থাকে, আর ইহারা চিরকালই বিদ্যমান থাকিবে ।

এই চক্রের ভিতরে চক্র—এ বড় সর্ববিশেষ যন্ত্র । ইহার ভিতরে হাত দিলেই বস্ আমরা গেলাম । আমাদের মধ্যে প্রত্যেকেই ভাবি যে, কোন বিশেষ কর্তব্য সমাধা হইয়া গেলেই আমরা বিশ্রাম লাভ করিব, কিন্তু তাহার খানিকটা করিবার পূর্বেরই আর একটা যেন মুখিয়ে আছে দেখিতে পাওয়া যায় । এই যন্ত্র আমাদের সকলকেই টানিয়া লইয়া যাইতেছে । ইহা হইতে বাঁচিবার দুটী মাত্র উপায় আছে :—একটী—এই যন্ত্রের সহিত সংশ্রব একেবারে ছাড়িয়া দেওয়া, উহাকে চলিতে দাও, তুমি একধারে সরিয়া দাঁড়াও । বাসনা সব ত্যাগ কর ইহা বলা খুব সহজ, কিন্তু

করা একরূপ অসম্ভব । দুকোটি লোকের ভিতর একজন পারে কি না, বলিতে পারি না । অপর উপায় এই জগতে ঝাঁপ দিয়া কৰ্মের রহস্য অবগত হওয়া, উহাকেই কৰ্মযোগ বলে । পালাইও না ; উহারই ভিতরে দাঁড়াইয়া কৰ্মের রহস্য শিখ । কৰ্মের দ্বারাই আমরা কৰ্মের বাহিরে যাইব । এই যন্ত্রের মধ্য দিয়াই বাহির হইবার পথ ।

আমরা এক্ষণে দেখিলাম, এই কৰ্ম কি । সংক্ষেপে সমুদয় বলিতে গেলে বলিতে হইবে, এই কৰ্ম সর্বদাই চলিবে, আর যাঁহারা ঈশ্বরে বিশ্বাস করেন, তাঁহারা সহজে বুঝিতে পারিবেন যে, ঈশ্বর এমন একজন অসমর্থ পুরুষ নন যে, তিনি আমাদের নিকট হইতে সাহায্যের প্রার্থী । দ্বিতীয়তঃ, এই জগৎও চিরকাল চলিবে । আমাদের স্মরণ রাখিতে হইবে যে, আমাদের গন্তব্য-স্থান মুক্তি, আমাদের লক্ষ্য নিঃস্বার্থপরতা । কৰ্মযোগমতে কৰ্মের দ্বারা আমাদের এক চরম স্থান লাভ করিতে হইবে, এই জন্মই আমাদের কৰ্মরহস্য-জ্ঞানের প্রয়োজন । সমুদয় জগৎকে সম্পূর্ণরূপে সুখী করিবার ইচ্ছারূপ মনোভাব গোঁড়াদের পক্ষে কার্য-প্রবৃত্তির উদ্ভেজক বলিয়া ভাল হইতে পারে, এই মুখোপযোগী ধারণা সকল প্রাচীন কালে হয়ত খুব উপকার করিয়াছিল, কিন্তু আমাদের এটা জানা উচিত যে, উহাতে ভাল যেমন তেমনি মন্দও হইয়াছে । কৰ্মযোগী জিজ্ঞাসা করেন, কৰ্ম করিবার জন্ম তোমার কোন অভিসন্ধির প্রয়োজন কি ? অভিসন্ধি তোমাকে যেন স্পর্শ না করে । তোমার কৰ্মই অধিকার, ফলে অধিকার নাই । ‘কৰ্মণ্যে-

বাধিকারস্বে মা ফলেষু কদাচন।’ কর্মযোগী বলেন, মানুষ এবিষয়ে আপনাকে শিক্ষিত করিতে পারে। যখন লোকের উপকার করিবার ইচ্ছা তাহার মজ্জাগত হইয়া যাইবে, তখন তাহার বাহিরের অভিসন্ধির আর কোন প্রয়োজন থাকিবে না। লোকের উপকার আমরা কেন করিব? উহা আমার ভাল লাগে বলিয়া; তার পর আর কোন প্রশ্ন জিজ্ঞাসা করিও না। ভাল কায কর, কারণ ভাল কায করা ভাল। কর্মযোগী বলেন, যে স্বর্গে যাইবে বলিয়া সৎকর্ম করে, সে আপনাকে বদ্ধ করিয়া ফেলে। অভিসন্ধিযুক্ত হইয়া যে কায করা যায়, তাহা আমাদের চরম লক্ষ্য মুক্তির দিকে না লইয়া গিয়া আমাদের চরণে আর একটি শৃঙ্খল পরাইয়া দেয়। যদি আমরা মনে করি, এই এই কর্ম দ্বারা আমরা স্বর্গে যাইব, তাহা হইলে আমরা স্বর্গ-নামক একস্থলে আসক্ত হইব। আমাদের স্বর্গে গিয়া স্বর্গস্থ সমুদয় ভোগ করিতে হইবে; উহা আমাদের পক্ষে আর একটি বন্ধনস্বরূপ হইবে।

অতএব, একমাত্র উপায়—সমুদয় কর্মের ফল ত্যাগ কর, অনাসক্ত হও। এইটী জানিয়া রাখ যে, আমরা জগৎ নহি; আমরা বাস্তবিক শরীর নহি, আমরা বাস্তবিক কার্য্য করি না। আমরা আত্মা—আমরা অনন্তকাল ধরিয়া বিশ্রাম ও শাস্তিস্থ সমস্তোগ করিতেছি। আমরা কেন কিছুর দ্বারা বদ্ধ হইব? আমাদের রোদনের কোন কারণ নাই, আত্মার পক্ষে কাঁদিবার কিছুই নাই। এমন কি, অপরের দুঃখে সহানুভূতিসম্পন্ন হইয়াও আমাদের কাঁদিবার কোন প্রয়োজন নাই। আমরা এইরূপ কাম্বা

কাটনা ভালবাসি বলিয়াই আমরা কল্পনা করি যে, ঈশ্বর তাঁহার সিংহাসনে বসিয়া এইরূপে কাঁদিতেছেন। এরূপ ঈশ্বর আমাদের লাভ করিবার উপযুক্ত নহেন। ঈশ্বর কাঁদিবেনই বা কেন? ক্রন্দন ত বন্ধনের চিহ্ন—দুর্বলতার চিহ্ন। একবিন্দুও চক্ষের জল যেন না পড়ে। এইরূপ হইবার উপায় কি? ‘সম্পূর্ণ অনাসক্ত হও’ বলা খুব ভাল বটে, কিন্তু হইবার উপায় কি? আমরা অণু অভিসন্ধি-শূন্য হইয়া যে কোন সংকার্য্য করি তাহা আমাদের পক্ষে একটা নূতন শৃঙ্খলস্বরূপ না হইয়া বরং যে শৃঙ্খলে আমরা বদ্ধ রহিয়াছি, তাহারই একটা গাঁট ভাঙাই করিয়া থাকে। আমরা প্রতিদানের চিন্তাশূন্য হইয়া জগতে যে কোন সংচিন্তা প্রেরণ করি, তাহা সঞ্চিত হইয়া থাকিবে—আমাদের বন্ধন-শৃঙ্খলের একটা গাঁট ভাঙিয়া দিবে এবং আমাদের ক্রমশঃই পবিত্রতর করিতে থাকিবে, যতদিন না আমরা পবিত্রতম মনুষ্যরূপে পরিণত হই। কিন্তু ইহা লোকের নিকট যেন কেমন অস্বাভাবিক ও দার্শনিক রকমের বোধ হয়, উহা যেন কোন কার্য্যকর নহে। আমি গীতার বিরুদ্ধে অনেক তর্ক পড়িয়াছি, অনেকেই তর্ক তুলিয়াছেন—অভিসন্ধি ব্যতীত কার্য্য হইতে পারে না। ইঁহারা গোঁড়ামি দ্বারা প্রবর্তিত কার্য্য ব্যতীত অণু কোনরূপ কার্য্য দেখেন নাই; এই জন্যই তাঁহারা এইরূপ বলিয়া থাকেন।

আমি অল্প কথায় আপনাদের নিকট এমন এক লোকের কথা বলিব, যিনি ইহা কার্য্যে পরিণত করিয়াছিলেন। বুদ্ধদেবই এই কৰ্ম্মযোগী; একমাত্র তিনিই ইহা সম্পূর্ণরূপে কার্য্যে

পরিণত করিয়াছিলেন। বুদ্ধ ব্যতীত জগতের অন্যান্য মহাপুরুষ-
গণের সকলেরই কার্যে প্রবৃত্তির কারণ ছিল—বাহিরের অভি-
সন্ধি। তিনি ব্যতীত জগতের সমুদয় মহাপুরুষকে দুইভাগে
বিভক্ত করা যাইতে পারে,—একদল বলেন, আমরা ঈশ্বর,
জগতে অবতীর্ণ হইয়াছি; অপর দল বলেন, আমরা ঈশ্বর-প্রেরিত;
উভয়েরই কার্যের প্রেরণাশক্তি বাহির হইতে আইসে। আর
তঁাহারা যতদূর অধ্যাত্মিক ভাষা ব্যবহার করুন না কেন, তঁাহারা
বহির্জগৎ হইতেই তঁাহাদের পুরস্কার আশা করিয়া থাকেন।
কিন্তু মহাপুরুষগণের মধ্যে বুদ্ধই একমাত্র বলিয়াছিলেন, “আমি
ঈশ্বর-সম্বন্ধে তোমার ভিন্ন ভিন্ন মত শুনিতে চাই না। আত্ম-
সম্বন্ধে সূক্ষ্ম সূক্ষ্ম মতামত বিচার করিবার আবশ্যক কি? সৎ
হও ও সৎকার্য্য কর। ইহাই তোমাকে—যাহাই সত্য হউক না,
তাহাতে লইয়া যাইবে।”

তিনি সম্পূর্ণরূপে সর্বপ্রকার অভিসন্ধিবর্জিত ছিলেন, আর
কোন মানুষ তাঁহা অপেক্ষা অধিক কার্য্য করিয়াছিলেন? ইতি-
হাসে এমন একটা চরিত্র দেখাও, যিনি সকলের উপরে এতদূর
গিয়াছেন। সমুদয় মনুষ্যজাতি কেবল এইরূপ একটীমাত্র চরিত্র
প্রসব করিয়াছে—এতদূর উন্নত দর্শন,—এমন সহানুভূতি—এই
শ্রেষ্ঠ দার্শনিক, এই সর্বশ্রেষ্ঠ দর্শন প্রচার করিতেছেন, আবার
অতি নিম্নতম প্রাণীর উপর পর্য্যন্ত সহানুভূতি প্রকাশ করিয়া-
ছেন অথচ লোকের নিকট কোন দাবী দাওয়া নাই।
তিনি আদর্শ কর্ম্মযোগী; তিনি সম্পূর্ণ অভিসন্ধিশূন্য হইয়া

কাৰ্য্য কৰিয়াছিলেন ; আর মনুষ্যজাতির ইতিহাস দেখাইতেছে, যতলোক জগতে জন্মিয়াছেন, তিনি তাহাদের সকলের মধ্যে শ্রেষ্ঠ; তাঁহার সহিত আর সকলের তুলনা হয় না, তিনিই হৃদয় ও মস্তিষ্কের সম্পূর্ণ সামঞ্জস্যভাবের উদাহরণ, আত্মশক্তির শ্রেষ্ঠতম বিকাশ। জগতে যত সংস্কারক জন্মাইয়াছেন, তাহাদের মধ্যে তিনিই সর্বশ্রেষ্ঠ। তিনিই প্রথম সাহসপূর্বক বলিয়াছিলেন, “কোন প্রাচীন হস্ত-লিপি পুথিতে কোন বিষয় লেখা আছে বলিয়া, তোমার জাতীয় বিশ্বাস বলিয়া অথবা তোমার বাস্তবস্থা হইতেই তুমি বিশেষ কোন বিশ্বাসে গঠিত হইয়াছ বলিয়া কোন বিষয় বিশ্বাস করিও না ; কিন্তু বিচার করিয়া দেখ, তার উপর বিশেষরূপ বিশ্লেষণ করিয়া যদি দেখ, সকলের পক্ষে উহা উপকারী, তবে উহাতে বিশ্বাস কর, ঐ উপদেশমত জীবন যাপন কর এবং অপরকে ঐ উপদেশানুসারে জীবন যাপন করিতে সাহায্য কর ।”

যিনি অর্থ বা অণ্ড কোনরূপ অভিসন্ধিশূন্য হইয়া কার্য্য করেন, তিনিই সর্বাপেক্ষা উত্তমরূপে কার্য্য করেন আর মানুষ যখনই ইহা করিতে সমর্থ হয়, তখন সেও একজন বুদ্ধ হইয়া যাইবে এবং তাহার ভিতর হইতে এরূপ কার্য্যশক্তির প্রকাশ হইবে, যাহাতে জগতের অবস্থা সম্পূর্ণরূপে পরিবর্তিত করিয়া ফেলা যাইতে পারে। ইহাই কৰ্ম্মযোগের আদর্শ।

সমাপ্ত ।

উদ্বোধন ।

স্বামী বিবেকানন্দ প্রতিষ্ঠিত রামকৃষ্ণ-মঠ পরিচালিত মাসিক পত্র ।
অগ্রিম বার্ষিক মূল্য সডাক ২৭ টাকা । উদ্বোধন-কার্যালয়ে স্বামী
বিবেকানন্দের ইংরাজী ও বাঙ্গালা সকল গ্রন্থই পাওয়া যায় । উদ্বোধন-
গ্রাহকের পক্ষে বিশেষ সুবিধা । নিম্নে দ্রষ্টব্য :—

উদ্বোধন-গ্রন্থাবলী ।

স্বামী বিবেকানন্দ প্রণীত ।

পুস্তক ।	সাধারণের পক্ষে ।	উদ্বোধনগ্রাহকের পক্ষে ।
ইংরাজী রাজযোগ (২য় সংস্করণ)	১৭	৫০
„ জ্ঞানযোগ „	১১০	১৮/০
„ ভক্তিযোগ „	১৬/০	১৬/০
„ কর্মযোগ „	৫০	১০
„ চিকাগো বক্তৃতা (৪র্থ সংস্করণ)	১৬/০	১/০
The Science and Philosophy of Religion	১৭	৫০
A Study of Religion	১৭	৫০
Religion of Love	১৬/০	১০
My Master (2nd edition)	১০	১৬/০
Pavhari Baba	৮/০	৮/০
Thoughts on Vedanta	১৬/০	১০
Realisation and its Methods	৫০	১৬/০
Christ, the Messenger	৮/০	৮/০
Paramhansa Ramakrishna (2nd edition) by P. C. Mojumdar	৮/০	৮/০

My Master পুস্তকখানি ১০ আনায় লইলে পরমহংস রামকৃষ্ণ
নামক একখানি পুস্তক বিলাসী দেওয়া যায় ।

পুস্তক।	সাধারণের পক্ষে ! উদ্বোধনগ্রাহকের পক্ষে।	
বাস্তানা রাজযোগ	(৩য় সংস্করণ)	১\ ৫০
„ জ্ঞানযোগ	(ঐ)	১\ ৫০
„ ভক্তিযোগ	(৫ম সংস্করণ)	১১/০ ১০
„ কর্মযোগ	(৪র্থ সংস্করণ)	৫০ ১০
„ চিকাগো বক্তৃতা	(৩য় সংস্করণ)	১/০ ১০
„ ভাববার কথা	(২য় সংস্করণ)	১০/০ ১০
„ পত্রাবলী (১ম ভাগ) (২য় সংস্করণ)		১১/০ ১০
„ প্রাচ্য ও পাশ্চাত্য	(৩য় সংস্করণ)	১১/০ ১০
„ পরিব্রাজক	(২য় সংস্করণ)	৫০ ১০
„ বীরবাণী		১০ ১০
„ ভারতে বিবেকানন্দ (২য় সংস্করণ)		২\ ১৫০
„ বর্তমান ভারত	(৩য় সংস্করণ)	১০ ১০
„ মদীয় আচার্য্যদেব		১০/০ ১০
„ পণ্ডারী বাবা		১/০ ৫/০
„ ধর্ম-বিজ্ঞান		১\ ৫০
„ ভক্তি-রহস্য		১১/০ ১০

শ্রীশ্রীরামকৃষ্ণ-উপদেশ (পকেট এডিশন), স্বামী ব্রহ্মানন্দ সঙ্কলিত
মূল্য ১০, গীতা শঙ্করভাষ্যানুবাদ, পণ্ডিত প্রমথনাথ তর্কভূষণানুদিত,
উত্তরার্দ্ধ ১১০, পাণিনীয় মহাভাষ্য, পণ্ডিত মোক্ষদাচরণ সামাধ্যায়ী অনুদিত,
মূল্য ৩১০ টাকা।

স্বামী সারদানন্দ প্রণীত ভারতে শক্তিপূজা ১১০ আনা, উদ্বোধন-
গ্রাহকের পক্ষে ১০/০ আনা, শ্রীশ্রীরামকৃষ্ণলীলাপ্রসঙ্গ, গুরুভাব—পূর্বার্দ্ধ
১১০, উদ্বোধনগ্রাহকগণের পক্ষে ১\, শ্রীশ্রীরামকৃষ্ণলীলাপ্রসঙ্গ, গুরুভাব,
উত্তরার্দ্ধ ১১০, উদ্বোধন গ্রাহকের পক্ষে ১১/০।


শ্রীযুক্ত রাজেন্দ্রনাথ ঘোষ প্রণীত আচার্য্য শঙ্কর ও রামানুজ ২\ টাকা।
এতদ্ব্যতীত মঠের যাবতীয় গ্রন্থ এবং শ্রীরাম কৃষ্ণদেবের ও স্বামী
বিবেকানন্দের নানা রকমের ফটো এবং হাফ্ টোন ছবি সর্বদা পাওয়া
যায়।

ঠিকানা—

উদ্বোধন-কার্য্যালয়।

১২, ১৩ নং গোপালচন্দ্র নিয়োগীর লেন

Digitized by Arya Samaj Foundation Chennai and eGangotri



Digitized by Arya Samaj Foundation Chennai and eGangotri

